



皇明名臣琬琰卷之十四

河間忠武王張公神道碑銘

王

楊文貞公

士奇

王諱玉字世美姓張氏世家河南開封之祥符曾祖某祖某父天佑皆追封榮國公曾祖妣某祖妣劉妣王皆追封榮國夫人王初仕元爲樞密知院已而灼知天命洪武乙丑自拔來歸我太祖高皇帝禮遇甚厚王感奮思效戊辰從征卜漁海子哈喇哈之地以功授濟南衛副千戶又從勦粉紅帖木兒至延安延州還升明威將軍安慶衛指揮僉事庚午從征永順散毛諸洞辛未逐北虜之侵邊者至鴉寒山而還調燕山左護衛癸酉追虜至黑松林甲戌征野人等處升都指揮同知戊寅朝廷用讒加兵親藩事急太宗皇帝不得已舉靖難之師帷幄謀畫悉以任王王推誠致慮夙夜不懈事可否進止眾論紛紜未定者王正色數語決之咸中機宜故凡舉措必咨於王首用王策奪北平九門撫順討逆三日城內外悉定師將南出王曰不先定薊州將爲後患薊平餘不足平時

薊州守馬宣謀起兵迎拒上命王討之王至諭之不下環城攻之
 宣率眾出戰遂執宣殺之并執指揮毛某王知其可用釋不殺送
 詣北平遂撫輯軍民是夜急趨遵化豫戒將士止殺曰師行以得
 人心爲本遂簡敢勇士四鼓登陴開其城門將士皆入城中始
 覺守將率眾拒戰執其將斬之餘不傷一人將吏悉隨王上謁遂
 移師永平密雲皆望風輸款從至灤河王進曰都督潘忠楊松在
 莫州扼吾南路宜先禽之上悅遂親發兵命王爲先鋒用其計取
 涿州雄縣生禽潘楊時長興侯耿炳文率兵二十萬屯真定王自
 請往覘之還言軍無紀律且其上有敗氣無能爲上至無極以敵
 眾我寡欲試諸將勇怯召問今舉兵所嚮且度可必勝否眾未有
 適說王曰今當徑趨真定彼雖眾然新集未齊我軍乘勝一鼓可
 破之上曰玉言合吾意吾倚玉一人足辦明日抵真定接戰耿炳
 文大敗幾被禽獲其左副將駙馬都尉李堅右副將軍都督甯忠
 及都督顧成等斬首三萬餘級獲馬二萬復敗安陸侯吳傑軍上

召王諭曰汝之功也非汝與吾意合不及此永平馳報江陰侯吳
 高等以遼東兵攻圍城急又牒報曹國公李景隆引兵數十萬將
 攻北平城上與王謀先援永平既至高等望風棄輜乘遁王從上
 追之斬獲甚眾王言大寧去此不遠請移軍襲之可免後顧從之
 遂從攻大寧自辰至午城破斬其都指揮朱鑑執都指揮房寬下
 令安撫城中頃刻而定北平報李景隆兵圍城遂旋師王請先攻
 其營然後歸援從之徑擣景隆營大戰三日城中亦鼓譟出表裏
 夾攻景隆軍不支大敗遁去從攻廣昌蔚州進攻大同悉下謀報
 景隆收潰散卒號百萬且復至王言兵貴神速先事者勝往駐白
 溝河以逸待勞可必勝也上命王率眾馳往駐三日景隆兵至王
 以精騎馳擊之斬馘無算景隆復大敗收餘卒退保濟南乘勝追
 擊圍其城既而解圍還攻滄州獲其大將徐凱進攻東昌敵列陣
 決戰上以數千騎繞出陣後敵圍數市上已衝擊而出玉不知上
 所在突入敵陣大戰連殺百數十人王亦被創而歿十二月廿五

日云春秋五十有八上哭之慟既旋師諸將皆侍語及東昌事上
曰勝負兵家常事不足計所恨艱難之際失張玉良輔吾至今寢
不帖席食不下咽隕涕不已諸將皆泣上既正大統行報功之典
顧侍臣曰張玉才備智勇論靖難功當第一惜其蚤沒贈奉天靖
難推誠宣力武臣特進榮祿大夫右柱國追封榮國公諡忠顯進
封其三代考妣仁宗皇帝在春宮數與侍臣言張玉識見謀略卓
然老成非諸將所及且端方匡直之益誠難得也既嗣位加封河
間王改諡忠武告於廟以配享太宗親制祭王之王文有秉義懷忠
一心爲國靖難之際發謀奮勇百戰當前所嚮風靡大功垂成挺
身陷陣惟義所在視死如歸忠精貫于星日功烈揚於竹帛之褒
蓋王爲人莊重果毅涉獵書史明其大義而識慮高遠治家禮法
秩然奉命行師紀律嚴肅與士卒同甘苦未嘗妄戮一人每語麾
下曰爲將當濺血戰袍流芳汗簡蓋其殉國之志素定古名將何
過焉配王氏樞密院判執中之女累封王夫人子男三長輔起武

功累進奉天靖難宣力輔運佐理武臣特進光祿大夫左柱國英
國公太師監修國史知經筵事功德茂碩爲國元臣次輓神策衛
指揮使次軌錦衣衛指揮同知女一永樂中冊爲貴妃孫男六長
忠投勳衛次鑑次瑾次斌次某余陪太師公在史館經筵久以余
永樂洪熙從臣實聞二聖所嘗論王者屬銘神道之碑敬敘而銘
之銘曰

文皇奉天中興邦國桓桓忠武奮起羽翼帷幄密勿長策深畫上
契淵衷魚水之得義旗肇舉仗劍先驅啟城九門功其權輿取薊
遵化如探穴雛執其抗鋒摧朽折枯龍馭旣南大旆在前連下雄
鄭遄奮常山長河無險鐵城不堅撫降殲逆德威並宣決志敵愾
遑恤厥躬精誠貫日勁氣吐虹聊城之塵髮怒上衝先軫戰旗干
載一忠王勞在國王績在史王嗣象賢益闕以偉帶礪山河廷有
明誓清廟陟配逾千萬祀

成國朱公東平武烈王神道碑銘

楊文貞公

天命仁聖爲下民主必生文武材略恢傑弘偉之士爲之輔翼相與協力一心靖暴亂致治平以建非常之功夫肇創之績難矣中興尤非易也故前史贊勳臣率以肇創中興並言若我太宗文皇帝龍興北藩安宗社於將危保洪業於永固其功蓋又有難者以一隅之眾而應四方強盛之敵靡堅不摧靡剛不馴固自天之所定亦必有材略恢傑弘偉之佐以效夫疏附先後奔走禦侮之能是以大功之成勃然莫之能禦也若時東平武烈王其偉然特出者乎王姓朱諱能字士弘世家鳳陽之懷遠曾祖考某妣某氏祖考某妣某氏父亮從太祖皇帝征伐有功累升武毅將軍燕山中護衛副千戶謹持行善撫士有譽於時母某氏王生有令質自少喜讀書事父母至孝洪武甲戌襲父職事太宗皇帝於藩邸小心慎恭未嘗少懈而撫恤下人一如其父甚爲上所信任朝夕侍不去側奉天靖難之師初興帷幄密議惟河間忠武王與玉預焉時北平三司之交構造禍者王與忠武建議率麾下首禽之遂奪城

九門撫納城內外三日人心大定引兵攻薊州禽其將都指揮馬宣等遂取遵化永平密雲從上攻灤河既還從克雄縣首破其東門敵眾敗走追及於月漾橋執其總帥都督楊松潘忠等復追其餘眾於鄭州斬獲不可數計乘勝長驅入真定大敗長興侯耿炳文兵時王獨與敢死士三十餘騎追奔至滹沱河炳文眾尚數萬復列陳嚮王王奮勇大呼衝入敵陣敵眾披靡自相蹂躪死者無算棄甲來降者三千餘人上大悅賜書褒諭永平馳報江陰侯吳高以遼東兵攻城急王從上赴援高遁走王追及之多所殺獲遂從定大盜戮其拒命撫輯其眾而還時曹國公李景隆率兵攻北平城王從上至鄭村壩與景隆兵遇大戰敗之進攻其營又敗之景隆兵列營九門者連敗之城亦出兵夾擊景隆狼狽走王從上攻廣昌蔚州大同次第悉下景隆復收潰散之卒號百萬來攻上親拒之王爲前鋒午至白溝河敗其都指揮平安軍及申又與敵兵戰大敗之明日王領左哨當前鋒又大敗敵盡克其砦柵敵走

保濟南王率眾追之至鐔山敵嚴兵列陣以待王連破之敵眾釋
兵降萬餘人王以聞上悉撫而縱之蓋自是敵兵戴德皆願來歸
無復鬪志然上得之即遣之不畱王從攻滄州先破其東門入城
斬首六萬餘級敵震懼遂獲其總帥徐凱進攻東昌敵列陣決戰
上以數千騎出陣後敵圍上數匝王奮力翼上以出進戰夾河王
爲奇兵先鋒大敗敵將盛庸兵又敗平安兵于藁城追奔至真定
戰其東門斬首萬餘級遂略彰德及定州勦西水寨已而敗敵將
李文於德州遂克東阿東平破汶上諸寨設伏泚河敗平安兵十
萬餘進戰小河爲敵所乘稍卻諸將遽請旋師獨王力勸上行曰
用兵未必常勝豈可因小挫輒自沮項羽百戰百勝竟亡漢高屢
敗而終興自殿下舉兵來克捷多矣此小挫何足置意但當以宗
社爲重整兵前進耳上撫掌歎曰爾言深合吾心遂行至靈壁敵
盛兵迎戰王先登陷陣大敗之生禽其副總兵陳暉平安參將馬
溥徐真及都指揮三十餘人獲馬二萬敵眾死者屍蔽原野降者

數十萬人悉縱遣之進克泗州渡淮敗盛庸兵遂克盱眙下揚州
從上渡江入京師內難平諸王臣民推戴上承大統論靖難功王
居首賜號奉天靖難推誠宣力武臣特進榮祿大夫右柱國左軍
都督府左都督封成國公食祿三千五百石子孫世襲賜誥券追
封三代考皆成國公妣皆成國夫人永樂二年命兼太子太傅四
年安南黎季犛弑其國主毒虐下民拒遏詔使數諭弗悛遂發兵
討罪命王總兵佩征夷大將軍印率左右副將軍左右參將及神
機橫海驃騎游擊鷹揚五將軍兵八十萬討之瀕行上親送之龍
江師至廣西上顧侍臣曰朕夜察天象西帥有憂其朱能乎然能
足辦斯事朕第慮氣候非其所習耳踰旬訃聞上震悼輟視朝五
日一時同王從舉義者永康侯徐忠等十數人皆入奉慰上灑泣
曰方艱難時協力一心相濟能其首也且其素存心行事皆應遠
到曷遽止此言已益酸楚左右皆流涕莫敢仰視蓋王至龍州嬰
疾薨十月初二日也春秋三十有七上親爲文祭之宸衷悲愴溢

於言表讀者皆爲泣下賻恤特厚追封東平郡王賜諡武烈并加贈其三代皆王爵仁宗皇帝臨御特詔王配享太宗廟廷賜祭之文尤極哀重蓋當時元功之首也王頎然魁碩勇力過人器宇宏博智識高遠雍容端重辭氣溫裕廣坐羣議王折衷之詞簡理當無不心服善馭將士教訓撫恤親若父子紀律明肅無敢踰越每遇勁敵大呼馳鬪以一敵百敵皆望風辟易懷綏降附恩惠周至出謀制勝靡有遺策尤善用才人率歸心雖古名將不過是也葬昌平北澤山之原配王氏累封東平郡王夫人子男若干長男襲封成國公太子太保孫男若干永樂初侍講禁林凡軍國事預陪廷議恆與王接知之有素至是太保公屬書神道之碑敬敘而爲銘銘曰

明聖之興天實命之必有名世輔翼攸資文皇大聖奉藩恭恪天將啟之內難奄作有不得已義旗載揚彬彬文武風雲奮興于時東平雄才弘略夜寐夙興密侍帷幄刈違撫順式宣德音環城中

外有截一心金戈所嚮漁陽風靡永平不固大寧傾圮後顧無虞前驅翩翩折朽雄鄭摧堅中山益都追奔滄州殲逆咸奮先登電掃霆擊青齊旣怙踊躍而南持志決往宗社爲心靈璧疾下長淮飛渡茫茫圻甸有返無拒大江無險內難廓清翼龍升御天開日明國有元良遂兼儲傅端肅之行寬仁之度南交弗靖奉命徂征師未出疆大星墮營天不憖遺堂柱遽仆帝聞盡傷卹典隆厚忠存社稷勳載簡編偉哉嗣興顯顯象賢河山有誓追崇有詔皇明萬年永配清廟

定西侯涇國武勇蔣公神道碑貴

錢文通公溥

蔣周公之胤以國氏漢末有諱子文者淮南人仕爲秣陵尉遂盜至鍾山下而亡大著靈異隆于祀典子孫散處于淮代有聞人而公其裔也然未有如公之顯者公諱貴字大富揚之江都人父從龍當元之季以義勇附太祖起淮甸洪武十一年隸燕山中護衛侍親王之國卽太宗也公生有大志恆念父功屈人下甫冠卽代

珠玑錄十四
二
役三十一年舉義克雄縣攻大寧戰鄭村壩取廣昌蔚州白溝河
戰勝圍濟南回取滄州戰夾河藁城克西水寨敗敵將平安軍於
肥河戰靈璧收泗州遂渡江入京師功成論次自十夫長升至昌
國衛指揮同知後征交阯四征沙漠敗阿魯台於九龍口洪熙元
年復至大松嶺禽殺賊眾升都指揮僉事調掌彭城衛事宣德二
年四川松潘夷叛以公充右參將率軍捕之首募鄉道從東路險
絕處攀緣而進賊驚曰兵從天上來邪一日戰十數合以全勝聞
賜敕有奪橋斬關如古良將之譽明年升都指揮同知鎮守密雲
諸關番夷復叛仍充參將討之尋升左軍都督僉事充副總兵公
謂夷性變詐非長驅撲滅患未可弭乃大閱士連破黑虎等四十
餘寨斬首千五百級生禽稱是投崖箐死者無算夷遂益謐賜敕
獎諭升都督同知充總兵官佩平蠻將軍印鎮守其地凡事有利
害悉奏罷行之就威州千戶所建州治興儒學使知所教列屯而
耕易木柵以石遠近堡壘相望使知所守廩庾以足人心大安正

統改元召還升右都督時西戎僞王阿台等寇甘涼邊將屢失利
命公佩平虜將軍印率京營五千騎征勦凡陝西及甘肅涼州等
處官軍悉聽節制兵至鎮番出魚兒海子哨還時虜酋把禿孛羅
率眾犯莊浪公命將禦之生縛孛羅等百人又諜報阿台屯伏河
西遂躡蹤倍道至亂山奮勇衝入且追且殺至石城泉斬首二百
餘盡獲其馬駝衣械虜有逃奴來言阿台所在公議卽往副將李
安沮之公拔劍厲聲曰汝任邊寄肉食且數年坐視其縱橫不制
尚掉三寸舌以撓我師敢復諫者死乃策馬前馳見賊遂整陣而
前生禽男婦數十人送營諜復知其不遠令軍士疾走至兀魯猝
見虜牧馬遂約衝馬羣以鞭擊箭囊聲驚之馬盡佚虜旣失馬皆
輓弓步戰不決卽令眾躍馬揮刀齊入以旗牌手督之遂大捷內
禽一胡譯審自石城泉敗衄止餘八百精勇者公得其情乃分爲
掎角勢列五百騎爲左右翼縱百騎登高峻疑之旣遇賊夾擊轉
戰逾九十里阿台亦窘死西土遂寧捷聞遣中官齎綵段白金宴

勞封奉天翊衛推誠宣力武臣特進榮祿大夫柱國定西伯食祿千二百石給世襲誥券追封其曾祖三公祖八公父從龍皆定西伯曾祖妣楊祖妣杜妣程皆伯夫人留鎮甘涼四年召還以雲南麓川宣慰思任發屢寇邊六年命公充總兵官佩平蠻將軍印賜蟒袍銀盃甲以行公與總督兵部尚書王驥至雲南眾謂瘴發不宜進公謂尚書曰賊毒吾民甚可坐視耶遂遣兵勦之賊勢稍卻師集金齒分三路進而公與尚書從中路合上江兵夾攻會南風大作縱火四焚矢石俱下如雨公乃擐甲鼓勇而前賊大潰斬首十萬餘級江流盡赤移屯騰衝賊據木籠山爲連環七寨又驅象爲陣合數十萬人於馬鞍山公悉破之勢如拉朽直搗巢穴蕩無遺氛賊父子僅以身遁凱還詔戶部侍郎王質持羊酒迎犒臨清至則上親慰勞遣中官賜金幣羊酒於家擇日御奉天門設教坊樂部勞平夷功升定西侯三代考妣復封如其爵賊父子既遁聞被繫於緬甸八年命公與尚書下緬取賊仍寵賜以行時緬人數

報送至而潛以金樓船載賊離五十里而不至尚書謂公曰此給我也過江則絕我歸路且瘴癘將發不乘此而翦之可乎於是誘緬人聽賞公則往焚其舟大戰一晝夜其賊首已先去賊子思機發之在孟牙者亦遁去盡俘其妻孥象馬以還破其寨二百餘處焚夷遂平九年還上復親宴勞加祿二百石賜白金百兩綵段十表裏楮幣一萬貫金酒器二副鞍馬一疋以寵異之公之子雄見賊去亟率漢達官軍三十人追殺不及而賊已扼其後眾寡不敵遂自刎沈於江時年二十四其十人亦從之死上嘉其忠勇贈懷遠將軍彭城衛指揮使十二年瓦剌遣使來朝諜者知脫脫不花及也先候使回卽分兵入寇上命公總兵禦之公至境嚴耀威武賊引去召還嘉勞甚至十四年正月二十一日忽感風疾薨於家距其生洪武庚申十一月二十九日享年七十訃聞上震悼罷朝遣禮部尚書胡濙等諭祭前後十四壇及賜齋糧孝布明器等物追封涇國公諡武勇命工部營兆域於榆河鄉泥井里先塋之次

而以其年七月六日葬焉既葬越月而瓦剌復寇遂有土木之變使公在豈遽至是哉其冬以公之孫琬襲爵掌左軍都督府事成化初佩平羌將軍印充總兵官節制甘涼諸軍既而守備南京管中軍都督府事忠毅簡亮克繩祖武而雅好文學達古今事變為時所倚重公葬後二十五年而隧道之碑未立琬狀公勳績來請子雖不獲接公然慕公威望久矣而與嗣侯交且久聞公性淳厚體貌豐偉平居謙退如不能臨敵則奮勇敢前以一當百故起自徒步建立殊勳追封三代列爵五等與國咸休也可不載諸聲詩勒諸金石而使之顯示永久哉公初娶李繼李皆贈封侯夫人子男五長義思足疾以琬封定西侯後公七年卒次即雄次謙次讓次諫女五長適杭州前衛指揮使李剛次適密雲衛指揮使劉容次適後府左都督長子馮泰次適羽林前衛指揮使李秀次適富峪衛指揮使張勇孫男五長璟蚤卒次琬曰琬曰瑾曰瑜女五武強伯楊能會昌侯長子孫璉永康侯長子徐昌遵化衛指揮使張

瑁其壻也銘曰

皇明開天六合重輝繫維蔣公世際龍飛起自淮甸繼奮燕山義旗所指克濟於艱天位既正屢進其職從定交南復征迤北蠢彼元孽擾我邦圻公往禦之西涼以盜藪爾麓邦負固連疊公復勦焉南荒以順爰自左樞超登五爵貂蟬峩峩為時李郭龍章鳳詔三代同封鐵券金書世永彌崇公之忠勇所向無敵三邊之靖式詔帝極茂績方殷公忽長逝天子興嗟有贈有諡有祭有葬有爵有嗣詒孫有謀以燕翼子生榮死哀時孰儷焉公雖云歿遺風凜然榆河之鄉泥井之里琢石刻詞以彰來裔

翼城侯孫公神道碑銘

巖

楊文敏公

榮

世之瓌傑英偉之士遭遇聖明屢建勳績致有名爵老而復能感激思奮竭忠賈勇力效勞勩弘濟艱難其光烈著於當時聲華及於後世者吾於故應城伯孫公見之公諱巖字世家鳳陽之於皇里曾大父某大父某父重四三世皆務本力穡周貧卹患鄉

以善人長者稱母周氏有懿德公生元至正己卯十一月十有一日幼時有術者異其狀謂其親曰是兒不凡宜善視之既長性豪爽膂力絕人輕財好義爲族里愛重元季兵興仗劍歸太祖高皇帝於淮甸在軍中以驍勇聞乙未從渡江克采石定金陵收兩浙自是南取江廣北定中原咸與有功擢金吾左衛百戶調守鳳陽已而升武德將軍燕山中護衛正千戶洪武庚申從太宗皇帝之國於燕公誠直不欺甚見親信藩國之事多委任焉乙亥公引年致政而以子亨代己卯太宗舉義靖難以公宿將知兵特起守通州是歲南兵大至城圍數周起上山臨城攻西門燬樓堞公率眾極力捍禦城賴以完未幾兩軍合戰公操戈身先士卒大呼陷陣士氣爭奮追奔逐北斬馘不可勝紀得饋運船三百餘艘貲糧無算以功升明威將軍指揮僉事仍鎮通州辛巳兵復至攻城益急公勵將士登城力戰矢石交下敵乃退走論功升都指揮僉事壬午春南帥平安督遼東兵十餘萬逼城公語將佐曰彼眾我寡若

城守不出自示弱也不若及其始至而擊之彼必敗亡乃率敢死士數百犯其鋒而城上亦合勢大呼安眾大潰自是無復來攻者是歲夏六月太宗入正大位以通城屏蔽冀方使六師南進而無北顧之憂者皆公之功於是進封奉天翊衛宣力武臣特進榮祿大夫柱國應城伯歲食祿千石給誥券子孫世繼自曾祖考而下勳號階爵皆如公封曾祖妣而下悉贈夫人永樂戊戌六月二十日以疾卒於正寢享年八十訃聞太宗悼念不已命有司給棺斂治墳塋累遣官致祭贈翼城侯諡威武歲十月葬通州東馮家村之原配劉氏封夫人先公卒子男六曰亨曰忠曰旺曰喜曰泰曰榮亨由都指揮僉事襲公爵女二長適武德將軍正千戶徐亨次適昭勇將軍指揮使房斌孫男十五人英傑敬玘貴瑀琳勉斌建禮智綱雲綸英襲父爵早世傑今嗣爲應城伯孫女十四人一適太師英國公男忠一適金吾衛指揮桑華餘幼在室曾孫五人公歿葬二十有二年傑奉公之事行謁予告曰傑賴先祖餘休

嗣膺封爵顧墓道之碑未立無以昭功烈垂不朽乞不靳而畀以文庶後世子孫知先世成立之難兢慎自持不敢廢墜厥家予昔獲侍太宗左右備悉公之勳績有可書者今傑又具述公始終之詳謁請益堅宜不容辭乃敘次於右而系之辭曰
明明太祖順天應人奮自淮甸迅掃胡塵公於是時仗劍來附從多羣雄克用其武功成位升弗究厥施武德之階養銳蓄威太宗龍潛天鑑明德內難構興皇怒斯赫乃張義旗乃舉義師起公於家知公有爲言言通城實國屏蔽命公鎮之邦域之計維公桓桓振我師干士勇民和戰克守完東兵之來其勢十倍薄而擊之一鼓而潰京師既寧四方既平皇命報功顯爵是膺礪山帶河金書鐵券子孫繩繩碩大蕃衍維公之功惟皇之德世其承之有永無斲馮村之原峨峨穹碑用詔後人刻此銘詩

皇明名臣琬琰錄卷之十四

皇明名臣琬琰錄卷之十五

懷遠伯襄毅山公神道碑銘

王侍郎傳

書曰天惟純佑命則商實詩曰維嶽降神生甫及申維申及甫維周之翰是則上天眷佑人君必資以非常之佐然後可以成莫大之功有若故特進榮祿大夫右軍都督山公殆所謂非常之佐者歟按行狀公諱雲字父諱青洪武初隨侍太祖高皇帝平定海內以功授燕山左衛百戶已而從太宗文皇帝奉天征討歷升中軍都督僉事母氏封人永樂元年都督公以疾卒于官公以冢嗣襲任金吾左衛指揮使節隨車駕征迤北功爲諸將先調府軍前衛掌印尋升中軍都督僉事宣德二年奉宣宗章皇帝制諭充總兵官挂征蠻將軍印出鎮廣西先是廣西溪洞猺獞叛服不常數爲邊患公至鎮之以靜煦之以仁嚴號令公賞罰親率官軍與叛賊韋朝列等前後十餘戰臨機應變能以身先士卒故所向無前斬賊首凡一萬二千二百六十九降賊酋三百七十七獲

被賊抄虜男婦二千五百七十九俾各盜家禽虎豹三百四十獻
 於朝築永平等九堡葺宣武等四城勦鋪舍五百一十七由是蠻
 夷懾伏居民按堵天子嘉其功進公右軍都督同知賜紅織金羅
 衣一襲仍下詔獎諭有廉能公正善撫軍民實副委任之語今上
 皇帝嗣位念公守邊日久厥績茂著迺賜以白金綵緞正統三年
 九月二十日公以疾卒于鎮有司以聞天子嗟悼輟視朝一日遣
 官諭祭命工部營冢壙贈公卒之明年二月六日歸葬先塋之次
 墓碑未及樹子俊以疾不能任事白于朝以弟泉代厥官泉乃以
 碑文為請嗚呼若公者可謂非常之佐者矣公姿貌魁梧善騎射
 曉兵略持己以廉慮事以慎甘苦與眾共之故臨戰人皆出死力
 殲強圉若拉朽腐用以保障生民其卒也西廣之人為之立祠塑
 像歲時祭之其得人心可知矣公生某年某月某日享年六十有
 四夫人吳氏金吾衛指揮某之女有懿行子男六人長即俊次即
 泉能嗣其業次璽信義讓孫男三人嵩崑岩予雖未嘗識公然公

名在天下藉甚銘固不可辭銘曰

桓桓虎臣為國之輔夙秉忠誠動遵軌度粵嗣先秩擢長萬人侍
 從龍旗克清塞塵繼握重兵出鎮西廣屹然保障下民是仰恩威
 並著聲勢流聞智超百將勇冠三軍禦侮禽姦綽有奇略號令一
 施聞者膽落榮祿之秩廉正之褒宸章燁燁于以報勞西廣之人
 賴公之佑昕夕籲天祈公永壽天胡不憖遽然而終計聞于朝天
 子忡忡哀卹之典特為優異匪私於公以勸來裔公之義氣炳然
 丹青下則河嶽上則列星我作銘文勒諸神道百千億年永永有
 耀

永寧伯譚公行狀

廣

王侍郎偉

公諱廣字仲宏姓譚氏丹徒河門人也父諱添四當太祖高皇帝
 起義濠梁居戎籍從大夫湯克金壇常州攻取江陰又克蘇明
 等州遂留禦明州收捕蘭秀山以終時公年十四補父籍繼被選
 入補驍騎衛復調府軍為伍長帶刀宿衛誥授詔信校尉燕山中

護衛百戶從征乃兒不花轉燕山左護衛又征驢駒河黑松林朵顏山等處已而從太宗文皇帝奉天征討上知公驍勇有謀命率百騎候東安涿州公生捕得邏卒輒械以聞上益親信遂從攻眞定取永平下大寧還戰鄭村壩以功升千戶又取廣昌克蔚州圍大同鏖戰白溝河攻濟南升正千戶及破滄州戰東昌定州夾河轉藁城進攻順德皆奇功因留守保定升指揮同知尋升指揮使會都督韓觀率兵十二萬來攻公以孤軍晝夜相拒四十餘日糧且盡公齧指裂背左區右畫竟以飛礮擊走其眾升大同都指揮僉事永樂改元營建督運殿材紫金闕七年入見留北京領神機營從上征迤北封神機驍騎將軍由玄冥河追趕本雅失里至靜虜鎮殺敗阿魯台復征擒胡山還守大同十二年復從征九龍口胡騎數萬憑崖而陣勢張甚公爲前鋒以神箭手萬人射傷其眾賊驚潰顛坑冑木死者殆萬計公乘勝揮兩翼以進夾擊之繼以步刀斫其馬足賊大敗去比還上指謂廷臣曰廣之勇智雲長敬

德不足多也升中軍都督僉事有白金綵緞駕馬襲衣之賜且俾中貴護至其門仁宗嗣位升左都督制充總兵官出鎮宣府時冬寒上念公備禦於外遣賜楮幣綵緞卽挂鎮朔將軍印暨于宣宗尤加褒異敕曰念卿總戎攄忠效謀躬勤夙夜有白金綵緞之賜逮今上皇帝旣御大寶敕曰卿祇事祖宗多历年所出鎮邊疆厥績茂著特遣人諭意復賜白金綵緞正統六年以殺勦胡寇功詔封永寧伯七年給誥券意若曰爾中軍都督府左都督譚廣忠實能謹材智有爲事朕皇曾祖於藩邸翊清內難從征北虜克振武威暨事皇祖皇考至於今日鎮守邊方幾二十載屹然長城之固疆宇晏然念勞勤之旣久宜恩數之渙頒今特授爾奉天翊衛宣力武臣特進榮祿大夫柱國永寧伯食祿一千一百石仍與爾誓除謀逆不宥外其餘雜犯死罪免爾一死爾惟欽哉正統九年上閔公年老不忍重勞以事命武定侯郭公往代其任驛召公還未幾而告薨上哀悼爲輟朝一日遣官祭弔申敕有司治葬事王公

大臣咸有祭公爲人長身玉立膂力絕人忠義之氣大百餘戰戰必勝然未嘗妄殺愛人下士恆恐不及士卒勤勤不啻在己寒爲之衣飢爲之食故公之去也人慕之其薨也人哭之咸盡哀公初所統神機兵鮮明晃耀進止有度望見皆曰此譚家馬也上有所指揮亦曰譚家馬至胡虜相戒亦曰慎毋犯譚家馬迨今猶以爲號所得祿賜一不以私贏均爲學舍浮屠老子之宮之用嗚呼若公者雖古之名將何以加茲公生於元至元某年某月某日薨於正統九年某月某日曾祖諱某祖諱某考諱添四皆贈榮祿大夫柱國永寧伯曾祖妣某氏祖妣某氏妣某氏皆贈太夫人配王氏封夫人子男三人長亨襲永清衛指揮使次商次高孫男若干人亨將以九年十月日奉公之柩歸葬保定某鄉之原泣請予狀公行實用乞銘於太史氏某爲公之門下士知公頗悉故不辭而述其概若此云

工部尙書李公神道碑銘

友直

楊文貞公士奇

太宗皇帝初奉藩北京建文中廷臣有因齊藩不法遂建議凡藩國所在更置守臣於是擢張昺爲北平布政使昺日求王府細事將爲不利其史李友直密聞於太宗義師旣舉遂擢用友直友直質樸直諒知無不言甚見嘉獎日益信任出理饑運入嚴城守率以命之殫力竭慮事卒蚤集而咸稱上旨初授北平布政司右參議旣建北京改布政司爲行部升左侍郎時初作宮殿營繕務殷專經度提督躬任勞勤蚤莫弗解改行在工部侍郎仁宗皇帝臨御嘉念舊勞升行部尙書奉命代祀周文武成康陵及秦愍王旣還言關中民瘼深見嘉納賜誥命并追贈祖考妣請告焚黃遂立碑於墓以侈上恩昭先德宣宗皇帝嗣位改行在工部尙書嘗奉命董采殿材於蜀設施有方撫綏有誠勞者不怨自是朝廷凡有興作重役悉以委之其臨事有條理而體卹下情所行悉公是以人從事集訕誹不興而屢承勞錫焉友直字居正爲人坦夷闔敏雖不與物競而持己正直亦不屈於物有恤人之心施濟弗悛與

人言必歸於忠厚有之官往辭公者必勉以愛民之政與人交憫
款緩急率得其力度量有容屬司之貪詭者以公長者數欺慢之
公雖知弗校清議以是益重公春秋七十而卒正統三年某月日
也計聞上賜祭命工部營繕葬禮部賜祭公卿以下皆往祭之李
氏之先隴西人元季其曾祖山徙保定清苑自是以來皆隱處不
仕而篤於善行祖彥名考人義皆贈資善夫夫北京行部尚書祖
妣臧妣杜皆贈夫人妻某先十七年卒繼劉及王皆勤內助子男
三昉暉暘孫男四曾孫男四諸子將捧匱歸厝清苑先事昉奉吏
部尚書郭公所述事狀詣予請文於神道之碑余嘗先銘其先塋
矣然與公同事四朝雅相好相知故不辭爲敘而銘之銘曰
遙遙隴西李所自來徙清苑屬元季曹穰之鄉柳莊里士剛水清
毓和粹絲曾大考暨祖禰積仁累厚襲休祉式生居正用奮起據
厥純誠事藩邸義旅之興殫勞瘁高城浚池固根底聯車連轡給
饗餽左馳右驅效謀智乾坤既正廓氛翳煌煌天寵峻祿位藩垣

超陟冬卿貳冬卿申陟極所至持身涖務嚴劾愆肅肅在公靡怠
易執信秉仁處當義卹窮矜鰥急施濟量度恢豁內昭晰有詭罔
之弗校計恭事四聖誠一致七十全歸行靡愧必有紀述垂後世
故鄉之墳歸率制疇其銘者太史氏

禮部左侍郎李公墓志銘

嘉

楊文貞公

士奇

宣德七年十月十五日禮部左侍郎李公卒於家計聞上遣官賜
祭師傅六卿而下皆往弔祭卜明年某月某日葬縣某鄉某
原其孤粟以治命奉翰林侍讀苗君衷所述事狀來拜請銘禮部
尚書毘陵胡公申爲之言予與李公同事三聖凡三十年乃按狀
敘而銘之李之先居平湯之臨汾大父諱仲智父諱思魯元季隨
兄希賢宦游燕都遂占籍宛平縣而公生焉公諱嘉字允堅天資
凝重不妄言笑自幼卓卓有立志事親孝稍長縣大夫選邑學弟
子員前大學士董公倫時爲學教諭公從受業旦暮自策勵所授
書率誦讀數百過四書注釋雖老不忘已而念家貧親老丐罷歸

侍養為師者初惜其去遂獻詩達意其辭懇切師憫而從之後選奉祠所禮生事太宗文皇帝於藩邸敬恭祀事恆致其誠無幾丁父憂哀毀動人終喪不飲酒食肉覽父手澤未嘗不流涕而養母愛敬兼盡初世父希賢死於兵無子倉卒藁葬公念及輒悲竟卜吉壤備禮而葬焉文皇帝靖內難預效守城勞時南兵逼城城外民有負母入城無所依者公避舍以處之且食之粟民母子得全於急義率類此內難平錄守城功召至南京有司奏授鴻臚寺序班數月上親擢為通政司參議且面諭之曰以爾誠實故擢真要地必勤必慎毋忝朕命公益盡心乃職一日奏事畢自陳臣有老母在鄉里無兄弟侍側願躬迎母就祿養從之既至時初建北京奉命董運木之役於河南殫其智慮夙夜不懈後喪母哀毀如喪父詔賜棺及驛舟歸其喪服闋仍前職遂扈從北狩自是巡狩皆預扈從後坐累左遷鴻臚寺丞仁廟御極升左通政使又坐累左遷未行上嗣大統復通政使改北京行部侍郎念其老不堪繁務

又改禮部侍郎公雖精力日衰猶勉強事事未嘗少閒再歲以疾聞賜敕衰諭命致仕又數月不起享年七十公持身端謹一芥不苟取予剛方嚴毅人不得干以私其任職細務必親故所歷寡合終不為變治家整肅教子孫必務學而閑暇道說國初以來北京名賢故老流風餘韻娓娓不窮聽者忘倦蓋自是能知而言者亦鮮矣其歷任散官自將仕佐郎積至通議大夫以公貴再追封二代大父父皆至通議大夫禮部左侍郎大母吳母榮皆淑人追封故妻蔡封繼室趙皆淑人子男四栗直剛簡孫男四震謙泰巽銘曰

嗚呼李公有孝有守遭逢龍興陟帝左右剛毅之資自信弗疑顯顯以持莫之或移納言之司宗伯之貳歷年三十終始一致白髮蒼顏鞠躬竭誠三聖在上天鑒孔明奎章龍文奉敕歸第象笏朱衣里閭迓拜從容優游以壽考終綸音及門寵光隆隆嗚呼李公生死榮哀勒銘其藏永示後來

兵部尚書兼詹事公墓碑銘

忠

楊文貞公士奇

永樂十三年四月十五日兵部尚書兼詹事府詹事金公得疾明日強入朝退疾劇又明日卒公世鄞人自少慷慨闊達負氣義壯遊京師遂遊齊魯趙魏以達於北京居北京二十年上初舉義靖內難布衣入見署紀善遂從征伐明年署長史又明年升工部侍郎永樂二年升兵部尚書兼詹事府詹事公事上敬慎小心每被顧問知無不言退未嘗泄以是益見禮遇而委任益篤焉轉導儲君以正直自持言無不盡尤見優待遇同列論事徑情直發不肯持兩端依阿而虛己服善沛然如決江河注之海也兵部機務繁劇公嘗推讓同官之賢能或一事失當則必自引咎人有片善必稱之雖有素與公異意者其人有他善未嘗不稱也里人有數窘辱公公爲尚書時其人補吏來京師懼不爲容公薦用之或曰彼不於公有憾乎曰顧其才可用奈何以私故掩人之長尤好獎掖善類士有得一官而往見公者必戒之曰國家待士厚所望爲民

造福耳所至一以濟物爲務聞人出片言語涉暴刻輒艱然色變可謂公直慈厚者矣襟懷坦夷神情灑落政務之暇朋徒往來酒一壺棋一局詠歌談諧相得也事兄世華盡恭撫兄子如子篤交誼朋友卒其子無依公爲長育之亦有長育之而爲之娶婦者其他賙貧乏恤喪葬所濟尤多博於史學每論當時成敗治亂之故娓娓千數百言不竭其源委折曲歷歷如身親覩之者享年六十有三初病且革尚書蹇公侍郎盧公往候之問所欲言公曰命至此何言獨念忠始以一夫見上歷數年位列六卿寵極貴盛而未嘗效分寸之報忠卽死能瞑目哉已而顧其襁中兒謂二公曰忠不能報上恩矣士奇必志上所以寵我者銘我庶幾兒長而或有知也計聞上爲文祭之有曰殫竭心膂克勤夙夜小心慎密始終無間皇太子爲文祭之有曰能盡乃心知無不言助益多矣又曰老成忠厚方資之爲輔而遽沒焉嗚呼觀公君臣之際始終一德生榮死哀何其盛也公諱忠字世忠祖漢考文英以公貴皆贈資

政大夫兵部尚書祖妣樓氏妣馬氏皆贈夫人娶余氏封夫人子
男一達公沒時達生始六月明年六月兄子復初奉公柩歸葬鄞
之某鄉某原士奇素辱公知義不可辭故敘而銘之銘曰
神龍御天雲翕從之千載之會時惟昌期金氏之先宅於東浙世
篤善仁蓄涵未發如種必穫迨公奮興明良相逢助自北京奉天
靖難公侍幃幄寅恭慎密畀以心腹邦國載靈榮秩顯命爰貳冬
官遂掌邦政遂輔儲君宮臣之首公德多有公存孔厚古之君臣
有終不常偉公之終隆隆寵光難名如天維帝之恩公沒惓惓庶
其後人鄞原之墳湖山鬱盤歸焉斯藏永永其安

新建伯榮僖李公墓志銘

玉

楊文定公傳

公李姓諱玉孟輝字也先世居真定之曲陽至考士中徙河間交
河今為交河人高祖誠曾祖德榮志田園不求聞達祖雄元上都
萬戶士中有孝行樂振施以醫藥濟人所治輒效未嘗責報鄉人
德之皆以公貴贈中軍都督僉事曾祖妣祖妣皆贈夫人母趙氏

封夫人公生而英敏異常兒甫成童代父戍營州洪武己卯太宗
皇帝舉兵靖難自大寧歸附從征所至皆捷若鄭村壩白溝河東
昌威縣夾河藁城靈壁大戰皆有功隨駕至淮渡大江入南京及
扈從北征至玄冥河追殺胡虜本雅失里由靜虜鎮出廣漠成敗
阿魯台湖州草寇嘯聚奉命率南京軍合陽武侯所統軍討平之
上每北征皆扈征嘗命總後營宣宗皇帝征武定州總軍扈征北
還命守彰德復命從征兀良哈亦預有功公起行伍以奉天將士
由總旗升百戶再升指揮僉事壬午冬升真定衛指揮同知永樂
庚寅以殺胡虜功升指揮使調府軍前衛領幼軍隨侍皇太孫洪
熙乙巳宣宗即位念公能升都指揮同知丙午升中軍都督僉事
已酉春進封奉天翊衛宣力武臣特進榮祿大夫柱國新建百歲
祿八百石賜券誥是冬奉命往陝西明年往湖廣改調西安武昌
護衛正統初命總禁軍公歷仕四十年小心敬畏受知列聖金帛
甲冑器皿諸物恆有賜賚而能約以自處人以是多之辛酉夏以

疾告命太醫院給醫藥疾亟自序遭際恩榮愧無以報遺訓子孫
永世無忘八月庚午卒壽七十三計聞上嗟悼輟視朝一日遣禮
部尚書胡公諭祭於其第敕有司給齋糧麻布治棺塋葬追封新
建侯諡榮僖配趙氏封夫人相成厥家族里稱賢子男七長英次
源先卒次海次賢次良次某次某女二長適府軍衛百戶范達次
在室孫男十二曰奇曰信曰佐曰某曰倫曰儼曰健曰偁曰某孫
女三皆在室曾孫二曰政曰某卒之年某月某日葬懷柔縣某鄉
某原英奉中書舍人張弘所述行狀請墓銘銘曰
維公展也多才詡歷事四朝勲日著厚祿榮封申眷顧貂蟬光接
夔龍武越昔駿奔義旗舉風虎雲龍千載遇玄冥河北廣漠成瞻
望白旄殲醜虜歸侍東朝司禁旅有偉其休約以處全而歸之有
遺裕爵諡哀嘉駢錫予子孫振振保厥緒懷柔之原良膺膺千百
億年安以固

豐城侯茂國剛毅李公神道碑銘

楊文定公

公諱彬字文質姓李氏鳳陽定遠人父信善騎射少從太祖高皇
帝征伐以戰功累官明威將軍濟川衛指揮僉事後以老疾致仕
公方弱齡補父官卽於老成人上下交譽之洪武庚午率所部兵
從潁國公征北虜歷朵顏鴉兒諸山追襲虜酋阿劄失里至洮河
兒獲人馬數十復歷黑嶺寒山諸處至熊皮山追襲虜酋兀刺罕
時太宗文皇帝居潛邸聞公智勇深嘉賞之明年遣公巡視宣府
興河保安隆慶懷來諸邊城尋以公父信爲遼東都司都指揮使
癸酉命公率兵築宣府德勝口城巡視邊關明年復命公率兵築
萬全懷安城又明年命公率兵征哨呢河營黑松林諸處至哈刺
之地乃還胡虜遠遁庚辰文皇帝舉兵靖難命公率兵攻薊州遵
化克之以功升指揮同知又攻雄縣莫州克之升都指揮僉事復
克大寧城又克敵於鄭村壩克廣昌蔚州大同諸城明年夏於白
溝河大戰以功升都指揮同知進克滄州壬午於滹沱河單橋藁
城諸處克敵追至彰德出哨定州升右軍都督僉事又於楊村交

戰被鎗上卽遣醫視之資子優厚俾還北平公奏曰臣本戰士豈以微傷自餒願隨軍效犬馬之力上不允命輔世子守城癸未命公率兵護中宮至京師永樂甲申上以四方旣平乃論功行賞念公之勞諸多封奉天靖難推誠宣力武臣特進榮祿大夫柱國豐城侯食祿一千石子孫世襲自是委託益重乙酉命鎮江西丙戌命巡阜君山丁酉命征交趾有功加祿五百石己亥勦平東海倭寇庚子督操江尋命往長沙討賊李法良獲之辛丑命捕福建海寇癸卯命佩征虜前將軍印總兵守甘肅大振軍威胡虜讐伏丁未隨駕至京命佩征夷將軍印總兵守交趾遠人莫不仰德畏威南陲晏然在鎮六年以疾卒時永樂二十年正月十五日也交人莫不罷市巷哭其德澤及人深矣計聞上爲之震悼輟視朝一日加賜賻儀追封茂國公諡曰剛毅遣官諭祭復追封三代祖考皆上公妣皆公夫人子男四人長曰賢故嗣封豐城侯次芳次恭次禎孫男三人長曰勇今嗣封豐城侯次鉞嗚呼公以武士遭遇龍

飛之運乃能建勲庸胙茅土東征西討迨無寧歲可謂國之勞臣矣是豈可以不銘輒因勇之請序而銘之銘曰

桓桓李公慶時之逢奮武揚威克效其忠統其父兵所向無敵長驅虜巢左右搏擊胡塵旣清武備是營飭彼邊城大振軍聲靖難之師惟公義勇奉戴眞人不震不悚通侯之爵帝寵是加世澤之延與國無涯公復何心殫其智力奉命周旋曾不少息或鎮邊方或殄強梁意氣之盛泰華軒昂終於炎荒葬於畿土史臣勒銘光照千古

日鎮江城中皆庸夫可取也遂導眾攻其城克之授百戶從攻常州宣州皆克之簡充旅正還從克江陰從寧河王克通州升千戶攻雙刀趙於樅陽攻安慶江州池州興國諸山寨皆下之庚子敗陳友諒兵於龍江公得其戰艦及馬特賜白金友諒退仍據安慶江州公隨大將軍悉復之並得其八陣營諸寨從克南昌援安豐敗元兵進攻廬州從克武昌荊州衡州從開平王下襄陽還取泰州留守興化從中山王破舊館克湖州蘇州洪武元年升堅城衛指揮僉事二年領軍克信陽唐光四年從臨江侯取西蜀道遇敵公手殺敵百餘人生禽二十餘人進攻羅江生禽其僞元帥及其下二十餘人悉送軍門斬以徇入漢州僞官戴丞相向知院者盛兵迎戰公揮眾奮進戴向皆狼狽還走追北至成都圍其城竟降之蜀平調成都後衛總帥以公守之六年率兵赴重慶禽妖賊王玄保及僞萬戶李邦祖等八年調貴州衛明年襲傍等山寨蠻寇叛公率兵討之斬首百餘級俘獲人馬尤眾夷懾服叩首請歲納

租賦公從之其避遠山峒有負固未下者次第平之已而羣夷叛服不常公連歲出兵平之前後俘戮不可勝計十四年從潁川侯征雲南率步騎兵爲前鋒首克普定留公守之且爲後繼公部將士樹柵以守明年公出兵克西堡於是諸蠻合數萬攻圍普定諸將皆欲出戰公持不可曰賊眾我寡一出卽爲賊所窺必俟其攀柵乃出賊及柵公披甲上馬出北門率戰士奮進手殺賊騎之迎戰者十數人賊眾引卻諸將遂乘勝出東門西門戰敗賊眾時南門之圍未解公取所生禽者十八人斬之而縱其一人歸曰吾以夜一鼓及殺爾矣及期賊聞官軍舉銅角銃礮皆惶懼奔走圍悉解獲賊甲兵無算時有中使在普定見公勇略絕羣還奏特遣賜龍衣金帶升世襲指揮使凡普定所隸諸蠻公悉平之十七年平阿黑螺螄等十餘寨及降尾灑蠻酋馬乃之眾西堡蠻攜貳復平之廿一年總戎檄公討平乖西扒古里谷勞金網等寨遂禽關索嶺首賊葛蓬及叛寇阿束皆誅之士官阿宗叛焚劫驛舍乘虛將

攻公勢張甚時官軍精銳悉駐東川公率餘眾及士兵深入賊地據關口屢敗之賊既遁眾以暑瘴非士卒便欲退師公不聽未幾賊黨殺阿宗降遂奏革普定府而黜其守之懷二心者建兵衛以屬其民析其地爲州三長官司六而公統理焉自是公悉意撫綏大布恩信諸夷響服廿五年夏入朝賜文幣二十有副鈔三千貫白金四百兩日錫宴會同館升鎮國將軍貴州都指揮使司同知公至貴州首征康佐叛蠻破阿老諸寨峒廿七年平都勻豐寧西梁瓦材等寇斬首萬四千餘級俘生口三千八百有奇而撫其良善二十九年升驃騎將軍右軍都督府僉事官其長子統普定衛指揮使是歲命公佩征南將軍印總兵征水西叛寇生禽逆首敬德斬之餘寇悉降三十年五開蠻反公率兵■臻剖大峒悉破之進剿天柱天堂春花金井蒲頭大小坪等生苗及螃蠯米毫灣溪萬湖等寇皆破之三十一普定西堡及貴州光金谷勞■里金石番羨唐諸夷復叛公次第親行誅其叛首而撫其餘眾既歸

明年高廟上賓及明年太宗文皇帝靖難之師起北方公受命往禦至眞定靖難之師繫公以獻文皇識公先朝舊人解其繫與之語曰豈非皇考之靈以汝授我乎因語以不得已與師之故言已泣下公亦泣遂遣人護送北京令輔仁宗皇帝居守時姚廣孝奉命輔居守有腹心之寄姚素不習兵事與公議多不合會南兵圍城仁皇於軍旅調度恆從公言城中文武之臣競進曰顧城南將其中叵測不可專任然公所言計皆合機用皆有效數命公出將兵固辭曰使臣侍左右日陪論議得效分寸足矣賜公甲冑刀劍弓矢皆不受南兵敗圍城卒以敗去者多用公謀也洪武三十年九月論公功賜號奉天翊運推誠宣力武臣特進榮祿大夫柱國後軍都督府右都督封鎮遠侯食祿千五百石子孫世襲賜鈔三千貫白金一百兩綵幣三十四幅遂賜誥券是冬命公鎮守貴州蓋以公威信素行於彼云永樂元年春至貴蠻夷聞公至歡趨出拜叛者皆歸境內靖寧公上書論大計謂國家宜早建儲以正名

分北邊官軍有功者爵賞既定宜制以禮法降敕褒答賜鈔五千貫綵幣八加副申賜鈔萬貫白金二百兩綵幣如前三年賜誥追封三代考皆鎮遠侯妣皆侯夫人永寧士官宣撫爲其弟謀殺致其下亂公執其弟送京師罪之而從土俗奏以宣撫妻襲職其眾遂靖六年車駕將巡狩北京豫召公副儲君監國既至上慰勞再四且諭所以召公之意公言皇太子仁厚恭勤明達足任付託且左右文武之臣其智識深長皆非愚臣所及蠻夷今雖帖服小有競爭卽持兵爲亂愚臣非敢決意去留惟陛下命之上忖知公章嗟歎累日賜鈔四萬貫白金二百兩綵幣三十有六副命還貴州陛辭退辭文華殿曰殿下於事君父恤兵民素行有誠惟於小入當寬度外萬事有天理不足計蓋是時懷奪嫡志者不樂公在京師公燭知故先幾引去也時上官奏欲爲公建生祠從之公之赴召也播州貴州蠻作亂公歸遣子勇率兵勦之悉平時思州臺羅等蠻亦亂公遣人諭其酋普亮卽服於是公病事聞遣醫馳視竟

不起春秋八十有五公自少壯履行陣挺身戰鬪奮勇無前雖身被十數創不稍引卻必致俘馘見功效深於籌略料敵制變百不爽一於謀國事明大體不瑣屑細故竭誠奉公至老死不倦諸葛公所云鞠躬盡瘁斃而後已者公蓋有焉朝廷旣追封公並追封三代考皆夏國公妣皆夏國公夫人元配彭氏再追封夏國夫人繼室穆氏李氏子男七長統先公卒洪熙中以其子貴追封鎮遠侯次銑次銓次銳次勇累官貴州都指揮僉事次亮次源孫男九興祖襲封鎮遠侯效用三朝克繩祖武凱再興惠旺興能貴州衛指揮同知先卒琮琦玳曾孫男六玄孫男一至是興祖具事狀屬士奇書神道之石士奇永樂洪熙中官翰林日侍二聖實聞公事故不辭敬次第書之而係以銘曰

大明奉天肇迹淮土公奮從龍來歸皇祖金戈鐵馬桓桓四征鏗暴鋤疆疇之敢嬰函夏旣盜報功錫命崇爵豐祿往綏南境逃彼南境毒虺妖狐憑阻弗馴跳蹶嘯呼公奉天威霆驅電掃夷藪室

穴屢征乃安乃登督府乃衛禁垣居無幾何遄北其轅天其祐公
俾作皇輔惟聖知公曰時舊老明明二聖任公心腹蓄疑盈庭公
任愈確公不尤人公處有道秉誠執恭謀猷屢告卒底厥功爲報
益隆金貂玉輦亞於上公帝謂爾成予懷南徼汝往申撫公拜奉
詔夷獠迓公父母歸止焦者以需什者以起孰其悖凶敢干刑誅
小者禽俘大者戮屠公身在外心存廷陛匪函有陳皆國大計當
止聖明嘉公忠言寵賚華褒誕降自天國有老成謂宜百歲曷不
憇遺營星奄墜雄蓋萬夫智名勇功公福簡簡哀榮始終慶澤之
貽縣縣來嗣篤念先祖祇於世世

祿

楊文貞公 士奇

宣德五年五月太保陽武侯薛公奉命城隆慶永寧赤城獨石竣
事將歸以疾聞上遣中官以御醫往視且賜敕諭勞至京猶力疾
入見上慰諭再三既歸第復賜御藥遣中官臨問無幾竟不起七
月廿三日也計聞上震悼爲文祭之追封鄴國公賜諡忠武詔有
司治喪葬凡喪葬之儀皆優等蓋特恩云公諱祿姓薛氏世家山
東膠州之新興社曾祖考諱安妣劉祖考諱大妣金考諱遇林妣
張公兄弟六人公第六自少傑特有大志未冠籍戎伍上官皆奇
之從北征金山及哈喇哈之地又從征迤都山乃兒不花等處自
是屢出西北二邊涉萬里而還太宗皇帝舉兵靖內難公首從義
旗攻九門克薊州遵化援密雲攻雄縣追敵漠州咸奮勇先驅以
一當百戰真定公生禽敵左副將軍駙馬都尉李堅超升燕山右
護衛指揮僉事賜白金文綺從援永平攻下大寧富峪會州寬河
時南兵已圍北平城公還先遇其哨騎薄戰敗之車駕繼至從戰
鄭村壩敵大敗升指揮同知從克廣昌蔚州大同率兵前哨獲敵
人馬遂從南征大戰白溝河追奔至濟南升指揮使從克滄州大
戰東昌公以五十騎前哨遇敵兵數百與戰敗之獲馬三十餘疋
敵悉眾來追公復奮戰大敗之獲馬二百餘疋敵於威縣及深州
伏兵以要旋師皆擊走之從戰夾河大捷戰滹沱河右軍力屈公

率眾馳赴之出入敵陣數十合戰敵敗走公追至夾河斬馘無算
獲馬五百餘匹明日戰卑家橋公馬蹶為敵兵所得拔刀斬敵兵
復上馬督戰遂敗敵將平安軍以次攻下順德大名彰德及攻西
水寨公生禽敵都指揮一人斬獲尤多從攻東阿東平汶上皆下
之繼戰泲河大店小河泃隄靈壁率勇先諸軍遂渡淮渡江從車
駕入京師太宗皇帝為臣民推戴既正大位論功行賞升驃騎將
軍後軍都督府都督僉事以其官秩贈三代永樂六年升都督同
知八年從車駕北征至玄冥河以功進榮祿大夫右軍都督府右
軍都督兼左軍都督府事以其官秩加贈三代時四方選至幼軍
數萬悉命隸公操習十二年從車駕北征十五年初建北京宮殿
命公董營繕十八年成加奉天靖難推誠宣力武臣特進榮祿大
夫柱國封陽武侯食祿千五百石追封其三代皆侯爵賜誥券二
十一年從車駕北征是年八月仁宗皇帝嗣大位加公太子太保
子孫世襲侯爵奉命北巡邊適虜寇雲公率兵追至大松嶺斬獲

甚眾事聞賜敕嘉獎遣中官及鴻臚卿即軍中勞之既還賜白金
鈔幣加歲祿五百石洪熙元年佩鎮朔大將軍印率師巡北邊宣
德元年庶人高煦反車駕親征命公為前鋒先二日圍其城罪人
既得留公撫綏城中軍民還賜銀幣甚厚明年秋從車駕巡邊出
會州解后虜寇塞下與戰敗之生禽其酋斬獲其餘眾遂鎮薊州
永平冬還賜銀幣加厚四年率師護兵餉開平者再五年春佩鎮
朔大將軍印巡邊至奇黃嶺遇虜拒戰悉斬之盡收其家口孳畜
升太保賜鈔幣居三月董築城之役蓋從公之言以便戍守公平
居無事未嘗忘危每計邊務言之亶亶或謂其屑屑者終不為變
蓋其志奉國惟恐不盡為將勇智兼備常先事籌畫用心之至以
夜繼日故所嚮成功未嘗敗北間一二臨陣中矢石裹創赴鬪有
進無退其率師所過紀律嚴明秋毫無犯而撫卹士卒人人歸心
若董繕作規置有方力不煩費功率堅久人亦罕及蓋一代之興
必有一代之臣公祇事三聖涉歷多用志篤鞠躬盡瘁以效臣職

故能建功國家流光簡冊致身富貴垂慶後昆其非古名將之流而今之不可多見者歟公壽七十有三其配李累封至侯夫人子男三以是年十月三日葬公於某鄉某原銘曰

明聖之興有命自天必有輔翼名世之賢氣機翕會雲龍風虎有勲有烈左文右武桓桓薛公始奮從義大呼迅馳金戈鐵騎智明幾先勇蓋萬夫疇其膺之折朽摧枯宗社載安功書冊府在帝左右股肱心膂公於事上一誠不貳知竭臣職死且無怠公於馭眾有紀有綱撫於春和令如秋霜歷事三聖麟衣蟬冠廷有老成國有屏翰丹書鐵券傳襲來裔公如長城曷不百歲英靈升遊九原在此太史作銘式昭無已

永康侯蔡國忠烈徐公神道碑銘

忠

楊文貞公士奇

公諱忠字仲達姓徐氏世家廬州之合肥父諱用元季守宣城我太祖皇帝兵至宣率眾歸附命仍其職遂從征討以功實授管軍百戶從守南昌進武略將軍河南衛千戶洪武壬戌自陳老疾

命公代之丁卯從征北虜至哈喇哈之地還城大盜無幾調大寧備禦戊辰從征金山之虜之為邊患者屢戰敗之獲其馬牛輜重賜白金鈔幣庚午運兵饗數十萬斛赴溫口兒不花大敗虜眾俘獲其人口萬餘總兵遣公護送入關公悉心撫卹俘者如歸升濟陽衛世襲指揮僉事乙亥城懷安萬全丙子率兵從征北虜至驢駒河而還丁丑往鎮開平己卯太宗皇帝舉靖難之師公首從義旗克密雲克雄縣真定取永平克大寧還戰鄭村壩取廣昌薊州戰白溝河皆奇功進攻濟南克滄州大戰東昌及夾河攻彰德破西水寨克東阿東平汶上大戰靈壁遂從渡淮及江至京師公臨戰奮勇百夫莫當出入敵陣率在眾先白溝之戰敵揮刃斫公兩指未墮公自斷指擲地裂衣帛裹創仍奮進戰其馭士卒撫卹誠至人人歸心而號令嚴明所過無擾上行師恆飭諸將無妄殺曰吾奉天弔民厲民違天何望有濟公承命顓顓惟執兵迎拒者不容而誘諭招徠緩撫附降多效力焉其以功進官指揮

同知歷都指揮僉事授奉天靖難推誠宣力武臣特進榮祿大夫柱國前軍都督府左都督永康侯食祿千一百石子孫世襲賜誥券追封曾祖六二祖七九及考皆永康侯曾祖妣陶祖妣王妣張皆永康侯夫人永樂己丑暨癸巳車駕巡狩北京仁宗皇帝監國上以公敦厚老成留之南京兵政一以任公公小心寅畏清靜簡易上下咸宜之一日夙興盥櫛衣冠坐都督府得風疾遽卒癸巳八月二十四日也上在北京聞訃震悼輟視朝一日遣官賜祭給賻命有司治喪葬追封蔡國公諡忠烈追封其三代皆蔡國公妣皆蔡國夫人配亦蔡國夫人仁宗皇帝在東宮遣祭賚賜甚厚公沈毅質恪有孝行旦暮出入必先詣家廟事繼母敬愛兼至小有訓責必跪受雖貴不變所得上賜必謹視之約己守法未嘗有過接人謙恭和氣滿容語簡而誠洞見底裏春秋五十有二而卒卒之歲十一月二十七日葬江寧縣安德鄉長岡之原子男二安山壽安襲侯爵安奉國子祭酒貝公泰所述事狀求文刻神道之碑

士奇與公同朝十有餘年後同侍監國相厚知公之行加詳故為序而銘之銘曰

桓桓徐公為時虎臣襲家之勲奮武以振天啟聖明義旗爰舉挺誠來從股肱之輔皇麾所指公迅前驅誰抗誰禦拉朽折枯神武不殺公行聖志來迓來歸撫綏勤至仁施如春義行如秋公實左右威懷並流跪跪既安氛翳咸廓宗社再隆褒功命爵悃悃無華厚重靡遷貂蟬充庭孰愈公賢鑾輿北狩聖儲監國峙武以衛孰優公德肅肅小心温恭靖嘉巋焉老臣為國之華維孝維忠在公允蹈宜貴宜富曷不耆耄都門之南聿崇起墳過者下車眎茲刻文

平江侯恭襄陳公神道碑銘 瑄 楊文貞公 士奇

太宗皇帝初自北藩靖內難至江上都督陳公瑄具兵迎濟內難平上正大統錄功賜公奉天翊衛推誠宣力武臣特進榮祿大夫柱國封平江伯賜誥券陳氏家合肥公字彥純自少穎敏不凡好

善惡惡內篤孝行洪武中侍父官成都習兵略精騎射以武臣子
選侍大將嘗從出郊遙望孤鴈雜鵝羣命眾從者射不中最後命
公發一矢斃之有鴟翔於上命公射應弦而墜自是屢試皆奇中
眾大服而公不自爲能朝廷命總兵者作蜀府宮城遣將伐材於
山所行失律且材不中度又所經瘴地士多死總戎察公可用遂
命之公善撫綏明號令別取善道七百里以入先期而還士不病
所得材皆適用總戎者嘉之又命董繕作具有條理遂從征南番
巖州中亭及散毛鎮南咸建勞績代父職爲成都右衛指揮同知
父坐舊累謫戍遼陽公伏闕奏請代行特詔父子並免復職衛卒
數輩饗誑狙詐挾制上下爲眾患公次第悉去之善類以安從征
越嵩討建昌酋長月魯帖木兒踰梁山平天星寨破靈番諸蠻駐
西河口諭降夷人數千從總帥復征鹽井平三山寨及小伯夷進
攻卜木瓦寨據要害立堡以斷賊路官軍分三敵進公居中已而
左右兩隊弗支奔還公所統僅百餘人冒險先登賊數千圍公公

下馬率眾且射且斫賊疲稍卻公亦傷足裹創進戰自己至酉賊
敗走公全所統而還復從征餘寇賈哈刺時寇眾數萬據險以拒
萬卒修之航海至者茫洋莫知所停泊往往膠淺公於太倉相可
泊處以二十萬卒築高邱二十丈延五十里爲表識眾便之稱寶
山事聞上親製文樹碑焉既建北京罷海漕浚濟寧臨清河通南
北往來仍屬公董餉運公建議造淺艦二千艘初歲運二百萬石
爲之有方後增至五百萬石國用以足若疏清江浦引水由管家
湖入鴨陳口達淮以免淮河風濤之患就管家湖築隄五十里以
便引舟浚儀真瓜洲二壩湖港之漕鑿呂梁徐州二洪石以平水
勢築沛縣刁陽湖濟寧南望湖隄開泰州白塔河通大江築高郵
湖隄隄內鑿渠互四十里以通舟南北造梁以便陸行自淮至臨
清相水勢高下建牖四十有七以時啟閉皆舟楫通行永遠之利
於淮濱作常盈倉五十區以貯江南輸稅於徐州臨清通州皆建
倉以便轉輸慮漕舟昧河深淺自淮抵通州濱河置舍五百六十

殆盡寇以殺溺死者甚眾奉命率舟師於閩海備倭寇者三海溢
珊沒隄岸起揚之海門悉通泰北至鹽城凡八百里奉命以四十
奪其險明日復力戰凡七合寇大敗遂入其壘簡銳卒出哨令望
見前軍旌旗即舉礮俾知已敗寇仍遣五百軍斷寇走路寇窮出
降械送賈哈刺於京師撫邊夷兼理茶馬之政邊人悅戴灌口都
江堰壞民苦水患公修其隄防躬督工作為堅久計矜卹無告出
貲置義田二百畝於成都積所入租凡貧不能衣食不能婚嫁及
死不能斂葬者皆給之會雲南兵征百夷以功升四川行都司都
指揮同知遂進右軍都督府都督僉事太宗皇帝知公才可任時
北京軍儲不充命公歲董運百萬石道海給之公措置井井勦建
百萬倉於直沽尹兒灣城天津衛籍兵萬人戍守公善任使均勞
逸秋毫不取於下凡漕途姦弊掃滌一清漕舟所經海島夷人畏
憚官軍悉閉匿公下令俾出為牢而遣官監臨平其直軍無敢譁
人兩便之舟還值倭寇劫沙門島公率眾追至朝鮮境上焚寇舟

於淮濱作常盈倉五十區以貯江南輸稅於徐州臨清通州皆建
倉以便轉輸慮漕舟味河深淺自淮抵通州濱河置舍五百六十
八所舍置卒俾道舟可行處緣河隄鑿井樹木以便夏月行者凡
於事慮之周而為之果仁宗皇帝初臨御下詔求言公首言七事
大概謂南京國之根本宜為久遠鞏固之計選將益兵以嚴守備
長民長兵皆宜擇賢能然後政舉而下不失所賢能在推舉推舉
在覈實乞選朝臣之公正者分巡天下考察百司政事得失進廉
能黜貪鄙則官得人而治可興今府州縣學教官多不得人乞令
風憲考察罷黜別選今中外軍伍多缺蓋由所管頭目私役擾害
不勝致其逃逸乞敕都府兵部都司嚴切禁約就行清理老疾者
令戶丁代逃逸者責限追捕戶絕者驗實除豁伍籍又邊防之要
在兵食足近歲如開平等處城不足兵兵不足食所守何由完固
乞選武臣之有方略者授以精兵足其衣食給之堅利器械俾日
教習如有沃壤令兼務耕守令漕運惟江西湖廣浙江及蘇松諸

郡去北京甚遠漕河又有洪牖淺凍之阻往復踰年雜費數倍正糧上逋公租下妨農務乞自今令運於近便淮安徐州等處收貯別令官軍運至北京則民力可蘇農務不妨各處官軍每歲漕運畢財力殫乏到家又修理壞船運來歲糧勞勤可憫其所管頭目又加別役以重困之乞行禁約今後漕運軍士不得再有別役馬船快船惟二三百料者可行於漕河所載不過五六石每船已有額設水夫今又於緣河拘集軍民聽候甚至接遞聽候日久衣食艱難有至行丐者乞自今罷之上覽奏嘉歎命有司咸卽施行賜敕獎諭有老成忠愛之誠之哀加之重資賜誥追封其曾祖某祖某考某皆平江伯曾祖母祖母妻皆夫人命子孫世襲宣宗皇帝臨御命公鎮守淮安兼督漕運公至察宿弊之爲民厲者悉革之豪猾奸宄皆斂避境內以寧時已嬰疾而躬勤旦暮靡有滯事疾聞入朝深被嘉勞賜宴資還至淮安無幾復作上聞特敕勞問時子儀在侍衛令挾醫馳驛往侍竟薨宣德癸丑十月十一日

也春秋六十有九計聞上悼歎輟視朝一日追封平江侯諡恭襄賜祭命工部營葬公爲人闔爽英毅弘度偉略稠人廣會談論亶亶倫輩推服公餘披閱載籍考知往古成敗治亂之故喜近逢掖士時相講議善交際能推利爲義所至以濟人爲心多所建置人用德之不忘家有樂善堂恆舉鄒孟氏仁義忠信樂善不倦之語以勉子孫子男五佐襲平江伯後公數歲卒次儼次儀今爲勲衛次倫次侃孫男三裕今襲平江伯葬以薨之明年三月墓在江甯縣大山之原余與公同朝三十餘年相知且好於是儀以狀求著神道之碑故按狀敘而銘之銘曰

繫公挺出何桓桓武兼勇智追前聞材藝夙試卓寡倫峩冠三品承考勲蠻谿獠崗獫狁羣負險弗擾猶且趨公奮掃刮迅祓塵前滌腥穢寧邊民有截譽望齊峩岷歟徵來東衛宸垣遭承興運效駿奔錄勞疏封昭鴻恩貂蟬鞶玉衣繡麟報賜志企古蓋臣單心畢慮靡夕昕滄溟茫洋渺涯津歲漕萬艘奄然臻有梗於海威赫

震斬鯨鯢焚甲鱗崇表海岸互長雲雲章龍彩天垂文南賦北
貢艱以辛踰淮歷濟抵天津疏湮鑿堅劬且勤坦行如砥戚者忻
猗嗟公篤孝與仁厥施諸時績弗泯愛國亦有嘉謨陳功載冊府
被後昆大江之陽歸有墳太史銘之昭不刊

皇明名臣琬琰錄卷之十六

皇明名臣琬琰錄卷之十七

西寧侯宋公神道碑銘

晨

楊文貞公

士奇

永樂五年七月某日推誠輔運宣忠效力武臣柱國後軍都督府
左都督西寧侯宋公終于肅州訃聞天子悼歎遣官賜祭敕有司
給傳還其喪明年夏至京師葬聚寶門外其考之塋之次公諱晟
洪武中所賜名其字景暘宋世家鳳陽之定遠元季我太祖皇帝
龍興壬辰公隨父朝用兄國興來歸明年從克濠州又從戰敗賈
魯父兄並以功授萬戶甲午從張天祐克五河泗州盱眙又並進
總管乙未從上克和州渡江下采石太平總管邵榮等潛有異謀
國興察知以聞榮等伏誅從克溧陽進攻南臺國興戰沒命公襲
兄職丙申從攻陳也先水寨克之遂從克南臺公父升廣德元帥
丁酉隨廣德公克宣州還改廣德公天寧翼元帥以老留建康公
從鄧愈克徽州受功賞戊戌召入侍衛己亥襲天寧翼元帥庚子
調征饒州及江西諸郡以次平賜襲衣文綺命充總兵官平諸山

寨洪武元年克建寧留守禦新定官制實授武德將軍建寧衛正千戶四年升懷遠將軍建寧都指揮使司都指揮同知冬召還升江西都指揮使九年調大同授龍虎將軍十一年調陝西所至治兵撫民不嚴而肅十二年掌涼州衛十三年逐北虜至白城獲其人馬甚衆十五年父病詔公還侍又三年父沒既襄事復鎮涼州虜時數爲邊患公率兵討之追至亦集乃之地斬其凶渠也速兒監等及其衆無算餘悉生繫送京師又招降虜僞國公吳把都等萬八千人而送其酋長工不答而等百五十人詣京師簡其壯者隸卒伍餘悉處之善地俾耕牧自便驛召公還京獎諭再四賜賚甚厚復鎮涼州十九年召還升驃騎將軍右軍都督府都督僉事賜鈔文綺以其官贈其三代仍鎮涼州廿三年夏遣中使就賜白金及鈔至秋復三遣賜鈔文綺授制諭充總兵官征哈密里破之哈密者去肅州千餘里虜所城也誅其僞王子別列法等三十餘人獲虜衆千三百人及金印一銀印二悉送京師所獲馬牛羊

咸給將士二十五年復充總兵官征罕東西番叛寇誅禽七千五百餘人獲馬二千五百牛羊十萬遂還京師二十七年調中軍都督府是歲虜寇遼東命充副總兵率兵討之遇戰腦溫江獲虜衆千餘馬倍之明年廣西幟幟諸寨連結爲亂命充右副總兵往征之誅禽七千餘人賊平還京又明年總羽林八衛兵往平五開龍里十三洞之寇三十一年率師城萬全諸衛歸二年出鎮甘肅太宗皇帝初臨御公朝京師升後軍都督府左都督永樂元年授平羌將軍充總兵官仍鎮甘肅三年虜日益聚近邊公遣人諭以朝廷德意其酋長把都帖木兒倫篤兒灰率部衆五千馬駝萬六千來歸邊境底寧事聞賜敕獎諭命都督徐膺緒尚書趙玘持節卽軍中封西寧侯賜推誠輔運宣忠效力武臣柱國仍後軍都督府左都督食祿千一百石加賜田若干頃又二年以疾終享年公曾祖贈官妣某氏贈夫人祖及考皆再贈官祖妣朱妣陳皆再贈夫人公之配丁氏許氏皆封西寧侯夫人

子男 人 瑄府軍右衛指揮使琥駙馬都尉尚安成公主瑛

駙馬都尉尚威寧公主永樂中琥襲西寧侯仁宗皇帝嗣位琥坐

事改命瑛襲西寧侯孫男 傑金吾左衛指揮使偉羽林左

衛指揮同知俊天策衛指揮僉事儼旗手衛正千戶佐龍驤衛正

千戶嗚呼公勳著國家貴聯戚里慶澤被于後嗣名聲設于無窮

固本於際遇聖明千載之幸會亦必其忠義之行閱遠之材克勤

始終有以迓承之矣既述其事於碑又系之銘曰

天建皇明龍興淮土魁智傑能如雲從附定遠密比猶漢沛豐父

兄偕來有偉宋公義旗所嚮仗劍先驅神武不殺迎降懽呼長江

飛渡金陵定鼎分命股肱出綏四境于宣于歛于贛于閩公從總

戎聲威日振甌寧既靖公留奠之進奠藩垣大江之西雲中在左

分陝在右公來鎮撫煌煌旌棨虜窺西陲公往遏之斬繫其渠招

懷其餘擊胡遼陽薙孽嶺表如燎滅枯如鐵摧朽馬跡所歷幾周

四遐桓桓之志無康于家文皇臨御親任舊老自西來朝蒼顏白

首天子曰嘻卿宜在廷紆予西顧孰乎愈卿公曰臣職及臣未衰

西人忻忻迓公復來鞠躬盡瘁遑敢怠寧邊人恃公屹然長城宣

上德恩洽于遐外耄倪畢歸如川赴海天子曰嘻維時茂勳崇爵

永耀無極

涇國襄敏陳公神道碑銘

金文靖公

公諱亨字 姓陳氏鳳陽壽州人生而奇偉有大志元季為揚

州萬戶時太祖高皇帝龍飛濠梁歲丁酉遂仗策叩軍門上謁高

皇帝奇之選為鐵甲長從大將常公征泰州破張士誠軍獲乘馬

而還戊戌冬從車駕攻婺州拔其月城陷陣先登有銀器金幣之

賜由是以驍勇聞遂定浙東諸郡洎征安慶太平高郵皆效勞績

壬寅春天兵攻陳友諒於鄱陽公以功擢鐵甲百戶癸卯再舉師

次湖口公言於主帥曰陳氏兵多土人熟於水道今方秋湖水尚

盛中多灘磧或爲所誘則我舟膠淺難可以逞莫若募其土人潛遣小舟察其淺深險易量勢而進斯可濟也主帥用其言以聞如其計遂大敗陳友諒兵甲辰實授天策衛管軍百戶隨大將定江北諸郡縣吳元年以平浙西取蘇州功升崑山衛千戶階武德將軍繼從丞相徐公北定中原取東昌公副指揮常某守之值元兵數萬猝至城下衆蒼黃失措公曰敵衆甚銳利速戰難與爭鋒當以計破之於是堅壁不與戰越二日公先以兵數百誘之敵見人寡悉力來攻公與常率大軍奮擊且出奇兵邀之敵遂敗追奔至棠邑僵尸載路獲人馬輜重無算公亦身被十數創已而徐公復選公攻元都克之追元兵出塞而還遂從定幽燕諸城未下者洪武已酉調守大同攻王保保魏伯章俱有功已又征和林應州天城白登甲寅破詹童軍生禽僞官劉平章乙卯擢燕山左衛指揮僉事是後屢征迤北遼陽破滅營帳綏輯降附威聲遠著戊辰冬以公守禦邊陲久效勞績特升驃騎將軍北平行都司指揮使追

封其二代公感上知遇益以邊務爲任功烈之茂一時邊將罕與爲儷歲戊寅升後軍都督僉事仍掌行都司事己卯太宗文皇帝舉兵清內難至大寧得公召見軍門賜坐親酌卮酒勞之問以安社稷計公奏對稱旨乃曰天以卿授吾其遂成吾志於是命公爲五軍總兵官南進至鄭村壩首與敵遇卽摧敗之從攻廣昌蔚州大同諸郡無不克捷庚申夏四月戰白溝河下濟南茂建奇策敵聞公名不戰自退敕書褒諭升都督同知未幾公嬰疾在營文皇憂念不置晝遣中使絡繹往問夜則就營察視安否醫藥飲食皆出上賜疾篤命還北京文皇尋亦旋師親幸其第臨問者二公獨以用賢厚賞爲勸文皇嘉納之遂以其年十月七日卒于正寢計聞悼慟不勝遣官諭祭者七喪葬之費悉出內帑以某年某月某日葬北京宛平縣某鄉之原文皇旣登大寶錄序前勞定議贈公奉天靖難推誠宣力武臣特進榮祿大夫右柱國追封涇國公諡襄敏公之曾大父諱萬大父諱福父諱泰皆贈涇國公曾祖妣

氏祖妣張氏母秦氏妻韓氏皆贈涇國夫人公享年六十有九子男三人忠成軍衛指揮使次恭今後軍都督府都督鎮守鳳陽次懋今太保寧陽侯佩征西將軍印總兵鎮守寧夏孫男羽林衛指揮使昭為勳衛餘皆幼曾孫男人狀稱公為將四十年未嘗殺一無辜妄取一財色他將或多以殺戮為功橫取子女玉帛公輒語之曰好生惡死人人所同奚忍害彼之命為已功耶父子夫婦人倫至重又奚忍獨人之父鯁人之夫而奄有其妻子耶於是聞公言而化者甚眾嗚呼若公者其做古良將肯多讓哉宜其歷事二聖生都高爵沒受大封澤流後胤益顯而盛則天之報施於公者可謂厚矣太保公以公之神道未有刻詞乃以公事行命其子勳衛昭來請銘遂為之銘曰

烈烈陳公虎臣之傑昔事太祖佐興皇業從征四方如霆如雷無敵不破無堅不摧洎任邊閫勞勩益至綏輯降附宣昭德意威馳沙漠風塵肅清勩在盟府忠著朝廷繼事太宗內難是靖宣力效

謀屢戰屢勝大功垂成公疾弗支公進讜言忠誠不衰宸衷興悼遽失名將九原追錫寶天所相煌煌寵命侈昭崇封翼翼涇國列爵上公名顯于躬慶流後嗣錫圭儋爵惟公有子惟公有子惟國有臣為國楨榦本公之仁公仁何以不妄殺戮不事俘虜不寶金玉斯實公仁格彼穹旻昭茲錫類以大厥聞峩峩豐碑用揚勳德與國始終永世無極

寧陽侯濟國武靖陳公神道碑銘

懋

李文達公

賢

永樂初靖難功臣不下數十人然克享祿位於悠久者鮮矣惟太保寧陽侯陳公懋事五朝出藩入衛凡六十餘年而以令終嗚呼盛哉公諱懋字舜卿鳳陽壽州人高祖萬曾祖福三祖大一俱追封涇國公妣皆涇國夫人父亨從太祖高皇帝定天下以功升都指揮使洪武三十二年從太宗文皇帝靖內難復以功進都督同知卒贈奉天靖難推誠宣力武臣特進榮祿大夫柱國追封涇國公諡襄敏母韓氏涇國夫人襄敏公三子長恭嗣為都督同知次

忠府軍前衛指揮使季卽公也器宇宏遠識見超卓尤負膽氣工騎射年弱冠卽從父領兵爲前行凡壩上廣昌蔚州大同白溝濟南之戰與父同功又禦敵于單橋藁城西寨東平固鎮小河戰尤力累升右都督永樂初論功行賞進封奉天翊衛宣力武臣特進榮祿大夫柱國寧陽伯食祿一千石子孫世襲賜誥券賚予甚厚

六年受詔佩征西將軍印總兵鎮守寧夏賜寶鏹白粲牛羊以爲戒嚴之費公至鎮號令一新凡胡人降附者親撫綏之務得其歡心乃已七年選精兵自將大敗虜于境外由是殘孽遠遁邊塵爲之一清捷聞加封奉天靖難推誠宣力武臣特進榮祿大夫柱國寧陽侯食祿一千三百石子孫世襲復賜誥券及貂蟬冠服錦綺寶鏹八年春上親征北虜公將左掖兵十一年冬還鎮十二年春上復親征公仍將左軍俘馘甚衆明年還鎮十四年夏有報虜酋馬哈尤死者公未之信曰是欲懈我邊備也卽申飭諸將固守已而虜衆果來見有備而退二十年春上復北征公率所部兵以

從還京賜玉帶金綺龍衣且聞公有女賢淑禮聘入宮冊封麗妃尋命歸寧父母賚予駢蕃當世無與爲比二十一年詔公統陝西寧夏甘肅三鎮兵出勦叛虜公率衆直抵賀蘭山擣其巢穴盡收其酋長也先土干部落及其駝馬牛羊數萬凱還上大悅寵賚有加二十二年復隨上北征師還以公爲殿至京遂領前軍都督府事仁宗皇帝登極以公勳戚有勞加太保復官其長子昭爲勳衛宣宗皇帝臨御待公尤厚樂安州之平公領京營兵衛士有功還

有金帛人口之賜二年復鎮寧夏三年春奏徙靈州城以便防守四年春得玄白二兔以進上賜璽書獎諭兼有玉帶龍衣馬圖之賚六年還京十年命佩平羌將軍印移鎮甘肅正統改元今上皇帝嗣位念公勳戚之舊召還奉朝請十三年冬福建民鄧茂七作亂僞稱閩王勢甚猖獗上曰此賊非老將不能平特命公率師往討之至浙江有欲分兵先守海口者公曰如此是絕其生路則爲死寇矣不從明年春師次建寧有欲屠沙尤二縣者公曰如此則

益堅寇心矣乃下令諭之俾各復業能斬賊首者官賞與王師同於是降者日衆公曰賊勢已孤無能爲也迺五路進兵一鼓而收之凱還賞勞加等命領中軍都督府事尋兼領宗人府事景泰中加太子太師天順改元皇帝復位恩遇益隆固辭宮師許之六年春忽得疾踰秋不能起上言臣老死不足恨惟陛下以生民爲念任賢用能以圖太平之治則國家幸甚上覽之惻然曰看卿所奏足見忠誠宜尚加調治以副朕懷久之醫藥弗效遂薨時天順癸未七月十六日也距生洪武乙未二月初九日享年八十有五計聞上震悼輟視朝一日追封濬國公諡曰武靖遣官諭祭加賻及營葬事東宮及諸三亦各致祭公偉觀修髯語音洪亮胸懷磊落敬禮文士雖位極人臣未嘗妄自尊大而南征北伐口不言功當爲中興名將稱首配嚴氏封寧陽侯夫人子男六人長卽昭次福寧次晟次潤次瑛次昂以是歲月日與嚴夫人合葬于都城西香山之原銘曰

壽有陳宗父子傑特涇公濬公後先開國文皇靖難孰多勳勞涇公輔之首秉節旄奮武桓桓所向披靡大事垂成星殞于壘濬公承之以篤世忠鼓勇前馳涇公是同躍馬揮戈到處蹀血乃伯乃侯成此茂烈金符虎節屢鎮邊陲于征于狩無遠不隨聞寇動勦東南震恐濬公征之遂輯其衆巍巍勳戚厯事五朝龍衣玉帶惟帝之褒壽嘏旣純允顯六紀容與承平宿將有幾煌煌愍冊賁此令終生死哀榮孰如濬公西山嗟我佳城在側史臣勒銘千載輝

赫

漳國忠毅鄭公神道碑銘

序

楊文敏公

榮

宣德甲寅二月乙丑奉天靖難推誠宣力武臣特進榮祿大夫柱國中軍都督府左都督武安侯鄭公薨于大同訃聞上嗟悼輟視朝二日遣官致祭賜棺及賻命有司營葬追封漳國公諡忠毅年日歸葬北京之西山葵里其子能旣襲侯爵遂具公平生之概來求神道碑銘予嘗叨總史職不獲有辭乃爲序次之曰

公諱亨世家廬州合肥按鄭氏譜世居歛之跳石元末徙居合肥
 今忠毅公祖墓俱在跳石歲時遣人上冢不絕曾祖父五乙祖父
 大己父用以公貴俱追封武安侯曾祖母劉氏祖母張氏母英氏
 俱追封夫人昔我太祖高皇帝龍興淮甸公之先君子自和州率
 先應募積軍功授平陽右衛百戶升大興衛副千戶歲癸亥公始
 襲父職公天資剛毅純篤壬申出使漠北至斡難河撫輯韃靼還
 以勞升密雲衛指揮僉事乙卯秋太宗文皇帝舉兵靖難命公攻
 薊州時都指揮馬宣城守不下公百計破克之遂生禽宣歸旋攻
 雄縣討真定俱大克捷升指揮使及遼東軍圍永平上親率諸將
 援之公賈勇奮進敵遂披靡旋師收大寧升北平都指揮僉事未
 幾戰鄭村壩克紫荆關復廣昌所向無前明年庚辰取蔚州大同
 大戰白溝河乘勝逐北直抵濟南升都指揮同知滄州之役公軍
 北門北門芻糧所聚兩軍必爭之地公力戰破之又明年辛巳敗
 順德軍於深州夾河決戰勦戮尤盛薨城西水寨連戰俱捷遂耀

兵廣平略地彰德所至皆下是冬升中軍都督僉事歲壬午從上
 南嚮歷取諸縣及東平汶上等堡對敵小河塵鋒靈壁擣泗州取
 鎮淮渡江克金川門內難既平上正大統策勳頒爵封公武安侯
 階勳如前白金文綺襲衣前後賜賚不可勝計永樂癸巳夏奉命
 出關巡視山川險易撫輯軍士時關外軍衛統攝無紀遇有邊警
 猝難制敵公因奏調大同前衛帶管東勝等衛措置得宜自是各
 衛皆從所隸以聽調用尋奉敕領士卒築長安嶺城規畫有方人
 不知勞未逾月而城成歲庚寅以來上屢親征北虜公扈從每著
 勞績仁宗皇帝嗣位念公舊德特命佩征西前將軍印充總兵官
 鎮守大同嚴斥堠固屯守胡騎遠遁不敢窺邊居常以清介自將
 服食之奉泊如也用是下人毋擾邊境輯寧宣宗皇帝倚任尤重
 屢降璽書褒異之公生元至正丙申至是享年七十有九配夫人
 張氏子男三人長即能次熙次嘉女二人孫男一人孫女一人於
 戲自古帝王之興必有才雄智勇之臣為之左右以戡靖大難垂

不刊之功故其子孫世世有爵邑與國咸休永無窮之聞焉若公
遭遇太宗竭誠效力奮不顧身崎嶇戰陣以佐助翊戴奠安宗社
迨扈從北征鎮安邊陲其奇能偉績輝映後先者何其盛哉是宜
勒銘豐碑昭示後世焉銘曰

於皇太宗有臣忠毅克殫心膂助順舉義崎嶇戰陳奮不顧身祇
奉神謀用成大勳皇帝曰吁有臣如是惟天所生皇考所遺從征
漠北屢效驅馳出鎮邊陲虜不敢窺長安之嶺其城萬堵營之築
之士不知苦盛福遐齡逮事四朝功成不有位高不驕天不憊遺
殞傷元老時論興嗟聖情悲悼聖情悲悼慨念元功式昭褒典賜
諡追封婺里之原西山之麓鬱鬱松楸佳城是卜紀行有史銘功
有詞後百千祀視此豐碑

武進伯朱公神道碑銘

榮

羅都御史

亨信

洪熙元年乙巳秋七月三十日征虜前將軍總兵官武進伯朱公
以疾卒于遼東之鎮所計聞皇帝爲之悲悼輟朝廷臣皆縞素越

明日詔禮部遣官諭祭賻贈其家定議追贈公奉天靖難推誠宣
力武臣特進榮祿大夫柱國武進侯諡忠靖九月喪柩至京十月
九日賜地葬于宛平縣京西鄉盧溝橋西之原既求翰林學士曾
棨誌其壙迄今二十有一年矣其冢嗣今大同總戎襲封武進伯
冕大懼公之豐功盛烈弗白于世又慮乎後人或怠於進修則無
以報聖恩而繩祖武也於是泣持參謀戶部右侍郎沈君仲威所
具事狀謁予撰其神道之碑予以衰陋出巡塞北辱愛於總戎甚
厚義不容辭按狀公諱榮字仲華姓朱氏世爲兗之沂州大家元
季擾攘田廬蕩盡承平奉二親來歸艱難營養不失其權公賦性
剛毅體貌豐偉少負奇氣年未二十膂力絕人初同父僑寓表伯
葉氏家葉閒戲曰男子非士則農商以自立胡爲託迹于人而不
思所以振厲公曰人亦奮發有時大丈夫又安知他日不爲都督
乎聞者甚壯其志無何朝廷下令四方舉年少傑特之士以備任
使郡以公膺詔而起擢爲府軍衛驃騎舍人實洪武九年丙辰也

武藝日修常備宿衛尋授卒長領騎五十人時滇南諸夷初附跳
梁未輯歲辛酉命大將西平侯帥師往平之公從征大理金齒百
夷建昌烏撒烏蒙諸郡壬戌復征積有勞效授世襲百戶戊辰征
金山一迷河哈喇哈之地明年己巳升大寧前衛左所副千戶創
建城池撫綏士卒己卯秋會太宗文皇帝舉兵靖內難十月駕臨
大寧公審知天命已有所歸遂率所部詣軍門謁見大被賞賚卽
升本衛指揮僉事扈蹕還至鄭村壩遇敵大戰又奪九門進都指
揮僉事繼取廣昌庚辰攻蔚州大同戰白溝濟南皆勝升都指揮
同知又克滄州東昌辛巳夾河藁城兩大戰皆捷進都指揮使壬
午克東平汶上肥河敵皆披靡旣而收兵復戰公率精騎伏險大
破之復攻小河靈壁泗州渡淮克盱眙下揚州招撫鎮江敷宣德
意人皆按堵夏六月渡江入京上登寶位大赦改元論功行賞授
公左軍都督府都督僉事參貳元僚聿新政化永樂四年交趾黎
季犛肆爲不靜毒痛生靈上命征夷將軍英國公帥師往討其罪

公翼贊元戎大建勳績六年渠魁旣俘超升右都督明年餘孽負
固構亂公復征遂平西東兩都列其地爲郡邑置守令撫循其民
設三司以鎮焉師還受賞八年春北鄙殘虜屢剽我邊人爲弗寧
上親率六師以勦之公隨征至玄冥河追逐虜酋本雅失理至紅
山口靜虜鎮胡寇阿虜追逆戰公鼓勇取勝寇亡命奔遁遷左都
督十二年復征於和林蒼厓峽衝入賊陳大破雅刺之眾師還是
年冬命往大同鎮守督操軍馬守禦邊疆狄人聞風遠遁西北以
寧十五年召還十六年命鎮遼東嚴斥堠謹烽火東徼晏然二十
年復征北虜公由東路兩與寇遇奮勇破敵俘獲人馬牛羊而還
二十一年七月進封奉天翊衛宣力武臣特進榮祿大夫柱國武
進伯食祿一千二百石子孫世世承襲頒賜誥命鐵券褒封三代
眷遇日隆屢掌府事政通人和中外交譽之二十二年復征北虜
回還仍鎮遼東洪熙元年仁宗昭皇帝嗣位簡任老成分蒞邊鎮
謂公惇實有古將才是年春遣使持征虜前將軍印綬授公充總

兵官鎮禦其地思惟付畀之重整戎伍撫士卒期罄丹衷以毋負
委任詎意夏六月忽疽發背馳奏京師遣醫往治弗效竟卒凡將
校士卒莫不悲泣如喪所親距所生己亥六月九日享年六十有
七公之曾大父成大父得父原賜初皆封武進伯追封武進侯曾
祖母葉氏祖母濟氏母施氏俱已卒配楊氏初皆封武進伯夫人
追封武進侯夫人子男六長即冕襲封武進伯正統四年命佩征
西前將軍印充總兵官鎮守大同文武兼資慈祥豈弟綽有父風
娶陳氏封武進伯夫人次徽次果次昇次昌次昱孫男十五琦瓚
瑛璫瑋璘琛璵璠冕之子瑾瑄瑔瑔珍徽之子理昇之子璽昌之子
嗚呼予聞公之為人謙退而能容有功而不伐運籌決勝之方素
所講習每同大將東征西討摧鋒破敵惟殲其所當誅未嘗妄戮
一人恭承闔外之寄思以遠圖不僥倖以成功微詭而取名孜孜
以安輯為務所至兵民無不仰戴由其宅心平恕智識高明才力
超邁所施靡不咸適其宜視之古人信不多讓矣豈非治世之勳

臣中興之名將歟是用紀其本末勒諸貞石以垂無窮焉薦以銘
曰

聖人御極簡拔豪英公起畎畝卓犖崢嶸俾長卒徒殲厥南服大
建奇勳乃有世祿廓清沙塞武備浡膺出守雄藩是曰大寧屠維
單闕內難斯作皇秉天戈奸回戢削遂登九五肆攬乾綱四方萬
國莫不來王公功最多官登都府贊貳戎樞闡揚威武股肱心膂
為國干城雄才遠略中外咸稱南越既平朔方亦定伯爵進封榮
膺顯命丹書鐵券簪紱煌煌崇德報功恩數異常鸞誥再頒光昭
祖禰胙土分茅山河帶礪屢承閭寄寵眷益隆荷德感恩誓竭其
忠一疾弗瘳溘爾云逝當亡日噫元勳已矣追惟碩艾錫謚加封
襲其冢嫡復總兵戎賜葬京畿西山之麓封築孔堅巍巍夏屋穹
碑載樹勒此銘章永利後人百世不忘

皇明名臣

皇明名臣璇琬錄卷之十八

少師工部尚書追封柱平伯榮襄吳公神道碑銘

楊文貞公士奇

公諱中字司正姓吳氏世家山東之武城業儒曾祖淵祖興仕元
 為任邱令考成皆以公貴累贈榮祿大夫正治上卿少保工部尚
 書曾祖妣某祖妣某妣某皆贈夫人公洪武戊寅自國子生授營
 州後屯衛經歷升大寧都司經歷太宗皇帝義旗所舉師至大寧
 公以眾出迎公體白潔豐偉應對明暢上一見拔於羣眾中賜襲
 衣命守會州教士卒力田南兵攻城率眾卻之移守薊州捍禦撫
 綏具有方略賜衣服器物以嘉獎之遂命署北平布政司理問升
 本司經歷給饗運贊城守並效勞績升大理寺丞是歲旱蝗公言
 此由刑濫所致皆臣等之過乞戒飭法司務寬平無幾升少卿以
 發奸慝升都察院右都御史將營北京宮殿改工部尚書奉命取
 材於蜀還又命董餉運北京賜帛六百疋車駕北征公扈從兼督

餉運既還丁外艱歸起復仍命董宮殿營繕公言營繕吉事臣喪服未除非所當預改刑部尚書後以言事忤旨逮繫仁宗皇帝嗣位尤見信任升少保仍兼尚書賜寶帶金織衣已而坐累解少保公事三聖皆見信任凡車駕行幸不以遐邇皆在扈從三陵之建皆公董役竣事皆有銀幣之賜皇上嗣位以公舊老復少保重建奉天華蓋謹身三殿乾清坤寧二宮命公董之蚤暮勞勤致疾功成公雖在告嘉念厥勞升少師賜白金文綺加繡麟衣無幾疾竟不起正統壬戌六月丙辰云計聞輟視朝一日遣禮部尚書胡濙賜祭追封荏平伯賜謚榮襄命有司治葬官其子賢世襲錦衣衛百戶公爲人和易閭爽勤於奉公其掌刑憲寬厚平恕恆躬視獄中命除穢惡疏桎梏時食飲戒飭吏卒以時寬恤迨遷冬官職務填委規措經畫條理井井心之默識雖久不言襟度有容雖忤不校或屈已伸謝愛護僚屬恆免瑕疵其佐在南京者嘗賦造海艘材於江西浙江江南加數十倍時論謹諱公聞駭愕遽奏罷賦悉

給於公屬官有器能者率獎進之先事蓄材以應時需隨用皆足未嘗缺乏自正統來京師多大營建悉出公家有司不知百姓不聞此本皇上之仁亦公預贊畫焉明於燭奸嘗四鼓入朝道遇負鈔數十萬緡者公曰非寇而何命從者悉繫以奏詰之迺造鈔匠盜寶鈔提舉司鈔遂置于法邂逅有見必上聞不以出位爲嫌歷事四聖皆承厚遇所得賜賚時鮮與儼宣德中嘗賜銀章其文曰和敏詳達蓋以貺公之行云所得書詩圖畫尤多自念久病奏乞停祿不允家居事親孝敬常迎就養京師備極崇奉親沒致御祭之榮永樂中命大臣之子入侍皇太孫公推於其弟雖貴待姻戚鄉黨相與款洽如布素時賜窮恤匱不問識與不識與人處謙和怡愉大官中貴皆樂親之屬續之日哀悼之眾無閒疏戚享年七十有一葬良鄉縣某鄉之原配劉氏封夫人子男七余與公同朝交四十年至是賢奉少保江陵楊公所誌墓文求書墓道之碑遂益以余所知者序之而爲之銘銘曰

奕奕吳公興自成均發軔伊始感會風雲共武之服從師于邁據
勤效謨夙夜靡懈乃進棘寺乃陟柏臺隆隆寵光亨衢引開正法
以施秉公持平遇災引咎帝嘉乃誠遂掌邦禁詰姦刑暴惟欽惟
恤恭帝之詔再入冬官如古司空居民時利飭材考工鞠躬致誠
厯事四聖陟降左右式恆厥敬廷多其績時偉其望巖巖師保六
官之上曷不憇遺而遽長歸七十高齡于古已稀壽富考終亦既
窳只史氏有銘詒厥來嗣

兵部尚書張公墓志銘

本

楊文貞公

士奇

公諱本字致中姓張氏山東東阿人曾祖欽祖誠考從善洪武中
公白國子生擢揚州府江都知縣升揚州知府遂升江西布政司
左參政召為工部左侍郎坐累謫交趾還為刑部右侍郎升南京
兵部尚書兼都察院事召為行在兵部尚書兼太子賓客兼戶部
事公少勤學治毛氏詩為人直諒通敏有器識初在江都治其縣
有法豪猾斂肅雖土官素名悍暴者不得下擾江都之民安之大

宗皇帝義兵及境衛府皆已歸附公猶率民治守具母夫人曰此
天命也可違天以禍人乎遂率民耆老詣軍門朝內難平升知府
進參政賜白金文綺是時江西唐琮在都司劉辰在布政司周觀
政在按察司使三人皆負勁氣不相下琮觀政尤縱私無忌憚事
連軍民者即各持說務已勝不復揆理有積滯數月不決者公至
斷斷持正且溫辭和氣以導之久而三人者皆惟公言之聽吏弊
素甚公每事躬理吏無容奸聲譽頓起遠郡邑民事當貳佐躬臨
視者眾或憚行輒自請行所過民多德之為工部職務叢脞旦莫
在公悉心殫慮寢有條理在刑部奉命督北京河運至濟寧而病
朝廷聞之遣中官挾醫馳視并賜藥及貂裘竣事還益持敬慎議
獄必究情疑者處之率厚數發奸擿伏奇中而紀綱秩秩仁宗皇
帝初嗣大位重南京根本之地曰張本特立不阿首進公南京兵
部尚書兼都察院事明年被召入見言國家大計遂留行在兵部
毅然以革弊舉廢為務皇上嗣位知公忠直可任所言多見聽納

高煦反車駕親征罪人既得命公撫輯其眾而錄其餘黨兵政久弊姦人以貨脫伍籍而援平民實伍者遠邇一轍公言於上擇廷臣四出清理悉用釐正於釐正他弊尤多賜敕獎諭命兼太子賓客賜白金文綺鞍馬遂命兼戶部事戶部政紀尤弛公夙夜不解講求其故蠲其積弊舉其墜典凡上利國家下利民生者靡不盡心事日益就緒宣德六年正月六日得疾又明日訃聞上深悼惜遣禮部尚書胡濙賜祭遣中官賜賻鈔三萬緡敕工部營喪葬戶部復其家比葬復遣官賜祭卿大夫士之賢者皆走哭弔致奠祭又相與歎曰一世都高位享厚祿而能任國事如家事如張公者幾人天胡奪張公之速哉公廉介有守其心未嘗斯須不在國事剛果嫉惡於治奸宄鮮所寬假而禮賢敬儒尤厚春秋六十有五而卒卒之日家無餘貲亦可以觀其平素矣以公貴祖若考皆贈資善大夫兵部尚書祖妣李妣邱皆贈夫人配王封夫人子男二璘環孫男三承祖繼宗如意保公葬以卒之歲某月某日墓在東

阿先塋之次璘等以右通政徐琦所狀事行來請銘余與公兩京交好殆三十年又悉其江西之政蓋琦知公不若余之深也銘曰崇秩重祿偉公與卿巍冠褒衣蟬聯在庭孰如張公經國如家夙夜弗遑勞思孔多何以益上何以益下曰予時職其敢遑暇綽綽成績在公多有倚注方隆公止下壽廉清之操公正之施賢人之長善人之思

少師忠定憲公墓志銘

義

楊文貞公

士奇

宣德十年正月十有五日少師吏部尚書憲公薨於位先四日以疾聞上遣太監范弘以醫來視賜鈔萬緡明日范太監以眾醫偕來又明日疾革范復來問所欲言對曰陛下初嗣大寶義獨寡祐不能效分寸裨益然區區大馬之誠所望於聖明者惟敬守洪武成憲始終不渝耳言已而絕訃聞上深悼歎屬時國有大事悉停諸祀特賜鈔萬緡敕工部治喪葬贈公特進光祿大夫太師謚忠定遣官賜祭而官其長子英英等奉櫬歸葬有日求予爲銘

予與公同朝三十有五年而事仁宗皇帝自登儲至大位始終皆陪公公國家老成人所以啓益士奇蓋多不敢辭蹇氏世家重慶之巴縣宋以來多顯仕自公高曾而下始隱居不出曾祖繼祖妣牟祖均壽妣雍考源妣胡繼羅以公貴贈曾祖祖考皆榮祿大夫少師吏部尚書曾祖妣祖妣皆夫人公諱義字直之生而岐嶷長端重不好弄而嗜學弗懈始從里師中書左丞殷哲時爲郡守一見異之引充郡學弟子員語其師曰是兒將來遠到非吾所及當成就之而公不煩程督日益有進洪武甲子中四川鄉試明年中禮部會試廷試賜同進士出身擢中書舍人授徵仕郎見重太祖高皇帝每前奏事率稱旨而數見獎賚初名瑫一日奏事畢問汝蹇叔之後乎親灑宸翰書義字賜之以易舊名時丁羅夫人憂賜道里費且命馳驛歸蓋特恩云服闋仍舊職滿三載吏部奏當調特命終九載朝夕左右凡機密文字必以付公而小心敬慎久而愈篤建文中升吏部侍郎授嘉議大夫太宗文皇帝入正大

統轉左侍郎數月升吏部尚書授資善大夫時政令制度有非洪武之舊者詔悉復之公從容爲上言損益貴適時宜閒舉數事陳說本末文皇帝以公忠實悉從其言小人有譖公不忘建文者賴上聖明不聽有除官不得善地訴公不公者上皆斥之永樂二年册仁宗皇帝爲皇太子命公爲詹事時師傅皆以勳臣兼之而輔導責任文臣詹事蓋元僚也上欲有諭皇太子率諭詹事往導意公亦委曲周悉皇太子尤愛重公所言靡不信用滿三載升資政大夫七年車駕巡守北京命皇太子監國中外庶務惟諸王及遠夷有奏請詣行在餘悉啟聞處分公熟於典故達於政體孜孜無倦不動聲色而事賴以濟賜誥以其官秩封贈二代滿九載賜敕有秉心正直及淳良篤實裨益國家之褒數奉命兼禮部事雖職務填委處之裕如十七年丁父喪歸上及皇太子皆遣官賜祭皇太子贈賻尤厚有詔起復公詣北京謝上慰勞再三賜鈔千緡遣中官護送歸南京明年從皇太子朝北京遂命公巡撫直隸應天

等府州問兵民休戚及文武吏之賢否而升黜之公謂國家多事之際悉以法繩吏人將不勝特出其太甚者數人餘多見寬貸而兵民利弊當建革者具奏行之仁宗皇帝初嗣位一切政議預者三四人而公居首進少保兼吏部尚書二俸俱支賜官服象笏及玉帶二遂進少傅又進少師賜師傅之臣銀章各一其文曰繩愆糾繆公首被賜上諭之曰朕有過舉卿卽具疏用此封識進來蓋望公等匡直也繼賜誥授榮祿大夫封贈三代及妻於公數人誥詞上特增曰勿謂崇高而難入勿以有所從違而或怠所以望公等切也又念公侍從監國舊勞特製蹇賜賜敕有以善翊君勞心焦思二十餘年夷險一致之褒時修太宗皇帝實錄命公監修宣宗皇帝嗣位一切政議屬公數人如仁考之初繼奉監修仁厚復從巡邊旣還以公年老不欲煩以有司之務賜敕曰卿事祖宗積效勤誠朕嗣統以來尤資贊輔夙夜在念圖善始終蓋以卿

春秋高尚典劇司優老待賢禮非攸當況師保之重寅亮爲職不煩庶政乃副倚毗可輟吏部之務朝夕在朕左右相與討論至理共靈邦家卿其專精神審思慮益致嘉猷用稱眷倚老成之意繼賜銀章一其文曰忠厚寬弘蓋以褒德云賜新第於文明門內寵錫洊加吏部言公歷少師九載降敕褒諭仍賜宴禮部是歲生旦賜白金文綺是夕齋宿於公得疾越五日竟不起享年七十有三公爲人沈深質實和厚簡靜內有孝友之行事君以誠處人有量無所拂逆未嘗輕涉一語傷物至於議法亦不苟爲包含必歸中正歷事五朝凡五十年所履坦坦無一日顛躓之憂退朝之暇手不釋卷貴而能謙富而能約上前所言未嘗退以語人蓋天下有陰被其利者矣士奇嘗竊論之魯簡肅之忠實不欺李文正之不爲傷人害物張忠定之不飾玩好傅獻簡之遇人以誠范忠文之不設城府公蓋兼有之矣元配劉氏繼張氏皆封夫人子男四長英次芳次芸次荃英荃皆尚寶司丞孫男四霖震霑露公之葬以

薨之歲某月某日墓在巴縣某鄉某原先塋之次銘曰

節乎蜀山浩乎蜀川孕精毓靈挺生偉人温中穆外履夷蹈素皇明麗天奮躍自下在帝左右秉恭與誠掌帝之制播告四方進貳天官遂職冢宰簡用俊良往興至理帝命洊隆俾輔聖儲陳厥謀謨聖罔弗俞四紀在庭三翼升御肅肅師臣秉王之度一念惟仁永矢不渝寅畏小心保終猶初陰利逮人人則罔覺惟帝昭明褒詔有數嗚呼忠定維國老成曷不憇遺翼我聖明生榮死哀死且不朽昭德刊辭永告爾後

戶部尚書郭公墓志銘

楊文貞公士奇

宣德六年四月十一日資政大夫行在戶部尚書棠邑郭公卒訃聞上悼歎賜祭命有司給舟歸喪且營葬事公諱敦字仲厚姓郭氏其先自太原交城徙東昌棠邑祖諱忠妣石氏考諱政寬妣侯氏繼馬氏郭世有善德公自幼凝重端謹稍長游鄉校日勤講習已卓卓出倫輩洪武癸酉以詩經中山東鄉試會試下第後擢戶

部廣西清吏司主事歲餘有賢聲升衢州知府下車咨民隱蠲弊興利修學政務教化崇儒術禮賢行以表勵其民振卹無告郡俗貧死不能葬者焚屍沈之公相城東得廢地百餘畝榜曰義阡令民貧死者悉葬是又爲約教民有急相資助民利賴之嘗歲旱公齋沐致禱雨立降霑足蝗入境爲災公自爲文檄城隍神是夕大雨雷雹蝗盡死凡所禱輒應城西有淫祠歲四月軍民男女聚謁祭祠下謹誦若狂公禁止之已而得風眩疾吏民爭勸罷禁弗聽疾亦瘳同僚有私取民財者公雖不面斥而義形於色其人頓首謝改過待之如初屬邑吏爭濯磨自效公退所謀諸心發諸言未嘗不在民事所秉正直襟宇坦明言出而民信令出而民從不俟程督庶務畢舉舍內蠶箔嘗有叢絲類織成盤帶修廣適度郡人謂公仁政之應在衢七年政化大行坐累徵詣京師耆老數百人伏闕奏乞畱理官執不可耆老皆涕泣而退後廷臣有言公廉正不阿者召爲監察御史升河南布政司左參政無幾調陝西以公

務留京師今禮部尚書胡公言其行於太宗皇帝曰郭敦有大臣體宜在左右即日召見以病不克入遂遣御醫視疾疾愈入謝獎勞再三賜鈔襲衣明日升禮部右侍郎兼太僕寺卿仁宗皇帝臨御進官戶部左侍郎兼詹事府少詹事賜誥以其官贈祖若考而贈其祖妣妣皆淑人宣德二年升戶部尚書命鎮陝西歲餘召還任戶部無敢一豪干以私者未幾得疾上聞之命太醫往視數日竟不起春秋六十有二爲人純實溫雅事親愛敬兼至隆寒盛暑不解閨門之內儀度清肅聲色未嘗留耳目公暇手不釋卷私居無情容居官剛正人莫能奪所至整飭綱紀盡誠撫恤不徐不亟吏畏民懷冰蘖之操無遜古人雖官列六卿泊然布素身沒之日家無餘貲豈非篤行君子者乎子男五人祺禎禧禳祜孫男女皆六於是諸孤奉衛府長史金寔所狀事行介禮部尚書胡公求葬銘噫行爲如公銘其何愧銘曰
君子之德惟正故直惟公故碩惟澹故適于道之迪于民之則嗟

乎郭公允備衆好嗟乎斯銘無愧有道

太子少保文靖金公墓志銘

幼孜

楊文貞公

士奇

太子少保禮部尚書兼武英殿大學士金公以宣德六年十一月十六日訃聞上嗟悼甚至贈榮祿大夫少保謚文靖命禮部尚書胡濙賜祭又命自喪至祥禫皆遣官祭敕有司治喪葬百需所以褒寵之厚且備矣公諱善字幼孜以字行自幼嗜學問內承家訓之篤長從前進士聶鉉先生授春秋經得其微旨中進士乙科授戶科給事中太宗皇帝初臨御注意文學士改翰林檢討居無幾簡翰林之臣七人處之內閣付以密務而兩制悉歸焉七人者廬陵解大紳胡光大永嘉黃宗豫南昌胡若思建安楊勉仁公與士奇也數月皆升官公爲侍講授承德郎仁宗皇帝在東宮時翰林春坊司經局之臣日講經史公專說春秋數析簡明睿旨稱善遂命纂十二公事作春秋要旨三卷以進永樂五年升右春坊右諭德仍兼侍講授奉訓大夫十年車駕巡狩北京公與光大勉仁同

扈從八年扈從北征還南京封奉直大夫十年賜誥命贈其考守
正爲右春坊右諭德母陳爲宜人封母羅爲太宜人贈妻孔爲宜
人十一年扈從巡北京從征北虜十二年復從北征升翰林學士
仍兼諭德修五經四書性理大全爲總裁官授奉議大夫十四年
還南京明年扈從巡北京預修太祖皇帝實錄十八年升文淵閣
大學士仍兼翰林學士二十年扈從北征二十二年復從征北旣
旋師中道宮車晏駕初喪至斂皆勉仁與公據禮行之旣而勉仁
先馳歸報道中之儀皆咨公而行仁廟嗣位進戶部右侍郎仍兼
文淵閣大學士翰林學士踰月升太子少保兼武英殿大學士專
典內制賜大臣五人銀圖書其文曰繩愆糾繆蓋以匡直勉之公
其一也奉命持節冊封趙王妃及封梁王洪熙改元命兼禮部尚
書三俸並支大臣兼三俸者惟勉仁與公兩人賜誥命授資善大
夫贈其祖仲卿及父皆太子少保武英殿大學士祖母周母陳皆
夫人進封母羅太夫人贈故妻劉繼室屠皆夫人以法司論死罪

多冤抑命自今臨決必會大學士三人同審而公預焉詔百官有
親違離三年以上者聽給告歸省公首奏歸省母蓋前此百司職
務填委無敢言私至是公首奉詔賜賚甚厚是歲丁太夫人憂上
嗣位修兩朝實錄起公爲總裁官明年奉命持節之寧夏冊封安
化眞寔二王妃歷河南關東西之境弔覽周秦漢唐以來遺墟故
址悉見賦詠所過兵民休戚旣還具言於上實錄成賜金織襲衣
文綺白金鞍馬是歲扈從巡邊至宣府而還歲餘得疾上遣太醫
院官視療數月竟不起春秋六十有四公爲人簡易沈默溫裕有
容居家敦孝友之行旣仕事上以誠持論必正扈從北征時道中
士卒有憊者太宗皇帝知之以問羣臣羣臣未有對公直對宜遂
班師凡於公務致勤不倦處同僚能讓於人况愛無忤其學該博
文章和平寬厚類其德性四方求者無虛日靡不酬應得一篇一
詠者皆寶重之書兼工眞行嘗考會試者一讀廷試卷者四不伐
善不驚名初升學士寵賚日加卽以盛滿爲戒名其燕處之居曰

退菴疾革士奇勉仁問之有何言公言受國家恩重上無所益朝廷下無所益生民何言傍或啓之請身後之澤者公正色曰君子所恥訖終清明未嘗片語涉亂既卒自公侯六卿暨諸司之長皆哭弔奠祭士無賢愚皆有喪善人之歎嗚呼儒者際遇始終光榮如公一世其幾何人公之所存蓋無忝矣子男五長昭伯宣德二年進士次武伯堅伯文伯壽伯孫男六公葬以卒之明年某月某日墓在某縣某鄉某原銘曰

玉笥崔巍金谿湛澄公生其間萃蘇挺英賓興賢能濟濟偕至青萍出匣淬礪初至六卿乘時登庸玉署遂清崇嚴參典密務恪勤夙夕小心寅恭于狩于征龍旂率從上承簡知履坦平平鷗游滄溟鵬翱九天厯事三聖敬終猶始不競不綵有譽無毀方簡大冊天府所藏崇碑厚碣敷在四方謙退之存易簣不貳嗚呼文靖可式有位

少保戶部尚書黃公神道碑銘

福

楊文貞公

士奇

自古仁人君子之明夫道者恆以天下國家爲心而不爲其私計范希文言士當先天下之憂而憂後天下之樂而樂夫天下之懷抱斯志者未嘗無人顧其志得行與否則係於其所遇以希文之志猶不得盡行於當時非所遇之難乎惟士之卓然有志者則不以是而或怠然亦鮮矣三十四年閒士奇所接名卿大臣若東萊黃公其可爲有志於希文而無愧者也公稟剛毅之資持正直之節懷忠厚之志負遠大之器風采凝重氣量宏偉而表裏洞達博學好古篤信不疑不苟爲同不矯爲異不爲勢屈不爲禍懼惟義之循惟道之行豈非士之卓然者與公諱福字如錫東萊之昌邑人自少不凡以書經選洪武甲子鄉貢入太學初授項城縣簿改清源縣皆有及民之政升金吾前衛知事改龍江左衛蚤暮勤職而才識明敏剗剔宿弊數出意見輔翼上官升本衛經歷上書論國大計太祖皇帝覽而奇之超升工部右侍郎特見信用太宗皇帝初臨御治齊黃離閒之罪李景隆於上前并指公爲奸臣公厲

聲言臣罪應死但目爲奸則非上知其正直不問遷左侍郎遂升
工部尚書授資善大夫凡所陳奏悉見嘉納歲餘天下工匠集京
師者多疫死都御史陳瑛以爲公罪劾奏之又不問初建北京置
行部時北方用兵累年民弊甚首改公爲行部尚書任之撫綏公
摠誠盡瘁植卮濡焦而民以蘇交趾逆命遣大將軍率師討罪命
公先詣兩廣治軍實調度有方用足而民不困交趾平郡縣其地
建都指揮司布政司按察司總之設官如制命公以尚書兼掌布
政按察二司印章而董其治公視民如子徇其所欲革其所惡勞
之輯之訓之飭之躬勤不倦且戒郡邑吏咸修撫字之政吏承公
仁無敢違戾公以新造之邦新附之民政令條畫靡閒纖鉅悉盡
心焉於是交人益戴公如父時中朝士大夫以遷謫至者咸見温
卹或有疾病躬造視之拔其賢者與之共事及以教導其民而悉
加禮焉中官馬麒怙恩肆虐自三司以下皆縮首斂避惟公數裁
抑之麒誣奏公有異志上深照其妄曰此君子不容於小人寢其

奏公居交趾幾二十年仁宗皇帝登極上言六事悉見采用時初
建儲驛召公還璽書有元老久勞于外篤念不忘亟欲見之之語
瀕行交人扶老攜幼送公皆號泣不忍別既至深被獎勞賜白金
文綺遂命兼詹事蓋付託之重云無幾仁廟上賓公董山陵之役
宣宗皇帝嗣位馬麒激變交趾時兵部尚書陳洽代公掌藩臬二
司累奏乞還公蓋以交人思公之深公先已持節親藩册封即日
召還奉命復詣交趾時交寇黎利據列城叛朝廷命將率師討之
及公偕行將及境交寇拒師總師者失律爲寇所得并得公寇皆
下馬拜公曰公不北歸我曹不至此言已皆泣共置公於館父事
之公度寇無悔罪意卽不食冀死寇謹防護不去側竟禮送北歸
旣歸奏命偕平江伯陳瑄董江南餉運公與平江協心合謀績用
有成公上言足食足兵省役三事切於時務並見嘉納宣廟念公
春秋高久勞在外改南京戶部尚書上龍飛之初以南京根本重
地公先朝老成進榮祿大夫少保仍兼尚書參贊襄城伯李隆南

京守備公時雖老事無鉅細必周于慮而裁處適當襄城惟公言
之聽文武諸司凡有疑務成就正焉於時南京政肅民安蓋倚公
爲重朝廷下璽書事關機密者公必預焉賜誥命授光祿大夫加
贈三代又上言學校田賦鈔法鹽法官俸事多見施行正統四年
冬得疾日加猶時強起議公務明年正月五日薨公卿以下奔走
哭弔訃聞賜祭命有司治葬賢士大夫皆傷正人之沒以爲世道
惜公自小官至一品始終以國家生民爲心常取希文語名其退
食之堂曰後樂臨大事決大議眾或媿媿公獨奮斷眾或辟易公
獨邁往人有善告樂從如流斥奸闕諛無所顧忌下人有過多見
優容所與交游必輔於道憂國忘家老而彌篤所得俸賜率分姻
族屬續之日室無百緡平生立心行事一以不昧天理爲主享年
七十有八葬昌邑西新郭之原曾祖佑志祖谷保考士中皆賜光
祿大夫少保兼戶部尚書曾祖妣倪祖妣李妣王皆贈夫人配王
封夫人子男五瑄瑒琇珩珩孫男二愷懌士奇與公同朝四十年

晚辱公知甚厚未薨之先歲余蒙予告歸江右道過南京公時有
疾首造焉躍然起執余手論國事娓娓不片語及他嗚呼言猶在
耳安得復見正直憂國如黃公也哉瑒求書公墓上之石敬敘而
銘之銘曰

維天之仁生賢與才上以輔德下以康時士之高明識道在我我
祇行之其敢佚情萊有黃公桓桓其資于道克明行之弗疑遭逢
列聖既五十載崇爵重秩踐揚中外靡遑夙夜靡閒寢興殫智畢
慮顓顓用誠益下以惠益上以德敷厥謀猷亶時正直凡民被疾
猶痛在我民既有瘳我食斯下南交初附詔公拊循育之訓之煦
其春溫交人戴公曰我父母有詔歸公如去恃怙肅肅其度內直
外方不茹不吐推賢薦能先哲所存後天下樂公寔承之秉執有
確國之有公柱石在堂士之仰之如霍與衡爵圭林林疇並公志
遽不憇遺匪時之慨

逢二聖恩備始終何其愈久而愈盛也公居官敬慎在上前承顧問應對必盡誠必據理而忠厚爲本未嘗及人過失事於奉旨制敕視草卽有所見必具可否以聞多見采納所撰進文字上知出公筆輒稱善所奏對語及所治幾務退未嘗出口雖親厚不敢私涉有問蓋自守之嚴有素事太宗皇帝十有七年凡巡幸北京親征北虜翰林率公與楊公勉仁金公幼孜在扈從信任甚篤禮部郎中周納建請封禪羣臣亦多言此太平盛事上皆不聽時獨公之言與上意合既退作卻封禪頌奏之丁母憂召還上問百姓安否對曰安但郡縣窮治姦惡外親爲民厲遽詔罷之其兼春坊也小心盡誠多所裨益故尤爲儲君所厚而沈靜謙約以滿爲戒未嘗干人以私人亦未嘗以私干之兩考京畿鄉試四爲廷試讀卷鑑別公明奉敕修高皇帝實錄及五經四書性理大全書皆爲總裁志於扶植名教獎掖善類果於義事於利不苟取與未嘗一比匪人所與交必輔之於善不善去之不復顧小人有不滿公者屢

造言毀之賴上深知之不聽遽黜毀者而公自執愈堅意度蕭散雖身處榮祿未嘗一日忘山林幽澹閒遠之趣公退閉戶讀書賦詩而已初名廣廷試傳臚更名靖永樂初復舊名其字光大其齋居名晁庵因以爲號公十數歲喪父已有志問學內浸漬其母訓外則日受從祖子貞先生之教故德器不凡居家篤倫誼處鄉曲恂恂執恭讓旣冠薄遊閩中閩之前輩君子率忘年與交歸而從黃伯器先生講論得所歸宿之地而日進焉其學博究經史百氏下逮醫卜老釋之說亦皆旁通而用志性命道德之旨晚益有造詣爲文援筆立就頃刻千百言沛然行雲流水之勢賦詩取適其性情近體得盛唐之趣工書法行草之妙獨步當世四方重其文翰求者日接踵戶雖無厭倦意然非其不苟予其卒以永樂戊戌五月八日春秋四十有九其先自金陵徙廬陵宋忠簡公銓其十二世祖也曾祖鼎亨祖彌高父子祺累官延平知府母吳元進士永豐縣丞師尹之子永樂中贈公父翰林學士封母太宜人公

娶夏初封宜人洪熙初進封夫人子男三長卽種次穆次穗孫男
六所著文章有冕庵集扈從集若干卷公與士奇同郡同官知最
深未卒前二年有後死則銘之約既卒其孤又奉臨終之命索文
刻墓石嗚呼士奇先公生五年豈謂竟銘公墓哉蓋今九年乃克
成之銘曰

經國所資文武並施維武以靖維文以治巍巍太宗統一九有任
武暨文如左右手公職詞垣十有九禩秉恭執勤司帝之制玉冊
金簡天章龍文光華日星敷宣帝仁萬幾燕閒清問前席公所入
告惟帝時懌公所蓄志寬惠被下沕穆泯焉密贊鴻化春宮輔德
平直之行二聖惟明燭鑒公誠好文之朝儒林之首人聳其瞻公
視無有泊虛之存簡肅之度彼其何心有好有惡仲尼有言善者
好之善有好公沒思不衰寵章駢蕃賁終猶始始終之全曠代其
幾金螺在左文川在右埋壁有光上貫牛斗墓道之碣爲尋有奇
最行琢辭來者是儀

少保忠靖夏公神道碑銘

原吉

楊文貞公

士奇

公姓夏氏諱原吉字維詰其先家於饒州曾祖復祖希政元末爲
湖廣行省都事兵亂死之考時敏爲湘陰縣儒學教諭遂家湘陰
公自幼端厚好學年十三教諭公歿益知自勵母夫人廖守節教
于公終父喪卽出教里塾取束脩以資養而率其二弟恭侍婉愉
得母夫人懽心出入鄉閭其老長皆忘年賓禮之時已負鉅人度
喜怒不形里少年嘗被酒侮慢公里人共擊之詈之曰汝小人不
知鄉有君子耶有鬼物白晝附人禍福驚動里中或強公往觀卒
無所言他日復有言或問之故曰夏公端人也吾不可以近公一
無所動心洪武庚午歲以詩經選鄉貢入太學遂擢戶部前四川
部主事授承直郎進承德郎曹務叢脞凡倉庾府帑之出入簡牘
之著悉有條理同官後至於事有未通者咸以質公日環左右公
雖紛冗必爲之盡心蓋人人德公如師升戶部右侍郎授嘉議大
夫巡撫福建所至郡邑考察吏治咨訪民隱公明寬大人咸悅服

太宗皇帝人正大統轉左侍郎逾月升戶部尚書授資善大夫永樂初蘇松諸郡大水命公往治發浙西兵民十數萬疏決壅滯自松江黃浦東北以達于海水患乃息而撫恤曲當人不言勞又撫綏其飢民奏發廩三十餘萬石振之散給有方民賴以濟進資政大夫初建北京采宮殿材於東南命公自南京抵北京督視運送給以錦衣衛官校且命有不率命便宜行事公於號令中備矜恤之意人人效用太宗巡狩北京公預扈從命兼行在禮部都察院事歲餘車駕親征北虜今上以皇嫡長孫畱守北京命公輔導庶事修舉京師肅然太宗還良喜賜公鈔千緡綵幣四表裏羊酒鞍馬自是屢奉命侍今上有司奏公與吏部尚書蹇公愿官九載皆賜敕嘉獎有淳良篤實如古名臣之論太宗親宴之別殿無幾賜誥命追封祖考皆爲資政大夫戶部尚書祖妣爲夫人封母爲太夫人重修太宗皇帝實錄命公監修書成賜鈔織金錦衣文綺表裏北京宮殿成奉敕召仁宗皇帝及今上於南京二聖喜公至賜

宴勞及鈔白金鞍馬北虜復犯邊太宗皇帝將親征公言今邊備不足請遣將無煩六師忤旨罷官仁宗皇帝嗣位卽日復公戶部尚書公以母喪未終辭仁宗曰國家不幸有大事正朕與卿等協心比力之時如卿以親喪辭則朕亦未當在此公乃不敢復言遂加少保仍兼戶部尚書賜玉帶今上正位東宮加公兼太子少傅少保尚書二職如故賜誥命追封曾祖祖考皆爲榮祿大夫少保兼太子少傅戶部尚書曾祖妣祖妣皆一品夫人賜銀章一其文曰繩愆糾繆且諭公曰朕有過舉卿但具奏來以此識之朕不難於從善賜鈔萬緡御用米二十石胡椒二百斤公感知遇之厚鞠躬小心靡或不盡修太宗皇帝實錄命公監修仁宗皇帝崩時今上監國南京至則喪禮及卽位之儀皆具皆公一二人所預定上旣嗣大位公以舊輔尤重倚注公亦孜孜惟謹寵賚日盛修仁宗皇帝實錄仍爲監修庶人高煦反上親率六師擒之公預扈從還賜白金文綺等物甚厚賜銀圖書一其文曰含弘貞靜蓋褒公

之德云明年扈從巡邊既還上念少師蹇公及公等四人者皆春秋高欲優逸之賜敕嘉勞命輟職務而仍其祿朝夕侍上備顧問謀議而恩遇益厚兩朝實錄成賜白金織金羅衣文綺表裏鞍馬賜宴明日入謝暮歸第得疾遂薨宣德五年正月二十七日也壽六十有五歲上聞計震悼遣禮部尚書胡濙賜祭贈特進光祿大夫太師諡忠靖賻鈔萬緡敕有司營喪葬官其子瑄爲尚寶司丞仍復其家朝臣自公侯貴戚下至郎曹將校咸往弔祭衛卒巷氓亦有歎息至流涕者公天性至孝友其弟原啓原禮皆厚原啓沒愛其子如子讀書鄉校時教諭史九韶雖非授業師遇之必拜雖貴不變既貴九韶升教國子月恆分之祿九韶將老朝廷從公請命致仕公與人交久而敬平生故人在患難率調給之遇士之貧者振之有顛躓失所者援之德雖微必報而未嘗存怨惡心接人溫然處事善善長而惡惡短襟宇澗深閎廓不見涯埃嘗有從隸汚公金織賜衣懼欲逃者公曰汚可浣何懼爲有吏壞公所寶硯

石匿不敢見公召吏諭之曰物皆有壞吾未嘗惜此慰遣之於時卿大夫雅量推公第一知者蓋比公於王子明韓穉圭之度其在上前所言必歸仁厚臨政必酌大體其預宥密雖泯然無迹蓋有陰受其德者矣故不問貴賤疏戚識不識皆知其爲善人長者喜爲詩四方士重公名得其一篇一詠藏以爲榮公配鄭氏再封皆夫人子男三琬瑄瑾公卒之三月歸葬湘陰其家以墓碑屬予子與公同朝三十年晚益親厚相知又嘗爲余道平生余豈意遂志公之墓耶銘曰

沂夏厥初以國爲氏衍于會稽縣縣厥余大末之邑後來徙居暨唐中和復徙于番懿夏之世逢掖其服詩書有承德善有續轉鄂而潭自公祖考積厚必發公奮起紹燕歌鹿鳴來與計偕官任其賢政用其才司徒屬暨掌邦教寅恭小心寬仁允蹈參決大議洵任重負不亟不徐雍容雅度如彼喬岳截焉弗移其氣默運澤潤良多祇事列聖既四十載夷險一道其烏几几國有老成堂有

柱石胡不憚遺當二興惻既榮且哀隆隆寵光於乎忠靖沒世不忘

戶部尚書古公神道碑銘

朴

楊文貞公

士奇

宣德三年二月十八日戶部尚書古公卒計聞上遣進士康琰賜祭命有司給舟歸其喪且營葬事既葬其子本奉禮部尚書蔚公所述事狀走北京介少保夏公求書神道之碑余與古公同朝三十年知其有廉清之操諾而不辭公諱朴字文質號素軒古氏世家河南陳州諱義甫娶王生諱安道娶程公之大父母父母也以公貴公之大父父皆贈資善大夫戶部尚書大母母皆贈夫人公洪武中舉鄉貢爲太學生奉命清理郡縣田賦圖籍丁父喪歸服闋隸五軍斷事理刑遂奏家貧願仕得祿養母太祖皇帝嘉之除工部營繕主事授承仕郎迎母就養京師居無幾母沒官給舟歸葬服闋改兵部司馬部主事升武選司員外郎授奉訓大夫再升郎中授奉議大夫遂升兵部右侍郎授嘉議大夫太宗皇帝正大

統轉左侍郎授通議大夫賜文綺襲衣上巡狩北京侍仁宗皇帝監國嘗奉命權禮部兵部及詹事府洪熙中改通政使是歲升戶部尚書投資善大夫賜誥命追賜二代遂謁告歸省墓賜鈔襲衣公事親孝非其義一豪不苟取居官臨事蚤作夜思勤勞弗懈一志於公無敢干以私者謹守祖宗成憲不肯踰越或言事久於時小過不及者亦當損益就中終不爲動永樂中建北京宮殿董伐木之役於江西有愛民之心竣事特被賜資戶部主事劉良素行不檢滿三載公考其績下良叩上之左右人求公最考公曰貪侈之人幸未覺露不改行終當敗最考不可得也良遂誣奏公他事既就逮繫太宗皇帝燭其誣竟釋公他日吏部奏授良誥命封贈其父母仁宗皇帝曰豈弟君子福祿攸降是嘗誣奏大臣罪者其得爲君子乎不與良卒以賊敗眾服公之明公所治職務退未嘗語其家人冰蘖之操確乎不移平素不事生產華靡雕琢之玩纖豪不畜公退清坐一室書冊自娛嘗病士奇往問之入其齋室几

案閒獨有自警編一帙可以觀其所存矣洪熙誥辭有端厚簡靜
操行清潔之褒蓋見知於上者深矣卒之日無銖釁之積以遺子
孫男三瑄璟李本孫男若干銘曰

古有恆言曰公生明何道而公其惟廉清廉之爲行士分內事曷
世由之什靡一二士行弗貞理曷由興嗟文質甫爲廉有誠厥廉
伊何冰壺玉映迨其屬纊室類縣磬紛彼貴仕夏屋渠渠嗟文質
甫歸兮焉居紛彼榮爵田互阡陌嗟文質甫歸兮焉貧其履湜湜
其心休休汚者之嫉清者之迷相彼貪人潢潦之溢崇朝而盈涸
不待夕嗟文質甫皦乎不緇永揚休聞其在斯碑

黔國沐公定遠忠敬王神道碑銘

楊文貞公士奇

正統四年三月十八日黔國沐公薨於雲南之楚雄計聞上悼念
輟視朝加隆卹典遣官賜祭者再追封定遠王諡忠敬親王亦再
遣祭其子護喪歸南京公卿文武羣臣及所過方岳大臣皆祭以
薨之歲十一月廿六日葬江寧縣長寧北鄉觀音山先塋之次沐

氏鳳陽定遠人其先所自具前翰林學士王景所著黔寧昭靖王
神道之碑王之高祖考曾祖考祖考以昭靖貴皆追封黔寧王高
祖妣曾祖妣祖妣妣耿皆追封黔寧王夫人昭靖四子伯諱春襲
封西平侯歿諡惠襄仲即王叔昂右軍都督府同知季昕駙馬都
尉王諱晟字景茂自少氣宇閎厚端慤凝重聰悟過人而博學遠
識恭慎寡言喜愠不形於色高皇帝重之旣冠授後軍都督府僉
事夙夜祇勤升授特進榮祿大夫左都督時惠襄繼昭靖鎮雲南
薨王嗣封西平侯仍奉命鎮雲南王承父兄之後秉誠殫慮益弘
遠圖威服德懷恪勵夙夜先是麓川不靖諸蠻逐宣慰使而分據
其地王適至奏發兵平之復奏以其地置孟養木邦孟定三府鎮
沅威遠二州干厓潞江灣甸大候者樂五長官司而歲徵其貢賦
又於潞江之西置騰衝千戶所以控制之夷遂帖息太宗皇帝臨
御之三年八百蠻酋侵邊王遣將先率兵討之躬率兵繼其後及
蒙自縣蠻聞王來遂遁進禽其酋誅之事聞賜璽書白金勞王四

年安南叛命征夷將軍率京師及湖廣等都司兵討罪命王佩征夷副將軍印充左副將軍率雲南等都司兵分道進討王率兵進蒙自經野蒲斬木通道以入先遣偏裨攻奪猛烈棚華關隘賊徒悉遁遂築堡駐兵造舟分遣諸將出宣光江口奪澳沔寺沙昇舟夜出洮水陣師遂遣將引兵泝流攻賊之富良江自旦鏖戰抵幕賊引卻翼旦諸將咸欲奮擊王曰受命弔伐所欲得兇渠數人而已縱殺非皇上好生之心乃止遂造浮梁渡師時征夷將軍大兵亦至迺合攻寇之多邦城柵繼擣其東西二都及盤灘困枚嚕江仙侶等寇悉破之寇首黎季犛父子狼狽棄其眾獨挈家屬及左右心腹遠遁於海王合征夷將軍兵追至日南州奇羅海口禽俘無遺械送京師凡得郡四十八縣百八十六戶三百十二萬五千九百獲象馬牛畜軍資器仗安南平六年春班師入朝賜號顯忠輔運推誠宣力武臣特進榮祿大夫右柱國封黔國公食祿二千石賜誥券玉帶金幣命子孫世襲既大宴上親製詩褒嘉又日賜

宴於便殿還鎮雲南是冬安南餘寇攜貳命王佩征夷將軍印總兵討之王師壓境寇遁入乂安海島追至占城之境禽寇首陳季擴阮帥鄧容等送京師誅之師還仍鎮雲南十七年富州蠻酋積逋賦不入朝廷命王發雲南貴州兵討之蠻據險以抗王遣兵斷其後諸將請急攻王曰威服不若德服遂使人諭以禍福蠻即遣子詣京師謝罪悉償所逋仁宗皇帝嗣位重王勳德老成詔兼太傅召至恩禮加厚遂命佩征南將軍印還鎮宣宗皇帝初嗣位遣使齎璽書及金幣勞之皇上嗣位恩禮視宣德之初明年改元正統賜金幣加厚是年冬四川會川黎溪蠻合底泊等蠻爲亂奏遣弟都督昂討平之二年冬馬龍他郎甸蠻不靖復奏遣昂平之三

年麓川思任發擾邊侵掠騰衝南甸遣人諭之不下奏躬率兵討之兵至潞江王勉諸將曰出兵尙謀不專恃勇且逼瘴月非用武之時今官軍已集如賊能畏威悔過摠誠謝罪請命赦之斯亦可也遂復遣人諭之不下乃命弟昂及都督方政等率兵前進王尤

戒其慎重時王整兵在後政等乘夜渡江破賊柵賊眾奔北官軍乘勢追至景罕等寨斬首三千餘級獲象三十餘政奮勇獨進賊伏兵四發政力戰死之時春已半王慮瘴發非官軍利遂旋師將駐金齒會有旨命王還鎮王至楚雄疾遂薨方疾革時顧弟昂曰吾父子兄弟受國家天地罔極之恩吾不能報矣吾弟勉之吾一家子子孫孫世堅忠誠保臣節無忝君親又顧昂曰斯役也雖偏將失利固吾總帥之過此賊必不可貸汝勉之勉之言訖而逝歸櫬所過道路城郭無貴賤小大迺拜哀慟蓋王在鎮久惠愛之被於下者深也王忠孝之誠本乎天性無或弗盡與子弟言亦倦倦斯道友二弟甚厚教子孫動以禮法家政秩然位極人臣而禮賢重士虛己聽納寬裕有容未嘗面責人過凡文武屬吏有過者惟恐王知務自掩蓋其因自悔徙行者亦多王明於韜略然以仁為主蠻夷有罪未嘗輒加兵誅必諭導使改數諭弗悛乃奏發兵逮兵入境若夷能知懼罪亦曲貸之與之更新雖臨陳必戒麾下毋

縱殺戮賞罰明信威愛並行至於完城池飭武備訓將士理屯田通水利實倉庾恆謹成法若輕徭賦問疲瘵尤勤致意學舍弊陋具材儻工葺之不以煩下治公有暇手不釋卷稽古明道動師昔從容其文武之才仁義之帥也配程氏追封定遠王夫人子男一儼襲封黔國公孫男一玘至是王之子以事狀求余書神道之碑謹按狀敘而銘之銘曰

天啓皇明於淮之右配天與地篤生帝后二聖至仁作民父母心存萬方包含徧覆矧孤在里靡攸怙恃二聖矜惻曰其子子鞠之誨之勞劬備周以長以成有偉才猷帝有恩言爾復爾氏懋乃樹立華乃先祀嗚呼昭靖盛德豐功皎日之誠持孝與忠嗚呼忠敬續乃列考惟孝之執惟忠之蹈發軔都府簡在宸心夙夜弗遑秉其慎欽往綏滇人幾五十年率考之行敷帝之恩俾食俸衣免其寒飢重學崇師導之尊卑平其政令時其作止人戴惠慈淪骨浹髓有或弗惠以諭以誨洵誨弗悛式劉以戒交人悖凶披猖爲狂

遼天毒氓軼我邊疆奉詔出師往行天討桓桓疾馳雷驅電掃富
良飛渡如履坦途兩師窮追縛寇海隅解縱脅從宣布教條爰整
師旅凱歌歸朝飲至策勳上公錫爵嘉寵元臣龍章輝灼滇人之
思瞻望旆旌帝不忘遠申命南行祇事五朝鞠躬小心奉國忘家
志如堅金寸棘未剪躬不寧處過自偏裨於躬引咎終于王事德
善恐多顯顯華衰千歲弗磨沐世子孫奕奕象賢篤忠與孝永光
其傳

惠安伯張公壙志

昇

楊文定公

傳

公諱昇字叔暉今太皇太后季兄也世居河南永城高祖文銘曾
祖景惠祖從義世以積善相承考麒以勳戚任指揮使追封彭城
侯妣全氏封侯夫人三代祖考皆追封彭城侯妣皆追封夫人伯
兄景襲彭城伯卒再襲仲兄旭府軍衛指揮使公初以城守功
授義勇衛正千戶永樂三年升羽林前衛指揮僉事調府軍衛七
年授誥封昭勇將軍十二年隨駕北征二十二年升後軍都督同

知洪熙元年升左軍左都督宣德元年宣宗皇帝征武定州三年
巡邊俱命公守北京四年上優禮至親命輟左府事朔望奉朝請
朝廷有大政事亦預議後奉太皇太后命弗預正統五年九月
封惠安伯授奉天翊衛宣力武臣特進榮祿大夫柱國歲祿一千
一百石賜誥券子孫世襲六年正月十三日以疾卒壽六十有三
訃聞上深嗟悼輟視朝一日遣官諭祭敕有司賻葬太皇太后遣
官致祭以是年二月某日葬宛平壽安山先塋之次公爲人端重
孝友之德夙著于家閨門整肅教諸子有方平居簡默臨事卓有
定見歷事四朝公勤忠謹未嘗有過宣廟爲皇太孫時往來兩京
及隨侍太宗文皇帝北征皆命公保衛出入起居深有規益退而
未嘗形於言宣廟以保衛功嘗欲加封爵固辭其居顯官恆自謙
抑每升拜祇畏如不勝其臨政事必咨詢同官審擇而行不恃己
見與人交尙道義遇文學士必加禮敬服食尙儉素不爲富貴態
而急於利人常蓄藥石以療人爲糜粥以濟飢歉公餘畱心載

籍至老不倦往古治忽及忠臣孝子事皆能道其詳每遇事輒以訓諸子嘗燕居諸子侍適雷雨暴至公肅然起敬曰語云迅雷風烈必變學者不可不慎終召諸子語之曰吾素無功德朝廷篤念親親與高官一家祿食莫能報稱喪事不可干朝廷宜從節儉依文公家禮無作佛事無徇世俗爲葬儀資財勞人無久停柩于家毋煩費親戚朋友葬宜深坎毋高爲墳塋吾所注意者不幸長子蚤喪孤孫數人諸子宜加保愛爾等能體我心則爲孝配王氏封夫人子男六長軾襄府典寶次軾次輪府軍左衛指揮使次軾次軾次軾軾先卒女六長適劉濬威遠衛指揮使次適唐彥金吾左衛指揮同知次適李純燕山右衛指揮使次適山後府軍前衛指揮使餘在室孫男八人女一人嗚呼前代勳戚賢否得失具載信史世爲勸懲若公者可謂生順死安生榮死哀者矣雖沒以中壽而不亡者遠爰述其概用納諸墳以示永久云

冷面寒鐵公傳

彭參政

公姓周初名日新在國初受知太宗文皇帝嘗獨以新字呼之遂更名焉字志新世爲南海人居郡南郭外之高第里永樂甲申拜監察御史彈劾不避權要凡知無不言而言無不盡雖屢犯天威公言愈懇切不少變貴戚皆畏之目爲冷面寒鐵人因稱之曰冷面寒鐵公公初爲郡庠生貢入太學有時名入選授大理寺評事以剛直著讞獄平允莫有稱屈在列戚推遜焉每有疑獄必決之公公一言而白至是轉風憲風裁益揚人相競畏或怖小兒曰冷面寒鐵公來皆匿已而擢雲南按察使未及莅政有命轉浙江有冤民逮繫數載聞命下喜相告曰冷面寒鐵公來也吾屬無患矣公至洗其冤放之有一巨商遠回未抵家而日暮恐孤行爲人所剽掠潛以其貲置一祠石下至家妻問之商告以故明日求之無有也以公神明往訴焉公曰是必而妻有外遇也覈之果然蓋歸語妻時爲姦人所聽而是夜先往取之矣其燭姦如此境中暴虎嘗害人公爲文告城隍須臾虎詣伏罪格殺之初來行道上有蠅

納羣聚馬首尾之見暴屍一軀無他物惟一鑰及小木私記收之
及至令人市布取入比印號不同者卽發還已而得同號者鞠之
乃劫布商賊也悉以其贓召布商家人給之家人大驚時商去已
二載於是始知爲盜殺也爲政多類此它如辨豆獲盜人皆服之
嘗巡屬縣易服色入觸縣官收繫獄中遂知一縣疾苦明日逐公
乃自獄出縣官恐懼伏謝竟以謝去由是諸郡縣吏聞風悉股栗
莫敢肆其姦察案一日以鵝炙餽公公懸之後有遺者指示之無
復有以豪髮干公其察案有受遺者必問冷面寒鐵公知否公未
顯時配夫人嘗治褥以給及此偕來瀾處如貧日無難色同僚私
屬內燕公夫人往荆釵布裙大類若田野婦各婦慚惡遂更相變
爲澹素公雖處家儉樸而轉移人若此脫大柄用而侈聲樂不爲
之減者少矣朝廷命錦衣千戶如浙拏賊吏卽受吏贓公時進
遇諸涿州捕之繫于涿獄千戶逸走詣闕奏上上怒令馳驛縛
至旣至伏丹陛下猶口口歷陳其罪不已上愈怒命肆諸市臨刑

大呼曰生得爲直臣死當作直鬼是夕奏文星墜上大悔枉了好
人不悅者久之問左右曰周新何許人對曰廣東上曰廣東有此
等好人自後嘗見形于朝或見一人衣紅衣立日中上呵之問爲
誰對曰臣周新也上帝以臣剛直命爲浙江城隍爲陛下治姦臣
貪吏言已不見天顏慙然公少鯁直勁厲姿幹高大俊偉異常好
學能文尙凌厲在童子行而氣宇凜若成人人無犯者有小挫必
憤憤不平必直之而後已在庠校同列有過則面責至人無所容
人以公爲大甚輒抗聲曰責善朋友道苟阿諛胡取友爲有過者
卽改恆恐公知之蓋其養可知已爲政尙大體問無明事斷如神
人以爲生閩羅姦宄潛伏羣吏膽落民無犯令犴圜皆空然猶愛
恤小民惠澤草野雖三尺童子皆頌其美至今閩廣父老猶解說
其事公沒夫人獨挈公遺衣及遺書數卷歸廣貧居如洗然新昌
楊公信民去歲來南巡撫時存問其家每月周之以俸嘗語人周
志新當代第一人吾黨所未及也森於公同里爲叔行且蚤知於

公今公死慮歲久湮沒因暇筆其粗梗以識其爲人或謂公發姦
擿伏有廣漢風而宋有鐵面御史公似過之故因當時之稱傳之
曰冷面寒鐵公云

皇明名臣琬琰錄卷之十九

皇明名臣琬琰錄卷之二十

都御史向公神道碑銘

寶

金文靖公

幼孜

公諱寶字克忠姓向氏別號疏菴其先河南之開封人宋僕射文
簡公之十五世孫也文簡四世孫蔚嘗扈蹕從宋高宗南渡子永
性仕孝宗累官太中大夫封魏國生仕煜官朝奉大夫朝奉生公
道爲臨川縣丞娶進賢許氏遂以朝奉葬其邑潤安因家焉自是
爲進賢人祖雲翔父允恭以公貴皆贈資善大夫都察院右副都
御史兼詹事府詹事祖妣張氏母熊氏皆贈夫人公資性穎異五
歲能誦孝經七歲通四書章句過目不忘稍長肄業邑庠教諭丁
之翰授以書經甚見器重嘗從友人假通鑑綱目七日卽遣還之
閒舉以問答之如響洪武甲子科舉復行遂以書經薦于鄉明年
登進士第觀政都督府丙寅授庫部試員外郎丁卯實授職方員
外郎階奉議大夫壬申丁外艱明年詔起復仍前職丁丑秩滿升
通政使以不善奏對力辭改應天府尹階嘉議大夫戊寅坐事謫

廣西蒼梧甲申太宗文皇帝入正大統復公前職己丑以譴逮獄
憲臺庚寅冬左遷兩淮都轉運鹽判官未幾復訟繫南京乙未春
宥復前職命督運糧餉並總督淮安諸郡漕運材木甲辰秋八月
仁宗皇帝卽位驛召還朝上方欲擢用公適交趾缺按察使部首
以公爲奏上未許之遂以爲都察院左僉都御史翌日入謝升右
都御史階資善大夫未幾復命兼詹事府詹事特賜楮幣羊酒公
雖屢見挫抑而志於有爲到官不數日卽條陳八事以進其一曰
錄用勳舊二曰設置諫官三曰選舉賢才四曰簡練將帥五日貴
重有司六曰考覈吏員七曰監生資格八曰疏通鈔法其言皆懇
切有裨於時政者上命次第行之今上皇帝卽位之初以南京都
察院缺人特命往莅焉宣德戊申夏秩滿入覲公時以嬰疾艱於
拜跪上念其老特賜敕令致仕歸其鄉然自是疾益加劇遂以八
月四日卒于南京之官舍訃聞上悼歎之特遣使賜祭命官給舟
還其喪復命有司治祠墳以其年十二月丁酉葬潤安九世祖朝

奉公之塋公生元至正丙午六月九日至是享年六十有二娶羅
氏封夫人子男五長劉孫次可觀可規可靚可寬噫公爲人清介
公方厯事四朝逾四十年初居庫部職方時公牘日累千百次第
剖析無所停滯眾皆推其勤慎及爲京尹豈弟廉明興學育才恆
加督勵撫善摧惡強暴悚懼公庭肅清終日不聞鞭箠民皆感服
及居憲臺振舉紀綱以德濟威嚴而不苟士論多之屢遭黜斥辭
氣浩然未嘗少屈所至輒開館延士觴詠賦詩未嘗以夷險易志
故廉厲端確之行始終如一日性至孝嘗以祿不逮親爲歉時忌
日悲泣如初喪奉繼母不違其志撫諸弟友愛切至處鄉里恂恂
自下交友朋恭謹謙抑久而益篤平居言不及禍財不苟取與疏
食水飲自處泊如其學博究經史百氏爲文章有理致詩雅健可
愛有疏菴日橐若干卷學者稱之爲疏菴先生云銘曰
文簡之裔魏國繼之益顯其世逮于朝奉實葬南昌猗歟向氏閔
閔煌煌公年弱冠名薦南宮祇事列聖太祖太宗洎紹厥緒□□

歷顯融啟踐中外有聲颯颯公在官守執勤秉恭寬惠愛人卹于瘼恫公有言責勵其清忠不撓不激雅度雍容公志之篤操履之堅夷險一致隨遇而安公老致仕始終克全公歿有榮無憾九原士論所歸如公有幾匪公之能惟德之比匪惟有德而又有子圖其不朽屬銘太史最行琢詞揭石墓道後千百年其永有耀

顧都御史言行錄

楊尙寶

顧佐字河南太康人中進士歷仕洪武宣德間官至左都御史除莊浪知縣午節會射將佐以文士易之公連發三中無不驚服尋擢御史守正嫉邪為應天府尹剛稜不撓吏民畏服勳豪貴戚為之斂手政聲赫赫議者謂類包孝肅之知開封府宣德三年六月中早朝罷召楊榮及楊士奇問廷臣中誰可使掌憲兩人久未對上曰未必都無一人臣士奇對曰通政使顧佐廉公有威曾任御史及按察司皆有風采榮曰佐亦嘗為京尹能防禁下吏政

清弊革上喜曰顧佐乃能如此升右都御史賜璽令考黜不肖洗滌積弊佐奏黜其不肖者二十餘人

宣德四年顧佐自升都御史憲度嚴明宿弊清革下至吏卒悚惻凜然吏有遭笞者摺佐之過謂受卑隸賂放歸悉具姓名以聞上密以示臣士奇且曰爾不舉佐廉乎對曰所訴之事誠有非誣蓋今朝臣月俸止給米一石薪炭馬芻咸資於阜不得不遣半歸使備所用阜亦皆樂得歸耕實官阜兩便此京師大小臣僚皆然臣亦然自永樂以來如此仁宗皇帝固知之所以增朝臣之俸上歎曰朝臣之艱如此因怒訴者曰朝廷用一好人輒為小人所排欲下法司治之臣對曰此末事不足上干聖怒但付佐自治恩與法並行矣臣退上召佐以吏訢詞授之諭之曰放阜隸耕使給薪芻京官皆然不足為過小人不樂檢束誣陷正人汝自治之佐叩首退召吏示之狀吏恐甚佐曰上命我治汝我姑容汝但改行為善竟不治之上聞之喜曰佐得大體矣數月有囚告佐累累枉人重

罪不聽訴理者上大怒召楊榮及臣論曰此必有重囚教之排佐
小人陷正人不可不究治遂命三法司鞫之實十戶賊清殺一家
無罪三人當死代寫狀教之誣告上曰不誅之佐何以行事立命

磔清於市

並聖諭錄

顧都御史佐性嚴重聲望偉然未嘗口毀譽人旦晚東朝房小憩
前阿雙藤立戶外官僚行道以此爲驗往往有輓驢駐馬折而還
者雖公遭時得君之盛要亦有惛伏彈壓之實焉

午門外東直房六部都察院堂上官候朝之所兩門入惟都察院
正官獨處一小夾室近歲都御史顧公佐非公事未嘗與諸司羣

坐

並水東日記

太康之墟卓有良臣烈烈汝介匪矯而眞高簡不接一榻凝塵尹
正天府明察如神擢中執法實表縉紳赤棒生氣公論以伸事歸

臺閣弼于一人

彭部撰贊

大理卿虞公言行錄

謙

尹侍郎直

虞謙字伯益鎮江金壇人仕洪武宣德間官至大理寺卿公自幼
秀朗端重聰敏好學洪武乙亥由太學生擢刑部山東部郎中升
杭州知府永樂初召爲大理寺左少卿尋升左副都御史甲辰春
轉大理寺卿恆曰爲臣之道愛君愛民二者愛君崇其德愛民厚
其生爲副都御史奉命巡視揚州淮徐旱災至則疏民所苦請發
廩振貸官爲贖還所賣男女爲奴婢者皆從之又奉命督兩浙蘇
松諸郡運賦建議丁多而糧最少運北京丁多糧少次者運徐州
丁糧俱中運南京淮安丁少而糧多存畱本郡縣倉又奉命巡撫
浙江察廉糾貪建議便民十數事多見施行仁宗皇帝嗣位欽恤
刑獄而嚴大理之選曰是天下之平也於是改公爲卿先是都察
院論誑騙罪准洪武榜例梟首公言比奉詔書自今准律斷罪誑
騙在律當杖而流梟首非詔書意上曰虞謙言是
天津衛倉災焚糧數十萬御史廉視言主典者盜用故縱火以自
蓋追逮幾八百人不勝考掠皆誣服應死者百餘人公察其寃白

於上得減論於兩法司及四方所上獄議皆親閱之必當必平於
大辟罪尤加意曰彼無憾斯我無憾矣時有詔求直言公言七事
其一用人曰用得其人則治道興非其人則治道墮人主之職惟
在擇人而已其二興學校曰教育之道本於師範不在於備而在
得人庶有成效三曰都察院耳目綱紀之職用以激濁揚清今專
俾治獄非設風憲本意四曰廣儲蓄今國用空乏宜預爲備五曰
北京八府之民困於養馬宜分給無馬郡縣喂養以蘇圻內六曰
鈔法不通由於出多而入少今日多方收之而不輕出民艱於得
鈔則自流通七曰京師盜賊之繫由於軍民工匠每十家編爲一
甲使互相覺察出入一家有犯十家連坐有能捕首免其連坐之
罪皆切中時弊公儀觀偉然瀟灑絕俗以詩名於時有雪齋豪
喜寫山水木石有倪雲林韻致宣德二年卒年六十三並楊士奇
撰墓碑
尹直贊曰蘭臺棘寺刑乃攸司惟公廉平仁廟簡知遂自郎署擢
都憲紀歷數多年累效勞勤讞議平反惟慎惟明敷陳剴切允愜

輿情

工部主事劉公言行錄

尹侍郎直

劉季篴諱韶字季篴以字行浙江餘姚人進士歷仕洪武永樂間
官至刑部侍郎左遷工部主事

君自幼端靜喜學問既承其家訓長而進學登洪武甲戌進士第
授行人司行人嘗持節使雲南四川朝鮮所至宣上德達民隱餽
鱷一豪無所受事聞賜鈔襲衣丁丑升陝西布政司左參政先是
陝有逋賦民積匭不能輸有司峻刑督之君至慨然曰民困不能
輸爲之父母又忍峻刑督之耶與其寮謀分行郡縣解其繫緩其
期勞來緩輯而從容勸誘焉民皆感激曰是赤子矜念我我可不
戮力以累仁人奔走假貸以輸無幾畢完
陝不產硃砂而歲月有課額民窘不能償至或償其家者君爲奏
罷之
洪渠水溢爲民患躬行視之爲設法治堰民賴以安蓋凡可以利

民者率盡心焉

召爲刑部左侍郎尤懇懇重民命平反具獄數事陝平民王某爲強盜所引逮至而所引者已伏法不能自白君察寃召所引者之妻子使識之而聽其詞竟得實王免於誣有典守錢穀而虧免者旣被逮則援引千餘人同罪君廉知其誣卒辨所誣引者釋之河陽逆旅夜有朱趙二人異室而宿朱怨家後追至而誤殺趙朱實不知道逆旅主人疑朱殺之追執送官鞠訊考掠朱遂誣服不敢求辨君獨曰是偶邂逅相聚非素有負且計其裝非有圖也特緩其獄遣人密察之無幾有司竟得殺趙者而朱以緩獄不死揚州民胡氏夜有賊入其室殺人而遺刀屍傍且視之柄有鄰家蘇氏私識官捕鞠蘇蘇曰家失此刀久矣不服旣備極諸刑竟誣服君潛使持刀往察其鄰一童子識之曰我家物也遂得賊而釋蘇蓋其理刑一以求生爲務永樂乙酉纂修大典命太子少師姚廣孝禮部尙書鄭賜監修而擇有文學者一人爲之副遂以命君討論裁

處人多服之庚寅坐失出入罪左遷兩淮鹽運判未行復畱改工部營繕主事躬勤治職未嘗以崇庫爲意癸卯卒年六十一君爲人清素雖厯顯要而泊然自持雍容雅度有犯不校閒暇手不釋卷治經長於春秋喜吟詠冲澹優閒有陶靖節韋刺史之趣

並楊士奇

撰墓志

尹直贊曰有學有行風度醞藉早擢甲科使車屢駕于蕃于宣有裨上下入佐秋卿恪勤夙夜祇體欽恤隱鬱舒達甯失不經寧職可罷厚德永垂崇卑奚訝

刑部尙書趙公神道碑銘

印

楊文敏公

榮

天之生才將以資於世用然必國家有以教養之於未用之先厯試之於方用之際及其練達旣久而後大用之以盡其才故能建功立業進退協道足以震今而耀後焉若故資政大夫刑部尙書河南趙公蓋其人也公諱珣字雲翰其先爲邢臺鮮于社人元季擾攘公之父攜家避兵於平陽夏縣而公始生時寇出四掠公在

襁褓母嘗抱匿林莽間迫於虎置公於地虎熟視而去聞者異焉
世靖將歸邢臺道經於汴閱其風土而樂之因家於汴遂爲汴人
公自幼穎敏嗜學進退動止迄於老成旣長游學郡庠已卓然於
儕輩中洪武丁卯由郡薦入太學生嘗被命董事山東以克廉謹
受襲衣楮幣之賜歲庚午授兵部職方主事命覈天下兵馬暨諸
路屯戍補其缺而增所宜置公得其實具圖以進太祖皇帝以爲
能乙亥升武庫員外郎慎密小心尤爲當道者所重戊寅升浙江
右參政剽繁治劇事無凝滯時海寇出沒劫取人財公以計捕之
境內獲安尋丁外艱吏民慕之如離父母太宗皇帝嗣臨大寶以
公能專對命使南交至則誕宣德音威兼布夷長款服旣歸卻
其金寶之餽太宗聞而嘉之錫賚優渥擢刑部右侍郎未幾轉工
部再轉禮部受命往封西寧侯宋晟歸拜禮部尙書賜燕於華蓋
殿并徹御筵饌羞遺其母以榮之戊子仁孝皇后崩逝公詣北京
卜山陵告成膺楮幣之賜壬辰督創隆慶保安永寧諸郡治撫輯

有方而新集之民悉安其業而不知其勞丁酉改兵部尙書明年
已觀公之仕也攄誠效勞知無不言時有獻納多契上意雅性節
儉雖貴列六卿而自奉澹泊及退居也幅巾藜杖蕭散自如不以
外物經心公之進退協於道者如此是宜有銘銘曰

於皇太祖建學育才士習丕變人文聿開疑疑趙公遭值明世肄
業泮宮用成大器學優而博識敏而明列職內外式殫厥成明明
太宗惇信崇德擢任亞卿旋拜宗伯直清寅畏夙夜惟勤和厥上
下治茲神人乃遷司馬克詰戎政兵食之充畜牧之盛伊誰致之
實公之爲中外咸曰任公其宜邦禁之司仁廟之命昭哉五刑惟
恤惟敬國有六卿公歷其三僚屬具瞻泰山巖巖公仕四朝終始
一節旣老而休允矣明哲維公之賢生榮死安作此銘詩以永後

觀

右都御史王公神道碑銘

彰

楊文敏公

榮

國朝稽古爲治用人之法惟舊是圖列聖相承率由茲道於是者

德宿望之臣敷歷中外薦躋顯要以至持衡秉鈞先後數十年榮
以內艱去已而起復專理塞外兵政疾作太宗遣中官偕名醫往
視疾已入謝復令調攝於家既康復命詣塞北訪牧地遂具順川
等處以聞於是出廩馬牧之孳畜蕃息壬寅大駕北征命公督軍
餉措理有方兵食充給仁宗皇帝嗣位改刑部尚書居職六年式
敬由獄宣德庚戌力以疾辭宣宗皇帝矜其賢勞特賜致仕既歸
沐構一室於東郊名曰石泉茅屋日與親友爲歡以樂暮年正統
丙辰七月十有五日以疾卒於正寢享年七十有三計聞上遣官
諭祭仍命有司營葬公生乙巳某月某日曾祖諱某有隱德祖諱
和之父諱得以公貴俱贈資政大夫刑部尚書祖妣張氏母侯氏
俱贈夫人配胡氏封夫人子男四長曰愚舉賢良方正授潞州襄
垣縣丞次魯次鈍次朴女二孫男五瑄瑛玘琮珍孫女五以是歲
八月廿有二日葬公於祥符南百畝岡之原愚奉都御史顧公佐
所述狀來京謁予泣拜請銘惟公儀度英偉倜儻多才善屬文喜

歌詠有儻父集二卷藏於家嗚呼士君子出處進退求合乎道而
名始終者往往有其人焉何其盛也乃宣德二年夏四月朔日都
察院右都御史王公以疾卒明日上賜之棺且命禮部遣官祭之
兵部給舟車歸其喪有司爲治墳塋越月其孤瑾奉監察御史羅
汝敬所述公之行狀詣予泣拜請曰先公既沒將祔葬鄭之城西
南先塋之次然無文刻於墓石恐遺德弗傳敢請一言以示於後
庶幾永有賴焉予於公同官於朝交久且厚誼弗可辭按狀公諱
彰字文昭其先世家太原代有顯人其後散居四方皆爲鉅族公
之高祖諱資元至正中以明經爲河南鹿邑學官因家焉曾祖良
祖賜父汝能皆樂善好義居鄉有聞娶郭氏元季汝能挈家避兵
汾晉之間海內旣平將歸其鄉過鄭樂其風土遂占籍焉公生元
至正丙午九月十八日幼穎悟好學稍長有司選爲州學生益自
刻苦學日進洪武丁卯領河南鄉明年會試禮部弗利補太學
生嘗使山東平糶以實軍儲同列納賄縱逋負者公毅然責之弗

聽比還其人果得罪公遂以廉幹聞明年擢吏科給事中典封駁
之任夙夜在公出納惟允厯左右給事中益慎益虔聲譽尤著遂
進都給事中未幾升刑部福建司員外郎時有豪橫往往構訟根
株連結至數歲不能斷決有司率爲所誣害公曰法貴平恕然亦
豈宜寬縱以長惡哉於是正之以法而爲所誣者皆得釋人咸悅
服旣而超拜山西布政使司左參政居藩七年吏弗忍欺民懷其
惠永樂初召拜禮部右侍郎階嘉議大夫時四方萬國奉玉帛重
九譯以朝覲賓貢者肩背相望於京師賞賚燕享無虛日與尙書
鄭公賜同德協恭奉職惟謹明年以父喪去官哀毀踰節鄉鄙稱
焉服除遷戶部嘗祀華嶽過陝州之新安聞民鬻男女償逋租旣
還奏之詔悉蠲其租且官給楮幣以贖其所鬻男女人皆德之干
樂壬辰改都察院右副都御史論事嚴毅持法公正人不敢干以
私嘗以母夫人年高欲歸省侍而難於請適蒙恩命按河南許其
過家且賜母夫人冠服仍給白金楮幣以歸爲壽時人莫不歆羨

歲庚子升右都御史秩資善大夫仍按河南待諸鄉舊一如平生
至於公法雖親不貸時諸郡連歲水患民多流亡而有司復加重
斂民益以困公悉奏之於是詔停不急之徵十餘事凡官吏以貪
暴罷免者九百餘人招流民復業者幾五萬家發官廩以振之賴
全活者甚眾先是強賊張大聚亡命嵯峨山行劫商賈爲之不通
女僧宋繼善與其徒數百人爲妖言撼眾姦人李人美以生道惑
人公悉捕斬之平生嫉惡甚嚴然獄有所疑者必反覆訊鞫然後
決有鄭旺者罪當辟公閱其辭疑焉命御史爲辯之果得不死公
性至孝以父早世事母夫人尤謹在京師所得四方珍味必遣人
馳獻然後敢食歲時薦先竟日悲哀不樂所得俸祿必分族人及
濟貧乏嚴於家法訓飭子弟其有違禮度者必痛責之俟其悔悟
乃已洪熙改元進資政大夫得推恩封贈其祖考皆如公官母封
太夫人咸以爲榮公卒之日士論嗟惜之配郝氏有賢行封夫人
子男二長卽瑾次瑜女四公爲人簡靜待人以誠率下以正平居

若不出口至臨事論辯詞氣侃侃弗少置自爲侍從之職薦躋
顯要歷事累朝廉介自將恪勤夙夜垂四十年毅然有古大臣之
風若公者庶幾無愧於其職也歟遂爲敘次其平生行能之槩而
系之以銘其辭曰

王出太原世有聞人繼遷鹿邑闕閭嶙峋迫於高曾家聲益振元
季兵興避地汾晉幸際聖明桑梓是思爰樂鄭鄉占籍於茲公承
厥後早悟而通發迹場屋游歌辟雍列職宮廷實典封駁優游禁
近薦膺顯擢既遷秋官持法惟平出佐山西藩方實監公來自藩
乃貳宗伯繼贊司徒厥聲藉藉秉憲內臺風軌肅清白髮蒼顏翼
然在廷弗規弗隨正色率下從容廟堂贊輔聖化惟公克忠廉謹
自持惟公克孝祇奉母慈薦沐國恩膺此褒典光於三世無間幽
顯公宜壽考寵眷是承云胡逝矣溘爾遺榮公則無憾世道嗟惜
邦失重臣人懷舊德著山峩峩爲公之憤百世之下尙徵斯文
禮部左侍郎陳公墓志銘

王文端公直

陳氏之先汴梁人宋建炎間有諱譽者爲嶺南清海軍節度使終
於官子宴蔭東莞令因家邑之延福鄉由是爲東莞人公高祖祖
舜曾祖誠子祖用廣父宗彝皆不仕宗彝娶翟氏生四子公其長
也諱璉字廷器別號琴軒自幼聰敏喜學從邑庠訓導黃先生勸
受書經學成領薦會試不偶入太學選爲桂林府學教授嚴條約
以身先之時有詔武臣子弟皆受學公日進諸生講聖賢之道所
謂忠孝仁義之說必使身體而力行之諸生雖文武不同莫不皆
有所得都督韓觀總兵鎮守廣西猛悍不下士聞公之教心悅誠
服以儒師加禮焉秩滿升國子助教永樂初近臣言公有治才
不宜置之散地召試在優等擢知許州始至人以儒者易之公少
有警發衆爲悚懼乃更以寬厚監民未幾代還改滁州均徭役時
征斂禁姦戢暴民用大和太宗皇帝巡幸北京所過先遣廷臣察
吏治問民隱治有異效者加升擢焉衆皆言公績最滁人恐失之
詣闕乞畱遂升揚州知府掌滁州事賜綺衣一襲鈔五百貫禮部

燕餞給驛遣還在滁又九年升四川按察使四川去京遠民不畏法豪吏黠胥姦弊百出公至一治以法不少貸軍中暴橫有號虎彪太歲者人莫敢犯犯輒受奇禍公廉得實爲設方略密遣人捕之皆置之重典而人以盜乃建言修武備慎刑罰明禮制復義倉正風俗等九事上嘉納之召還改南京通政使出納命令罔不明允上喜其盡職賜之誥命以示褒而曾大父大父皆贈通政使妣與妻皆淑人正統初升調南京禮部左侍郎於稽古禮文之士尤惓惓不少懈又五年以年踰七十乞致仕上許焉公德行淳懿文詞典重人愛之若拱璧其所進於上有巡狩頌平胡頌饒歌鼓吹天下傳誦之搢紳士大夫求碑銘序記詩賦諸作以發德述懷娛情寫物者足相躡於門公應之如響故所作最多今傳者有琴軒集歸田藁若干卷尤好著書凡所臨郡邑必采其山川人事風俗物產所以供賦稅之正而適上下之宜者爲書以傳若潁川永陽羅浮成都等志皆具存其識鑑精明取舍不妄賓興之歲公必

在主司之列而收得人之譽及致仕而歸鄉之學者有所增益郡縣守令政有未達者得咨度於公黃肖養作亂其所以制禦綏靖卒保無恙者公之策爲多公生於洪武庚戌五月初七日而以景泰甲戌十月十六日終享年八十五配淑人袁氏有婦道先卒又娶侯氏子男二鼎鼐孫男二鎧鑑將以明年二月初三日奉公柩與淑人合葬焉墓宜有銘以公之友左副都御史致仕羅公亨信所爲行狀來請予嘗託交於公知公文行政事之善且與羅公同年又知其言足以取信於後世誼不可辭乃爲序次而銘之銘曰東莞陳宗來自汴梁武德桓桓奠此一方傳至於公益篤文藝奮迹泮宮遂領民事今之太守乃古諸侯千里滁陽賦役優優繼登外臺克謹邦憲政肅刑清俗爲之變典教成均學者有師執事之樞出納具宜維少春官禮樂是輔帝實用公公乃求去白髮蒼顏老於故鄉賢哉二疏千古相望山川出雲雨彼黍稷功成歸來孰知其力公今逝矣與汗漫期有美在人百世之思

皇明名臣琬琰錄卷之二十

皇明名臣琬琰錄卷之二十一

春坊贊善陳先生行狀

濟

金長史

寔

先生諱濟字伯載姓陳氏常州武進縣人上世居溫之樂清代為
 儒家高祖號月巖為瑞安州學正有子七人其第六子曰可山者
 因游平江兵興不得還遂僑寓常熟之雙鳳里先生之曾大父也
 大父益初父以貞自常熟遷今居母唐氏先生穎悟異常總角讀
 書過目輒成誦比長勵志弗解嘗以父命游錢唐會稽從縉紳先
 生學從者載泉貨隨之賢遷比還先生以其資之半購書父奇之
 笑曰汝能盡讀耶吾弗汝恡先生自是益肆力其閒日夜務記覽
 聞人有異書輒假手錄成帙至於胼指無憚勞勤如是者十餘年
 遂貫穿經史百家之言才名卓然振起東南諸郡會朝廷修永樂
 大典大臣有言先生者以布衣召至為都總裁時合內外詞臣暨
 太學儒生眾數千人繙閱中祕四庫書浩瀚填委先生至則與故
 少師姚公尚書鄭公祭酒學士數輩詳定凡例區別去取莫弗允

愜而六館執筆之士凡有疑難輒從質問先生隨問響答未嘗舐
滯疏抉剖析咸有源委非口耳獵涉者可比故一時之人無不服
其該博書成擢右春坊右贊善居輔導之職十有五年小心謹慎
未嘗有分豪過差去年被命隨侍五皇孫授經凡有諮問先生援
据精詳洞究始末博而有要皇孫亦素聞先生名深加禮重方將
咨以啟沃今年夏五月某日暴中風不能言百藥弗瘳六月四日
卒於寓舍年六十一前甲辰之歲某月某日其始生也配潘氏子
男三人長格次棫天卒次栝女二人先生重厚修慎孝友天至事
母太夫人備極色養太夫人嘗戒以無過飲終身未嘗至醉其宦
遊京師也以太夫人年高不可迎養每一念至輒歔歔飲泣教篤
二弟底於成立尙書公以碩德長才由給事中升大理卿再轉而
位大司馬事先生如父出鎮交趾歲時書問往來不絕先生以其
弟位六卿已復繼登清要深懼盛滿彌自敬畏平居敦尙儉素食
不兼味衣無華綺僑寓闔閩一室蓬戶葦壁僅蔽風雨而終日危

坐手不釋卷爲文章根據經史必務理勝不事葩藻常曰文如菽
粟布帛貴有益於世不爾雖工奚益所著有綱目集覽證誤若干
卷文集若干卷藏於家病後數日會格奉母來省病且革至是復
甦瞠目視格母子以手書太夫人安否字格對以無恙頷之出涕
被面後三日竟卒格既畢殯殮事將奉柩南還葬里之某山乃涕
泣求予狀其行實乞銘於當代立言君子以昭不朽予與先生有
同官之好而又相知義不得而辭焉謹狀

兵部尙書節愍陳公墓志銘

治

曾學士

榮

兵部尙書毘陵陳公之死事於交趾也計聞詔贈少保榮祿大夫
諡節愍遣官諭祭命其子樞爲刑科給事中敕工部爲造墳塋厚
卹其家樞旣倣古具衣冠招魂與公之夫人合葬其邑定安西鄉
三橋之原乃奉禮部尙書胡公澱所述行狀詣余泣拜請銘余嘗
辱知於公而忠節事又所當書者遂不辭按狀公諱洽字叔遠姓
陳氏其先澗之樂清人曾祖可山喜爲湖海之游元季客平江遭

亂道梗弗得歸遂家姑蘇之常熟祖益初父以貞連世弗仕母唐氏有淑德國朝洪武中以貞始自常熟徙居毘陵之武進三子皆聰穎秀異公其仲子也生洪武庚戌正月初六日自幼端重不爲兒嬉甫成童已屹如老成人稍長貌奇偉長身玉立人望而敬焉與兄濟暨弟浚同游鄉先生謝子蘭之門子蘭謂人曰陳氏兄弟才氣如此河東之薛不得專美於前矣且以遠大期之公讀書力學淹貫羣籍尤工於書法弱冠用薦登 命點軍卒過其目輒識其面且記姓名弗忘有再至輒答之叱令其去總戎懼請罪公上其事太祖皇帝嘉之賜織金鵝鵲衣一襲洪武丙子以貞戌五開以沒公去官至家時五開蠻寇竊發公匍匐將往以歸父喪或止之公不應涕泣以行其後觸瘴癘冒危險閒關五千餘里竟負骨歸葬焉未幾少保兵部尚書茹公瑞薦公才可大用遂奪情起復授文選郎中太宗皇帝入正大統之初首升爲吏部右侍郎尋轉升左侍郎階嘉議大夫量才任官銓衡惟允復署地官

事益有聲永樂乙酉遷大理寺卿持法平恕民無告寃者丙戌交趾黎賊構逆朝廷興師問罪且命公覘賊蹤迹調土兵三萬以佐總戎者未幾黎賊就俘交趾遂平旣還朝命掌春官事論功定賞人無閒言繼署冬官名譽尤振歲己丑交趾餘寇作亂仍命英國公張輔率師往討之公實與參贊機務遂禽其凶渠簡定而還時北寇猖獗車駕親征公承命偕英國公訓練士卒于塞外辛卯復往鎮交趾以克綏輯其民先教化而後刑法夷人安之蠻俗爲之不變而窮陬裔之間絃誦之聲相聞乙未還京師上嘉其功升兵部尚書階資善大夫丁酉仍與豐城侯李公彬同鎮交趾兼掌二司事仁宗皇帝卽位敕領交趾布政司按察司兩司仍參軍事賜誥命追封二代祖考皆資德大夫正治上卿兵部尚書祖妣贈夫人母封太夫人故妻楊氏贈夫人今上皇帝宣德改元之初蠻寇黎利勢益張成山侯王通率師討叛公乃與參贊是歲冬十一月八日出師討賊公以爲宜駐師石室縣之沙河以覘賊勢主帥欲

渡河而陣公反覆諭以利害且陳方略主帥弗聽翌旦五鼓麾兵以渡公弗能止次盩厔賊自巳至未力戰公遂自奮馬突入賊陣欲禽其首惡身被創甚而了無怖色既而墜馬左右扶掖公欲還營中且曰主帥且退公何自苦如此公張目叱之曰吾受朝廷厚恩四十年報國正在今日吾豈偷生忍恥者乎眾皆潰散公奮勇持戈前進手殺數人知力不能支大罵自刎而死賊相視駭歎公自筮仕卽居內庭恂恂謙謹清儉寡慾忠信孝友出於天性動止語默皆有禮度獎善嫉惡尤惡諂諛親仁好賢獨尙正直於人無所毀譽而遇之必以誠性樂恬澹不事侈靡平生不畜媵妾所至惟家僮二人以給使令晚年不喜飲酒閒居沈默寡言終日危坐人莫窺其底蘊有言兵者則曰兵凶器也古人尙德化必不得已然後用之博涉書史論至古將相忠義之事必正言定色英氣橫發擊節稱歎若已有之雖有邊徼經營軍旅之務稍暇卽讀書自娛手未嘗釋卷也其爲詩文敏捷往往皆有思致公卒之明年主

師棄城而歸交趾遂爲賊所據夷人思公之遺德語及輒爲之流涕嗚咽久之公卒之日享年五十有七配楊氏贈夫人子男二人長卽樞次曰機女二孫男二曰勳曰杰銘曰

烈烈陳公乘時奮庸薦剡剡馳一鶚橫空亦旣登朝遂膺寵擢優游清班以典封駁執喪居廬制未克終承詔復起薦躋顯融授官郎署銓衡是職繼貳天官厥聲藉藉黎寇叛逆命將往征公贊戎機厥功以成蠻荒底寧爰立郡縣公在藩方夷俗丕變旣還京師上嘉乃績乃授司馬屢加寵錫承命載行餘孽披猖負其險固出沒跳梁主帥恣驕而不持重輕敵以戰公言弗用寇勢益張公弗顧身力戰以斃捐軀成仁公之忠誠以死殉國義氣英風有聲赫赫褒典薦加恩命尤隆高爵美謚用表厥忠旣卹其家復官其子公其不朽有光信史三橋之原窀穸銘以昭之萬世流芳

兵部尙書許公神道碑銘

鄭

楊文敏公

榮

沐之許州卽古之潁川郡其士風端慤尙志節由是出者莫不著

名於世若今之大司馬許公其一焉公諱廓字文超姓許氏世居許之襄城曾大父居敬大父守誠父忠信皆隱德弗仕母王氏公生而岐嶷賦性淳厚齠齔之年即知務學其父遣入邑庠受經遂領洪武己卯河南鄉薦明年試禮部弗偶入太學永樂丙戌擢錦衣衛經歷未幾超授工科給事中復升鴻臚寺左丞皆能舉其職歲壬辰拜工部右侍郎時職務叢脞公悉心殫慮以佐其長凡可惠工而利國者皆奏行之事多就緒輿論歸焉甲午太宗皇帝親率將士往征北虜命公督運糧餉隨軍往返六閱月而士馬給足人無暴擾乙未將營建北京命公提督神木廠事工繁而役重公益持謹慎始終弗渝己亥以交阻入戶田賦未有定規命公往理之公至察人心事宜與總戎豐城侯李彬掌交阻布政司事尚書黃福等議其可否遂還朝條奏其利害數事上皆嘉納之仁宗皇帝即位念公勤勞中外政績有稱遷工部左侍郎授正議大夫資治尹賜誥命推恩贈其父祖皆如公官祖妣閻氏母王氏皆爲淑

人皇上嗣位知公惇實可任益隆眷待宣德庚戌秋

民飢流

離者眾上以公大臣素爲鄉邦所重命往撫輯之至則旌廉黜暴勸善懲惡榜示有司弗得復有科擾禁豪右毋索取私錢凡夫匠雜役及諸采辦與積逋稅糧諸物悉奏免焉於是民皆趨走復業戴公若父母還朝上慰勞甚至辛亥春正月降敕獎諭升公爲行在兵部尚書復賜誥命授資善大夫并加贈厥祖若父皆尚書祖妣及母皆夫人公荷國厚恩方夙夜經慮以圖報而遽以疾聞皇上賜藥命醫視疾竟不能起實宣德壬子六月十二日距公生洪武丁巳三月辛巳得年五十有六計聞上深悼惜遣官賜祭命有司治墳塋給舟車歸其喪公卿大夫皆走哭弔致奠祭焉配王氏封夫人子男四長麟獸次繼廣繼文繼武十以某年某月某日葬公于其鄉首山之陽其宗姪國子生昌率其幼子奉監察御史羅亨信所狀事行詣予請銘予昔與公有同官之好弗可辭惟公姿貌豐偉襟度夷曠具寬厚之德有通敏之才歷事三聖薦沐寵恩

詳慎縝密不驕不矜凡受委任靡不竭盡心力是以官無廢事民庶樂康蓋卓然有大臣之風是以樹碑墓道以垂不朽予既爲次序之而復系以詩曰

猗歟許公中土之英少克務學遭世太平發迹戎幕尋陟機要復升鴻臚益臻榮耀貳卿之任佐理式勤益國利民譽日以振督運糧餉從征殘虜將士給足歡聲載路于彼南交版賦未清具陳可否深協聖情仁皇嗣位益隆眷顧錫命推恩光照宗祖聖皇繼統篤任弗渝命撫河南民用昭蘇迨進司馬璽書獎諭機務孔繁實深倚注惟公砥礪理國如家經慮多方茂著才華尙未耄期遽爾遐棄帝用嗟悼賜葬及祭恩命載臨哀榮始終勒石墓道垂耀無窮

詹事府少詹事曾公墓碑

梁

楊文貞公

士奇

天之生才甚難也然高明強毅弘博奇偉智能勇略之士世未嘗乏用惟文章者不易得夫探造化之闕微帝王之法通古今之蹟

淳澗融會而後出之上焉者發揮性道修正人紀此聖賢之事不可幾及次焉者推明義理紀述功德作爲風雅以鳴國家之盛司馬遷相如揚雄班固韓柳歐蘇作者之事然亦代不數人焉信乎其難也國家自洪武以來有文之士其可以嗣遷固者蓋有之矣太宗皇帝御天下慨然欲作新人才興起斯文而龍飛第一科進士中簡明秀通敏者二十八人就文淵閣盡出中祕書俾進所業朝暮大官供膳月給內帑鈔爲膏火費蓋期之於古人曾君子啟其首也君名棨時以第一人授翰林修撰授承務郎遂晝夜淬礪文與學俱進上時召試子啓迅筆千百言立就不費思索而理致文采皆到其苦心思索者有不能及上屢舉羣書隱僻事以驗所學靡不悉對以是深見獎重遂名聞天下明年修永樂大典爲副總裁五年升侍講授承直郎七年扈從巡北京數侍燕閒應制賦詩並荷褒嘉後有薦文士於上者必問得如曾棨否卒之考其能未有庶幾及者升承德郎預修太祖皇帝實錄十一年復扈從

巡北京十二年考北京鄉試十三年廷試充讀卷官實錄成賜鈔襲衣文綺十六年考禮部會試升侍讀學士授奉訓大夫修天下郡志爲副總裁二十二年考禮部會試仁宗皇帝嗣位升左春坊大學士仍兼翰林侍讀學士日以經史進講文華殿從皇上之南京還預修太宗仁宗實錄宣德二年考禮部會試五年充廷試讀卷官兩朝實錄成賜金織襲衣銀幣升詹事府少詹事仍兼侍讀學士賜寶帶子啓爲文章如源泉混厚沛然奔放一瀉千里又如園林得春羣芳奮發組繡爛然可翫可悅賦詠之體必律唐人興之所至筆不停揮狀寫之功極其天趣他人不足已嘗有餘四方求者無閒貴賤日集庭下靡不酬應一時文人所作碑碣記序表贊傳銘詩賦流布遠邇蓋未有如子啓之富者工書法草書雄放有晉人風致自解大紳胡光大後獨步當世儀貌魁偉襟度坦夷而神情灑落善譚論簡而有味良辰清景擇勝而游未嘗以事廢其天性孝友慈厚喜獎拔士類交際有始終之義急人之急無論

識與不識平生以及物爲心使之臨民必有所濟惜其仕三十年恆以文學在侍近所及者未廣也素有痰疾一日侍朝遽引退上遙見之敕免當朝宣德六年冬疾大作命太醫視療明年正月二十一日卒計聞上爲悼惜贈嘉議大夫禮部左侍郎遣侍郎章敞賜祭命有司營葬給舟還其喪朝臣自公侯尙書以下皆臨奠春秋六十有一嗚呼人才之難成也一代之文人如子啓何可多得而今已矣蓋悼惜之無閒言云曾氏世家吉之永豐其高祖晞顏宋兵部侍郎江西湖廣南安撫使元贈武城伯妣蕭氏曾祖選申元應奉翰林文字同知制誥兼國史院編修官與其兄翰林直學士德裕皆有盛名於時妣胡氏祖如瑤集賢院司直妣周氏考叔本洪熙初以子啓貴贈奉議大夫左春坊大學士兼翰林侍讀學士而贈其妣張氏宜人其配鍾氏封宜人子男三秬積种公之易簣也以身後事屬建安楊公及余楊公旣爲著葬銘余爲書其墓石而係以詩曰

鄧出有夏少康裔曲列啓封國爲氏去邑爲曾適魯仕邠國聖學
述傳義親承素王道統系後十餘葉親莽際爰以闔宗徙南避宅
盱與吉心洙泗章逢蟬聯如櫛比歐陽之鄉吉之委宋元連繇起
祿位天啟文運赫昭嗣公奮而興屬隆世天經煌煌表人瑞影纓
垂組侍廷陞操觚含豪應帝制岷江茫洋萬里勢春空澄明雲錦
麗重瞳回矚天容霽紀功述德封金匱操執權衡品文藝宏章大
什耀海內朝陽和鳴鳳翩翩儒林翹翹拔其萃矜惻焚溺懷惠濟
惟仁攸存未弘施沒奚憾兮此齋志

尚書文襄周公言行錄

忱

楊尙寶

廉

周忱字恂如江西吉水人進士歷任永樂宣德閒官至工部尙書

卒年七十三諡文襄

太宗簡進士曾榮等二十八人入文淵閣俾進學公自陳願進學
其閒太宗喜曰是真有志者命增爲二十九人改翰林庶吉士且
暮大官供膳月給膏燭之費公感激自奮于學與修永樂大典歲

壬辰授刑部主事公爲人既精敏而又盡心簡牘有所推讞無不

曲當

蕭鑑撰墓志

公擢工部右侍郎巡撫南直隸初蘇州稅糧負欠七百九十餘萬
石常松亦然公至詢父老皆云蘇松民俗大戶不出加耗以致小
戶連累納欠公乃使大小戶一例加耗官降斛斗久失糧長往往
大入小出公奏行南京工部鑄造鐵斛發屬縣依造木斛較勘烙
印給與糧長收槩於是出入均平蘇州糧額二百九十餘萬石公
同知府況鍾奏減八十餘萬石舊例不許團局收糧糧長自徵收
曰此負欠之由也遂令各縣於水次置圍圍聚一處糧長一
人總之名曰總收定與加耗總徵平米上囤每囤設糧頭囤戶各
一名管收置立撥運文簿撥撥起運加耗者正糧一石收平米一
石七斗候起運之時酌量支撥如京通等倉遠運正米一石支與
三石臨清淮安南京等倉以次定支置立綱運文簿聽其博淺等
項費用填註回銷支撥羨餘存積在倉號曰餘米次年餘多令加

六徵收又次年益多令加五除依前撥運外猶有附餘令各縣造倉一所名曰濟農將週年撥運剩米運入以備振濟或農民缺食及運夫遭風被盜者振給借納秋成抵斗還官修築圩岸開挑河道人夫關納口糧秋成不還其振濟農民每歲插蒔之際於中下二等戶內驗其種田多寡給之秋成隨糧還官若遇凶歲則再振之不還者不復給往時裏河運糧軍民相半軍則官爲打造淺船民則自行雇船裝運經年往復多失農月公乃與平江伯陳瑄議奏軍民合於淮安瓜州等處水次對船交兌令衛所出給通關付還銷繳在淮安正糧一石兌與平米一石五斗瓜州兌與平米一石五斗五升如各處并南京衛所運糧官軍未曾過江者聽於蘇松常鎮等府縣交兌加與過江船錢米二斗豐年米賤兌與加七五非凶年米貴兌與加六五非襯墊蘆席折米五合方兌船在江或遭風公又令州縣支糶餘米蓋倉二十餘廩於瓜州江畔遇到船糧搬入收貯聽候交兌畢日量支餘雇人看守

民間馬草每年運赴兩京上納若北京每色草一千束該用五百料船一隻人夫十五名草束在船十壞六七所費不貲公奏於通州草場設立官庫每束折收白銀三分一千束止用三十兩若南京則輕齎赴彼買納人皆稱便

北京文武職官俸糧皆領票於南京戶部關支當米賤時一兩可買粟米七八石公因會議奏准折支金花銀兩納官每兩准米四石解運京庫交收折支京官俸糧嘉定崑山等處折納官布每匹准正糧一石舊例驗收務重三斤糧解領布到官率因紗麤不堪觀驗十退八九公知之奏稱布疋斤重紗麤其價反賤紗細布輕其價乃高乞不拘斤重務在長闊如式兩頭織造色紗以防盜翦之弊從之各處走遞馬匹及鋪陳等件死損多被馬頭科逼民財買補歲無虛日公創法每田一畝收米一升九合隨糧帶納另廩收貯遇有死損驗馬上中下價值給米備用馬頭科斂之患遂息正統初淮揚地方被災鹽課虧欠公奉詔巡視乃奏令蘇州等府

將撥贖餘米每縣量撥一二萬石運赴揚州各鹽場收貯照數出給通關准行各縣下年預納秋糧其米在場聽令竈戶將私鹽於附近場上分納卽照時價給還糧米食用于時米貴鹽賤官得鹽課積聚民得食米安生上下賴之

十四年邊事緊急工部移文造盜甲腰刀撒袋以數百萬計其盜俱要水磨明亮公取餘米依數成造且計水磨明盜非遲歲月不可暫令撥錫以副急用處事周而敏多類此

公在南圻凡二十二年兩遭喪皆起復視事

蘇松一帶稅糧有五六年未完者朝廷遣官催促相繼終未能完遂舉忱爲侍郎往任之忱爲人謙恭言若不出口謀慮深長一切破崖岸爲之虛心訪問兼采眾論不一二年累欠之數皆完羨餘之積日見充溢小民賴以振恤歲凶無慮歲輸京師之米甲於諸省朝廷每勞其能亦善於附勢中官王振極重之宦其地者無虛日人人得其所欲釋子建造者必往求之所獲必過望

並古樓雜錄

上任旣專公亦盡心於其職爲人謙恭不立崖岸言若不出口謀慮深長善采眾論征輸皆有常度貢賦未嘗稽欠且有贏餘遇屬郡有荒歉卽以便宜從事撥餘米以備不足之數凡官府織造供應軍需之類盡出於所積餘米蓋民賦歲一石五斗之外漠然不見他役之及而官府無復科率之擾諸縣學校先賢祠各郡橋梁河道多所修葺濬治一切取諸餘米人爭爲立生祠沒因以祀之其後戶部言濟農餘米失於稽考奏遣曹屬盡括歸之官於是徵需雜然逋負自若人亦思公焉

長史金寔送公還東吳詩云公當永樂初讀書文淵閣閣下四庫書我實司管鑰緡閱窮古今寤寐攻製作氣若橫海鱸志欲吞恆嶽駿如汗血駒千里思一躍時雨沐春葩鵝膏淬霜鏐拜官屬司寇利器遇盤錯無情不得盡焉用施敲朴中年樂散地娛嬉事棋槩巧匠高縮手無地施善斲天生有用才豈俾久寂寞忽如鵬快風萬里翔寥廓東吳財賦疆國用之所託料量出心計調度歸掌

握守令受成算里胥奉條約富家絕兼併農田遂耕穫官儲足振
貸私負釋纏縛雖遭大侵歲不致填溝壑小民相與言輒以手加
額自從相公來濟利誠溥博既無倒懸苦乃有邨田樂相公朝天
去還期在冬朔屈指算歸程扶攜候江郭東南數十郡到處省民
瘼潤如甘雨零明似福星灼丈夫得如此豈負平生學覺非集
學博而邃禮和而恭茂著才猷爰作司空撫綏南服國計以豐民
無移粟歲不知凶惇大成裕沛乎有容沒而尸祝人仰休風二十
八宿孰能右公彭部撰贊

皇明名臣琬琰錄卷之二十一

皇明名臣琬琰錄卷之二十一

刑部尙書魏公神道碑源

王文端公直

正統九年閏七月廿七日刑部尙書魏公以疾終于家事聞上爲
之嗟悼遣官賜祭命有司治葬事在朝士大夫亦莫不惋惜致賻
奠先是公有足疾詔俾釐務免朝參久之未能愈公歎曰食君祿
而不一造朝心豈能自安八年二月拜疏乞致仕上憐而許之降
敕慰且賜鈔三千貫歸一年而終年六十三公諱源字文淵幼而
岐嶷喜讀書習於禮節十三能屬文嘗作桂花詩爲時輩所歎賞
選爲學官弟子永樂乙酉以書經領鄉薦明年取進士拜監察御
史所至舉其職松江知府黃子威被誣不能白公爲辨其枉浙東
傍海民困於魚課爲奏減之西安大疫民間比屋不能興督有司
具醫藥往療全活者甚多涼州有寇將大爲民患公廉得之亟請
兵殄除民得免害父母相繼卒皆奪喪起任職爲御史九年升淞
江按察副使未幾召還署刑部右侍郎會河南旱飢民轉徙乃命

公爲河南左布政使至則發倉廩以振民奏免逋賦省徭役及諸不急之務一以安民爲事民稍稍來歸而雨亦大至是歲有年召爲刑部左侍郎食從二品祿或言四川邊務多弛廢命公往理之明罰飭法衆務修舉還朝拜刑部尙書獄無滯囚凡公所決斷者人人自以爲不寃時上注意邊事又命往西邊督察諸將謹防邊以便宜從事遣都指揮李謙守獨石楊洪副之劾奏指揮杜衡等慢令當死諸將始嚴憚不敢肆自天城抵朔州視要險地宜守者凡八分命諸將守之請增修開平龍門城使高大皆贊以暨庶可守又自獨石抵宣府增致墩堠發開平龍門兵併力爲之屯軍免其租一年凡諸大城堡請給神銃火藥嚴爲備上皆從之再遣敕嘉勞焉時諸軍有勇壯者依託權豪以避役公悉搜括歸伍中權豪側目一弗顧旣而病足不能朝遂以此致仕大夫君子皆惜其去而亦莫不以爲榮公忠厚坦亮孝於親友於兄弟睦於宗族而信於朋友與人言必依於仁義其襟度夷曠洞見肺腑事有可疑

者得公處之眾無不愜意凡公所蒞人至今譽歎不能忘魏氏先居南昌之奉新後乃徙居建昌故今爲建昌望族曾祖文卿祖庭郁父伯泰皆有德義而不仕及公貴祖考皆贈資善大夫刑部尙書妣皆贈夫人公娶盧氏四子鑑鐸欽銓側室石氏生一子曰銘孫男十二瑛瑞璋瑾環珮珂珪珎珞珉玼公以某年某月某日葬于邑之甘泉鄉某之原鑑來京師謁予告曰先人不幸棄諸孤朝廷寵終之禮厚矣惟墓道石宜有文以示久遠非先生誰能爲敢以請予最知公不可辭乃爲序述其事而系以銘

侃侃魏公有美在中乘時而升事我太宗始爲御史職是憲紀爰副外臺表表愈偉方伯之尊遺受實全遂升秋官人用不寃皇撫萬邦威制夷狄公行邊師武臣竭力雒雒邊城隆隆軍聲萬里塞垣纖塵不驚公旣勞兵簡在天子以疾而休是謂知止邦家之光閭里之榮溘然上征爲風爲霆甘泉之山神道有石揭德振華以示亡極

兵部尚書柴公墓志銘

車

王文端公直

公諱車字叔輿姓柴氏世家錢唐靈芝之鄉之義谿曾大父諱茂有隱德大父允明父望皆以公貴贈嘉議大夫兵部右侍郎母嚴氏贈淑人公自少聰敏喜學游郡庠從徐大章先生受春秋學成領鄉薦遂入太學諸生多推讓之永樂甲申擢爲兵部武選主事卽以勤慎得名未幾升員外郎己丑太宗皇帝北征公與方尙書從行凡軍務倚辦於公公隨機應變無畱事凡官屬從公者又能庇佑之眾皆樂從及還升江西參議時營造事嚴公入閩中取大材丁夫之貧病者公處之有方故能集事而民不告勞初經廣信太守與公有舊餽蜜一罌公疑其重發視之皆白金笑曰此所謂故人知君君不知故人卒拒不納至閩縣有婦人抱嬰兒哭訴曰夫亡田產見奪於豪橫公察其實移文所司斷還之歲餘入爲職方郎中職方事最繁公治之有餘力會謠言當有變詔沿江諸郡擇賢守以公知岳州公鎮以靜民安之岳州有江湖之險官船來往

當役民上下挽送多或至千百人暮夜促召不能集公私病之公計主客戶有丁幾何約三丁役一丁五十人領以總甲署其名小牌百人領以百長署之大牌視所役多寡用之牌下皆來集無後者民得番休皆便之公事之暇則至學宮與諸生講學或行田間視耕穫賞勤而戒惰居三歲郡大治復召爲職方郎中丁內艱奪情俾任事宣德庚戌升兵部右侍郎公素有才望人後其進命下皆爲喜轉左侍郎時殘虜假息塞下西鄙戒嚴朝廷命將往經略之以公重臣俾參贊軍務凡發卒蒐騎積糧餉爲戢守備皆有條法上嘉之賜織金綺衣一襲先是虜入鎮番副總兵劉廣自涼州出兵往援遇虜而退虜隨逼涼州廣閉門不敢出虜大掠而去廣不以實聞反奏功微賞公劾其罔上又陳其欺誑不法事甚悉請必寘之法詔械送廣父子至京師又劾奏監夏等守將失律亦召還上益以公公廉詳慎爲國盡忠賜白金三十兩文綺三匹有副公前後章數十上皆剴切人或以後患怵公公曰吾敢愛身以誤

國耶由是同事者或不悅其所爲公亦惡其樂燕樂忽大計遂斷
酒肉澹泊以自處凡燕樂皆不與而持論益堅必據理守正每有
功賞雖敕下必覆驗而後行詐冒必糾正無豪髮私岷州士官都
指揮僉事后能以家人冒功得升賞公奏罷所升官能復以爲請
上宥之公反覆論不可曰詐冒如能者非一人臣方按覈皆請罷
今宥能如餘人何若無功而得官則捐軀死敵者何以待之朝廷
儻以后能土人宜寬假則以他名賜之爵人莫敢援例若詐冒而
升臣實以爲不可詔嘉公忠誠遣使賜白金四十兩綺帛各四匹
特命食從二品祿秩滿升尙書仍理軍務旣而事平西師亦解嚴
庚申召還賜以羊酒命視事且侍經筵聽講其年八月告歸省墳
墓上可之然尙欲託以邊事命公速來賜鈔五千貫遣焉辛酉三
月公還朝已感疾命太醫日往視予善藥冀速愈而公疾益甚數
驚悸起曰誤事誤事命速治行蓋心不忘忠而忘其身之病也上
聞之而憫焉俾還鄉治疾未行疾大作竟不起六月二十五日也

享年六十七娶王氏封淑人子男三拱抃拭孫男一計聞上爲之
惻然遣禮部尙書胡公澂往祭之命兵部給舟楫還其喪工部治
喪事抃乃以翰林侍讀學士苗先生所爲狀謁予銘竊常念之朝
廷之於西事蓋慎重矣常宿勁兵任良將又輟近臣往臨之欲以
安內攘外然其忠於上仁於下不爲利回不爲勢屈者蓋無幾是
以安攘之效不立迨天子赫然更命將帥而公等夙夜圖議振頽
綱去弊事明賞罰以示勸懲而人始知有法思奮其材武以從征
伐立功名於是殘虜影滅迹絕而天威震動於萬里之外矣今邊
鄙晏安烽火不作雖神謀睿算使然而公等之功亦豈細也哉宜
聖天子悼念之篤而恩禮之周公之大節如此若其交友敬臨財
廉奉已有度待人有恩不附勢以干利其美蓋不可勝書姑序次
其大者而爲銘使後世有考焉其葬以某年某月某日其墓在
之原銘曰

允毅柴公學以植躬遭時而升遂躋顯融三十餘年出入中外克

一其心以熙帝載帝曰西顧予欲汝爲殄此寇戎汝往視師維公揭揭羣志爰發乃暢皇威幽遠畢達邊塵不驚公與其功何以致之繁公之忠天不憖遺國有典禮寵榮式多哀念無已松柏丸丸有蔚其阡刻銘垂休何千百年

右僉都御史凌君墓表

安然

王文端公直

宣德九年八月十五日中順大夫行在都察院右僉都御史凌君晏如以疾卒于官年五十三朝廷爲遣舟歸其喪于湖州歸安縣將葬于所居琅琊鄉某山之原其幼子啓旣請右都御史熊公銘其墓矣復來請予文表諸墓上曰啓之兄敬以養祖父不克來京師今歸有期亦不能俟其來也故啓敢以請凌君嘗入翰林與予接又同朝久且相知義不可辭君諱安然字晏如自少力問學尤工書其楷書學晉小篆則師秦相早有名鄉邑太宗皇帝銳意文藝必欲追配古人君優游館閣益自勵務欲稱上意仁宗皇帝在東宮雅知之常令繕書以進令藏于祕府永樂十五年擢拜吏科

給事中以恭慎舉其職日侍上左右有所顧問敷奏詳明同輩皆推服焉仁宗皇帝卽位升吏科都給事中益愷懋不懈人未嘗見其有過舉今天子卽位三年大正庶官以修百度以君爲右僉都御史蓋是時持憲者多以賄聞由是用君其聞君感上知遇確然自守不爲眾所惑思欲稍拯其弊事不可卽懇懇爲其長言之多見聽從然猶膠筍牢密君未及有所振舉而以內艱去蓋在任不二年君去而其長及凡附託者皆得罪矣服闋仍爲右僉都御史兵部以武職貼黃久不清請會官清理如故事上以命君君與翰林侍讀苗君衷皆從事於此同力一心罔有漏失有顏鎮撫旣卒子孫當一人繼乃復以一人冒官三十餘年無覺者君聞其實乃奏罷一人又著令凡武官有靖難功而無子者不忍遽絕其祿得以壻或義兒一人繼不再及也有張指揮者旣以義兒者繼矣又欲冒及其子因有所調發託統帥以疾豫以子代亦十餘年矣君亦奏請罷之其臨事用心不苟皆此類而不能久於世豈非可惜

哉曾祖某祖德皆不仕父彥能歷官至應天府通判坐累罷居均州仁宗亦知其爲人因君爲都給事中卽令冠帶造朝以都給事中致仕歸湖州今加封右僉都御史君初娶周氏卒有一子曰敬再娶唐氏四子曰啟肇敦敷於乎自古聰明才俊之士遭時奮身皆有志於功名以顯當時傳後世然而不至於大有建立而卒如君何限蓋莫非命也使君得永年其所立豈小哉今雖不幸而其居官行事之善不可以泯也故表諸其墓

副都御史賈君墓碑

楊文敏公

天眷我皇明挺生俊乂列于庶位以理政務至于內佐風紀振憲綱而外播恩威除姦宄植善良者若正議大夫資治升行在都察院右副都御史賈君亦其人焉君諱諒字子信其先究之武城人洪武初徙家嶧山之陽祖志剛父旺俱不仕以君貴悉贈嘉議大夫都察院右副都御史祖母顧氏母魏氏俱贈淑人君自幼卓犖穎拔異羣兒由邑庠生應永樂辛卯鄉舉升太學太宗皇帝時選

侍皇太孫說書講論詳明深沐眷待歲甲午擢刑科給事中宣宗卽位升今職委任旣重君愈敬慎凡所施爲務悃大體不事末節夙夜匪懈稱厥職遂得推恩贈祖父母父母以及其室焉初君在刑科也克體朝廷欽恤之意獄有冤抑卽以爲言或至再三必得請乃已人或言其執奏太過君曰近侍以言爲職苟知而不言其如人之冤抑何江淮閒賊徒操舟劫殺番使君受命往捕旣至以計悉禽之按行鈔法于京都人不之駭鈔以流通密察百職發姦搃伏人不敢犯其居內臺也詳讞重囚務求其生必底無可生之理而後已江右豪民肆毒君往按之得實悉寘於法良善獲安川蜀姦盜作梗惟捕其首惡餘黨解散及奉命督山東等處陶冶奏減工程蠲免虛數民力以紓今皇帝卽位首命往鎮湖湘撫緝有方陟黜惟允巡視淮濟振活飢民十餘萬督築固安隄河道疏通人不知勞邇因徐州強賊反獄潛處芒碭聞肆爲民患復奉命捕治還至荏平邁疾正統己未正月十又四日卒于德州計開聖上

嗟惋遣官諭祭命有司爲治葬事君生洪武壬戌六月十日得年四十有八配石氏側室郝氏蔣氏子男三俊傑偉女四俊士以卒之歲某月某日奉君柩葬于城東馬首社先塋之次先期奉翰林編修許道中所述行狀泣丐予銘其墓予於君有同朝之雅歷官行已亦所聞知狀復稱君篤於事親始終盡禮兄子儀早孤撫育無異己子茲又仁德推于家者也若君者烏可以不銘銘曰
惟天生賢以時登庸輸忠服勤代理天工猗歟賈君遭逢盛世擢官黃門克稱于位天憲有佐特然超遷粵自筮仕迄今有年惟忠惟勤終焉如始爲國爲民匪私于己風猷茂著列聖受知中朝外服績用咸熙命雖不永所存者久勒銘有碑庶傳不朽

章尙文傳

傳

楊文定公

傳

尙文名徹世居會稽高祖斌宋景定中鄉舉第一祖君采父可道世有善聞尙文穎敏有智略初補郡庠弟子員日以讀書攻文辭爲事服食之需不計其有無永樂癸未以詩經魁鄉試明年第進

士入翰林爲庶吉士同狀元曾棨而下二十八人績學文淵閣預修永樂大典授刑部江西司主事尙文究心理斷訖無冤滯久之復入翰林纂輯五經四書性理大全書成受重賚時山西有盜掠人財詔有司亟捕之逮至數百人尙文適當其事上官督之甚急尙文曰殺人重事豈宜率易徧鞫之皆有辭一人辭色獨異尙文收其辭色異者餘悉疏之俾明日復來明日亦如之眾皆如約勘其爲盜者果一人眾始爲尙文危終乃深服之有何于戶者商數輩莫宿其家被劫商疑何何訴之官恐不能自明乃縊死事聞詔巡捕者三日弗獲抵死既三日不獲則拘鄰何者二十餘家別楮幣證其爲盜尙文詰之曰商遠來而楮幣約皆新何也捕盜者不能隱遂首伏二十餘家皆得釋未幾升本部員外郎受奉訓大夫復升本部郎中丁外艱歸起復行在吏部考功郎中洪熙改元賜誥命授奉議大夫推恩父母丁母夫人憂服除調驗封郎中尋升行在禮部右侍郎進階嘉議大夫加封父母及祖父母如制奉詔

往安南命酋首黎利權署國事尙文宣威德讐服利郊迎拜使者
堂下利令所親給事左右數進甘言誘以聲色尙文正色遏絕之
及還賂以金珠異物多方致之尙文堅卻不受及利死朝廷以其
子麟權署國事復命尙文往諭之關吏曰此天使前卻金者再來
矣比還麟所贖皆卻之不敢更進平陽王復封晉而恭王時所有
田土及護衛官軍房舍有司莫能處分王以爲言詔遣尙文往理
之至則勘其土田悉歸王府房舍驗所有軍士給之餘悉以居民
王樂從之復遷左侍郎與尙書胡公協謀國家典禮前後損益不
同吏無所據或緣爲姦乃取國初以來所行條格籍記之於是司
屬遂有所持循太醫院醫士妄舉鄉人爲醫以復私怨時爲積弊
奏革之僧道請度牒者歲以千計姦僞日滋請遵洪武中例循舊
額三歲一給其有舉任僧道官者不許越州郡由是姦僞者漸息
會同館四夷朝貢者日給廩餼往爲監臨侵剋乃嚴爲關防以副
懷柔之意尙文爲人尙誼氣調卹朋友曲盡其道不以患難死生

爲輕重平居簡靜遇朋友談笑戲謔襟度豁如然絕口不道政事
及臨事井然有條爲文簡潔所著有質菴藁藏于家壽六十二其
子瑾正統丙辰進士克世其家云

論曰士君子抱負才氣修志山林無聞於世者何限哉尙文際明
時爲顯官處順安常克諧所事蔚然有聲稱書曰時人斯其惟皇
之極有以哉

右春坊右諭德黎君墓碑銘

恬

楊文貞公士奇

右春坊右諭德黎君以正統二年十一月謁告歸清江得疾卒于
家其孤統以翰林侍讀習嘉言所狀事行求書墓碑余聞而哀之
曰嗚呼黎君之擢第也爲良進士入風憲爲良御史於長民爲良
郡守於近侍爲良輔臣奈何遽止於斯乎黎之先見余所作其考
墓表其曾大考允誠大考惟琇考宗瑞妣鄒氏以君貴考贈右春
坊右諭德妣贈宜人君兄弟三人其季卽君諱恬字潛輝天資清
淑生六七歲知慕學問累從明師得其旨歸而自進其功永樂王

辰擢馬鐔榜第二甲進士無幾丁內艱去服闋除陝西道監察御史以正直揚風裁歲辛丑朝廷以災異求言羣御史同上奏實君具草歷詆大臣之任事者無憂國恤民之心剴切激厲無顧避上曰御史言是任事者不能堪後薦御史之才可用於上皆升知州而處之遠方君得交陞南靈州尤僻遠君怡然曰聖人不鄙九夷我向人哉既至教愛其民如子民皆父母師事之政化既行會黎利反其眾日盛總帥王通孱弱不能制爲吏所脇遂矯制勒三司郡縣官吏悉解職守隨通北歸君時在行既歸通及協謀者皆坐法朝廷以事不出於眾悉置不問宣德七年士奇率同官言黎恬文學操行可任近侍遂命爲右春坊右諭德授奉直大夫時春坊事簡奉旨入翰林與纂述考最賜誥追贈其考如預修宣廟實錄簡充經筵官奉命考禮部會試者二用心公正時多得人遂謁告歸展先墓賜道里費給驛舟既展墓樹碑墓側退而治其親戚鄉里懽甚將行得疾醫藥久弗效以正統三年正月廿二日卒享年

五十有一君篤孝友之行而磊落有大志恥屑屑流俗事學博而正議議沛然爲文章波瀾藻麗而根於理存心公平於論人之邪正事之枉直靡不服之盡心公務未嘗苟且非其人弗與處容色潔白如玉儀度恭肅人不可犯而雅度灑落良朋勝友卒然邂逅詩酒倡和酬酢率極懽而罷其藏修之齋名熙熙所著有詩文集若干卷其娶先敖氏贈宜人繼王氏封宜人子男四統縉頌生顯生孫男三昇生冕生其葬以卒之歲某月日葬某原與敖宜人合葬焉黎君余考禮部會試時所取士又以同鄉故相知深而相與久其仲兄慎兄子經皆有文學於余往還余嘗謂清江自劉氏公是公非而後有一家三人聯璧輝映者今再見於黎氏居無何慎卒經又卒黎君每向余道其兄與姪未嘗不泣下余亦爲之感歎豈意又於今哀悼黎君哉銘曰
清江之黎代襲詩禮繇金三洲徙版城里自其高曾潛德弗揚迨其大考武弁奮庸卓卓潛輝篤志問學升自賢科秋空鵬鷲鐵冠

白筆北面在廷用振憲紀用張國經觸邪指佞動植有知昔之所
學今惟行之既斥遐僻俾治夷類不賤鄙之躬勤撫字夷亦有心
曰我仁侯父之母之而肯以尤既升桂芳所職輔導詞苑經帷在
帝左右方將顯庸曷殞遽亡松柏中什不至柱梁嗚呼潛輝其藏
我銘後有考徵庶其猶生

春坊諭德林君墓志銘

誌

楊文敏公

榮

宣德二年五月辛亥奉訓大夫右春坊右諭德兼翰林侍讀林君
卒於官交游之士莫不爲之傷慟臨終之夕其孤雲瀚適自南京
至幸獲一見不及有所言而絕良可哀也將奉柩歸葬于鄉某山
之原乃匍匐涕泣以翰林修撰王君鈺所述行狀來乞銘予與君
同鄉又同官而素相好弗可以辭按狀君諱誌字尙默晉黃門侍
郎穎之後穎從晉元帝渡江居建康其子祿由散騎常侍出爲閩
之晉安太守子孫因家焉是後有仕爲宋御醫院使諱古松者君
之五世祖也曾祖諱清祖諱顯父諱興皆隱德弗耀母游氏宗監

察御史廣平公之後嘗夜夢梁僧寶誌入室而生君因以名焉幼
穎悟其母嘗口授經傳卽朗然成誦在髫齡時已喜爲文辭後從
學于王稱孟陽極好辯論因字之曰尙默將弱冠選入郡庠益自
勤勵於經史子集旁及天文地理星命醫卜之書無不研究而尤
工舉業性至孝父早世事母益謹或有疾則憂形於色親調湯藥
不敢輒離左右及母歿家雖貧薄而殯殮葬祭一於禮而不苟永
樂辛卯鄉試壬辰會試皆第一殿試賜進士第二人授翰林編修
考滿升修撰嘗纂修五經四書性理大全古今名臣奏議郡邑志
書辨論精確勤於編述迥出傳輩甲辰秋九月升侍讀尋升右春
坊右諭德仍兼舊職階奉訓大夫給二俸嘗兩爲京闈考試官去
取惟公士子敬服洪熙改元蒙恩賜誥得推恩追贈其父如君之
職母爲宜人每痛二親不逮祿養語及必悽愴終日蓋君治家儉
而有禮待宗黨極厚族弟喜幼孤無依養於異姓取歸撫育迄于
成立勸子姪讀書言不輟口聞有領薦者輒加慰勉與鄉人周旋

款洽不事矯飾鄉人亦多敬愛之事其師孟陽最謹孟陽後爲翰
林檢討以事沒于京爲之經畫家事以反其妻子于閩處僚友必
誠必信於人無所毀譽在朝十有五年入則恭勤趨事惕然警勵
雖隆冬盛暑不自知其爲勞退則靜坐一室優游疏散醉吟自適
淡然若與世事不相干者家居時郡庠後進多從之游若今湖廣
參政黃澤浙江按察使林碩輩皆親及門受業時多推其學問有
源委以爲吾閩之傑然者自號藪齋又號見一居士所著詩文雅
健簡古多爲人所傳誦與修二聖實錄方擬告成歸省邱墓展焚
黃之禮而乃以是春疾作自知必不起遂請于朝得告而疾日加
劇第奄奄一息以待其子之至而卒其生洪武戊午八月四日至
是享年五十配陳氏有淑德封宜人子男二人長曰雲瀚次雲澗
女三人嗚呼幼學壯行君子之志也惟君荷聖朝教育之恩學旣
有成官兼顯秩可謂榮且盛矣亦可謂得行其所志矣烏可以無
銘其辭曰

林氏之先闕闕以崇粵自建康始居閩中歷世相傳其積彌厚發
之於君獨稟其秀孝友篤至信誼卓然學有源委思如湧泉爰擢
巍科超出流輩拜官翰林詞益霧霈編摩纂述克慎克勤侍讀講
筵忠賢是陳輔導春宮多所裨益考藝京闈公論藉藉不盈以矜
志節允堅無毀無譽罔不推賢善積厥躬惟君之德學淑諸人惟
君之澤閩山蒼蒼閩水汪汪藏石于斯百世不忘

皇明名臣琬琰錄卷之二十一

皇明名臣琬琰錄卷之二十三

吏部尚書黃公神道碑

宗載

王文端公

直

宣德十年今天子嗣大寶位臨萬邦顧南京根本重地建置百司而吏部爲之首宜得謹厚大臣往涖之九月以命吏部左侍郎黃公宗載陞辭之日詔進爲尚書以行士大夫知公者莫不譽歎以爲宜在南京八年以老疾求致仕上初不許章四上乃許之歸豐城故第又幾年年七十九以疾終計聞命禮部致祭工部爲治墳塋明年十二月廿一日葬于其鄉梨樹岡之原葬已其子儒凱來謝恩闕下詣予拜且泣曰先考之葬朝廷寵終之禮厚矣於今得樹碑神道而未有文敢以請予少於公而辱交已久誼不可辭黃氏於豐城爲大家公曾祖仲軒有隱德祖以仁考子貞以公貴俱贈吏部侍郎進尚書妣皆贈淑人進夫人妻余氏亦累封至夫人公自幼喜學年十五已能爲里塾師爲郡庠弟子從熊伯機受春秋遂取進士爲行人謹於自治奉使四方未嘗受饋遺歷左右司

副爲司正以父憂去治喪無違禮不飲酒食肉者三年服除領舊職永樂癸未以賢舉授湖廣按察司僉事時湖廣諸道惟銅鼓五開最難治分巡刷卷者多憚行蓋天下巨姦宿猾皆謫戍其閒善舞文弄法興事撓官府而陰把持其短長往者欲稍按治卽糾結如髹漆不可解欲一切漫漶則見嗤無可奈何多避不肯往公至當刷卷卽毅然治行到武陵問風俗知其人苦於從軍女子惡爲軍婦不果嫁男子則慮婦家往從戍而以徭賦累已不果娶至年三四十猶獨處公召鄉老里正諭人道大端俾轉相告語務嫁娶以時不踰月成婚姻者三百餘家他縣聞風皆樂從俗爲之變乃榜諭銅鼓五開諸姦豪數其罪惡且發其善端曰不改必寘之法眾知公務以德化人皆相戒勿犯比至莫有干於理者丙戌徵詣文淵閣修永樂大典書成受賞而歸戊子朝廷以海運糧餉赴北京下湖廣造海船四十九命擇風憲官之賢且能者蒞其事眾議以屬公而工部所遣官務苛察生事將聞於上以銜能公鎮之以

靜消其毒螫而落其機牙得不擾而成功已丑車駕將北征遣都指揮吳玉徵兵湖廣玉暴貪失期上謂按察司官不糾劾於是公與同僚皆坐累謫楊青駟公處之如平時遣一力受役而躬自執爨未嘗有不豫暇則閱書史以吟詠自娛癸巳復起爲山東道監察御史侃侃自持不肯少貶以徇俗乙未上親策士於廷時鴻臚無卿丞張斌任事恃城守功最狼戾多所中傷人頗憚之以不與讀卷至爭論上前不已公奏斌不學無識不可以讀卷乃敢煩瀆聖聽如此當伏法士論壯之丙申命巡按交趾交趾城中諸軍營房覆以茅故多火公廉知軍民歲歲伐材陶瓦備官用然皆資權豪命三司幕官稽其數凡有取者皆著于籍由是無敢私費不半年營房皆易以瓦覆火患遂息時工部尙書東萊黃公福掌交趾藩憲二司才行過人而不事邊幅御史往者多庸常視之至公獨恂恂恭讓而法亦不廢及歸行李蕭然無交趾一物東萊嘗語人曰吾久居此所接御史多矣唯宗載知大體已亥丁祖母憂居家

有旨奪情授貴州道監察御史益謹禮蹈義遇事必究極是非不
曲隨苟止於禍福利害不計也故再陷刑辟而賴公道以免甲辰
宣宗皇帝正位東宮妙選官僚職輔導擢詹事府丞未幾升行在
吏部右侍郎時少師蹇公猶兼領吏部事多倚公公協力一心進
退人才必取公論不苟爲異同故一時號得人洪熙元年賜誥命
制詞有清潔平恕恭謹厚重之褒是年遣祀夏禹及南鎮會稽山
因賜鈔八百錠俾歸焚黃于墓下其後嘗奉命往浙江理軍政及
伐宮殿大材於湖湘設施措置舉不失宜故事集而民不告勞久
之遂有南京之命蓋上知其老而欲安之也南京雖無銓選之勞
而勞於馭吏蓋其人多邪巧才見害必避見利必趨往往冒法以
僥倖公正已率物無少回撓屹然如泰山喬嶽不可撼陰陽闔
風雲雷雨以榮悴百物而細大不遺其施博矣己未進階資政大
夫詞曰寬和有執廉靜自持又曰小心慎職始終不渝人以爲實
錄當是時公卿大夫齒德之盛莫如公及致仕而歸猶康強無恙

士大夫出餞都門外瞻望咨嗟漢之疏傅不過也公既孝於親尤
篤於二兄仲氏宗曼有孤孫承裔貧苦不能自立公命其子文凱
儒凱收養之文凱先卒獨儒凱繼其家及公歸卽爲承裔治居室
使仍守舊業毋廢墜其施於鄉族細行之美尤多茲不載姑序次
其大者俾刻諸神道而系以銘銘曰

在太祖世經術取士公乃奮興以克有位於皇太宗復舉用公揚
于外臺以肅庶工出入中外有勞有烈人望謂何邦家之傑遂丞
詹事遂佐冢卿式展其猷以宏厥聲天官之尊天子所命殿於南
京亦罔不正祇事列聖殆五十年殊錫寵褒帝制在焉達尊者三
公則兼備哀榮始終莫與爲比梨樹之原峩峩新阡刻此銘詩百世
之傳

都察院右都御史熊公墓志銘

槩

錢文肅公

幹

宣德九年十月甲寅都察院右都御史熊公以疾卒于北京居第
之正寢上聞之嗟悼賜祭命有司給官舟歸其喪治墳葬于吉水

縣之某里七歲孤端奉左春坊左庶子兼翰林侍讀周公所爲狀
來請銘以志于幽堂之石乃爲序曰公諱槩字元節熊氏世爲南
昌豐城人祖達夫仕元福州錄事卒于官考敬方幼無所依母夫
人攜以適吉水胡氏因冒其姓今爲吉水人公貴始復舊姓又用
恩贈祖考皆資善大夫都察院右都御史祖妣楊氏夫人妣郭氏
封夫人公幼英悟過人甫成童聞父講左氏春秋卽知大旨忻然
請授之由是書過目輒記憶不忘父心異焉比長學大進有志尙
一時同輩不惟推讓其學至其器識自多以爲不及永樂六年戊
子舉進士于鄉九年辛卯登進士高第拜監察御史聽決精敏若
老於吏事者卽以能稱父繇邑校弟子員升國子監生六館多所
宗仰方是時太宗文皇帝駕幸北京仁宗昭皇帝以太子監國事
公侍朝立文華門下於大眾中見其狀貌壯偉問侍臣誰何知者
以公姓名對且言父學行之美稱歎久之以是父子益有聲于都
邑閒歲餘父歿還家執喪哀毀如禮卽起復爲御史署刑部事會

藩憲大臣員闕太宗命吏部簡兩京朝臣之有材望者補之公在
選列仁宗燕之禮部子道里費至擢廣西按察使慨然以戢吏姦
卹民隱爲己任屬谿峒蠻獠大出殺掠居民聲搖諸郡桂人大恐
布政使議欲請於藩王出兵以遏之公曰吾等受方面之寄寇至
無計捍禦乃以煩王事聞誰任其咎寇必不至戒嚴而已旣而果
然議者服其識有居官而沒于其土者家以道遠弗能還朝廷詔
所在給舟車歸之有司迫促甚至公念男女生聚有一旦遣行賞
用凋落奏乞聽其便從之尋調廣東仁宗正位召入擢用迨至而
宮車晏駕矣今上親政銳然登用賢材以責庶事之實以新天下
之治而常鎮蘇松浙東西諸郡豪右之民往往詐力持吏短長脅
制州縣肆毒善良無厭細民苦之上以公爲可使改大理寺卿命
偕中貴人往按之公亦知上用己之意徧歷其地凡官吏之無狀
民之尤無良爲人巨蠹者籍其家盡執以歸于京實諸法聲威振
動於一時海鹽民史慶真自號平康聚無賴之徒恣行剽掠有司

累歲莫能禁聞公至而盡室遠遁得之武昌抵以殊死於是姦宄帖息單弱之民舉安其業父老動色稱快三尺童穉皆知公名而相與傳頌之所至以餘力新學宮勸勵諸生先賢若胡安定公范文正公魏了翁三陸祠宇之傾圮者葺之范氏義田魏氏墳地之侵奪者歸之其子孫之有賢行者禮之士類增重姦民有不便公者誣以受賕在勢者以私怨欲擠之騰口昌言於朝上疑未之信遣御史廉問豪髮近似無所得還乃直公所爲用是上益知公之賢爲足任賜璽書獎勵公亦自信不疑於利害之當與除者皆列以聞松江嘉興兩郡接壤處其閒地大民衆征調服役公私病之奏析其地爲五縣如其請入朝問勞有加特升都察院右都御史往治南京院事始公之出也鬚髮如點漆比還皓然盡白人皆歎其賢勞及斯命下又謂宜居是職公材長於從政務持大體疑獄滯訟能立得其情而志存平恕每具獄推見至隱惟恐吏售其姦民有不得其平故凡被其理者人以無冤尤能嚴束羣屬恆舉古

人剛方有志節者警之詞氣俱厲人人畏其威而莫不奉法以遵職憲紀用振明年賜誥命進階爲資善大夫榮其所出以及其配未幾太夫人以壽終于私第官給祭葬命公扶柩歸葬起視事去年北京右都御史顧公以病久在告召公馳至領其事至益感激自效視居南京時勤又倍之在上前知無不言於係囚之枉抑者多所伸雪故事車駕巡幸以文武重臣畱守公兩被是命今年兼署刑部事自朝慮囚日晏未暇食忽風眩久之乃甦歸治于家踰數日駕還猶力疾入見退而愈劇勞以上尊強起拜受曰小臣被國厚恩曷以補報是夕奄然而逝無一語及家事生於洪武十有八年己丑正月初十日得年五十元配劉氏有賢行先卒贈夫人繼配璩氏封夫人子男五人長燧王子貢士次焯次安次卽端次盛孫男三人公爲人身長六尺神色明秀望之屹然可畏卽之溫然可愛久而知其坦然無城府人多樂與之交公與人交恩意備至居家孝於親友於兄弟庭內無閒言在官不以仕優而廢學有

閒輒手不釋經史論說古今聽者忘倦爲詩文豪偉健麗似其爲人尤善草書四方有求之者雖祁寒盛暑忻然應之人得所欲而去所著有芝山公餘二藁藏於家於乎公以一介之士遭值聖明起爲世用出入二十餘年位致通顯任國重事直已自遂始終保全是上之圖任也專公之報稱者不顧其身無所不用其心假以多壽所樹立當有絕人者奄至於斯可哀也已習禮於公爲邑人復有同年之雅少相好也義不可辭故論次公之世出里居行己爲政之詳序而銘之銘曰

於皇三聖如天之仁文條武鬯若時之春公與時遇光奮于身踐更中外爲世材臣天子嗣位以聖繼神廷登俊乂子育庶民蠢爾羣醜毒痛于人命公往治勞于咨詢扶植善柔誅鉏頑嚚大憝旣去隱訕獲信天章有煒用旌厥勤歸典邦憲堂堂垂紳聳慄在列風紀由振奄其不畱同朝頻呻曷以昭德銘茲具珉垂示來世永永不湮

都察院右僉都御史魯君墓志銘

楊文敏公

正統二年六月十日都察院右僉都御史魯穆希文以疾卒于官上聞遣禮部左侍郎章敞諭祭仍給舟歸其喪卜以某年某月某日葬于某山之原其邑人翰林修撰杜寧爲述其歷官行己之實來請銘希文嘗僉福建按察司事操行履歷予知之悉故不辭爲敘而銘之希文宋散騎常侍澤之裔建炎初澤自汴徙居于嚴七世祖祁温州平陽令始自嚴徙居天台爲天台人曾祖古訓祖谷珩皆隱德弗仕考友敬以希文貴贈文林郎監察御史妣奚氏贈孺人希文自幼舉動異常兒里有識者語其祖父曰是兒他日當爲偉器宜善教之稍長肄業邑庠攻苦食澹篤志經史雖祁寒盛暑不少休息嘗自書人常齧得菜根則百事可做之語于座右蓋已毅然以清操自勵永樂丙戌登進士第敕賜歸榮于鄉因是益肆力問學鄉生執經受業者亦多造就及赴召有司贖鈔萬緡謝而卻之或曰行者以贖何用固卻希文曰筮仕之始未有益于鄉

里而先厲之可乎言者愧服嘗覈江北諸衛儲糧巡兩淮鹽法及監龍江抽分竹木局綜理周密吏莫肆其姦既而以外艱去家居杜門哀毀逾禮服除拜福建道監察御史介然自持人莫敢干以私時太宗皇帝巡幸北京仁宗皇帝監國希文屢上封事知者皆稱其爲敢言又嘗鞫常州巨商法當死商家託其姻舊厚餽白金覲免死希文斥而拒之竟寘之法秩滿擢福建按察司僉事理冤滯繩貪墨摧豪右無所顧避泉州進士李某調官廣西妻吳少而美故富民林肆欲圖之陽與某善遣二黠僕偕行至中道毒死某并其姪吳還肆納之某之族人訴于郡及臬司官受肆賂反罪訴者希文至廉得某執而訊之果服罪漳州民許某富而無子初以姪爲後晚而妾生子因析貲產與姪而以子託之許死姪謬言子非叔出逐之奄有其貲希文按行至郡妾攜孤訴其狀希文乃於市集諸小兒密以許之孤雜其中令父老別之父老獨指示兒狀類許某必其子也於是悉歸其貲晉江縣境有四閘水以蓄洩漑

田數百頃爲豪右專以自利歲旱細民羣訴希文罪其專利者民皆驩呼鼓舞今上皇帝嗣位大臣薦希文治行驛召至升今職尋命捕蝗大名廣平循行阡陌勞來不倦民不之擾而害隨息暨還贊肅憲紀駸駸有聲朝退方治事疾遽作而卒家無以爲斂公卿賻治其喪始克襄事希文生洪武辛酉某月某日享年五十有七配張氏先希文三月卒於家子男二曰昇曰昂孫男三曰誠曰誼曰諱希文爲人剛正清慎內恕外嚴寡嗜慾薄滋味歷仕中外二十餘年家無饒貲被服如寒士卒之日聞者莫不咨嗟歎悼嗚呼士之爲世用才足以應變知足以決疑者非不有也而求其清介有守執法不回似希文者殆亦不多見焉是故不可以無銘也銘曰

介如石兮維守之真直如矢兮維心之平維介維直士德之偉人一羣稱君乃兼美方其蜚聲震耀當時今焉云亡孰不悼思遙遙閩藩政傳永久奕奕憲臺名著不朽天台之原考卜維新安此宅

兆永裕後人

子昂一名崇志累官應天府尹循良愷悌人咸稱為長者附注

吏部右侍郎鄭君墓志銘

誠

楊文敏公榮

士君子遭時得位才行兼茂克舉厥職上無負國家下不負所志人皆仰其存而哀其歿者斯豈多見哉若故通議大夫行在吏部右侍郎鄭君蓋其人也君諱誠字文實世家建昌之南城高祖禎仕元為撫州路醫學錄曾祖德銘歷彭澤南陵二縣典史祖瀚遠以君貴贈吏部右侍郎父守中累封吏部右侍郎妣王氏累封贈淑人君生洪武庚午九月十日自少刻志問學選為邑庠生究春秋之旨同輩自以為莫及永樂辛卯領鄉薦入為太學生夙夜淬礪器宇日充歷政冬官以勤慎自效擢為吏部司務於職克稱尋以待郎師達薦升考功員外郎君雖年少居要職懋履謙恭事先輩以禮課功責實無所徇人以是多之未幾丁內艱痛念母疾弗克躬侍湯藥哀毀逾禮及葬陰雨不止君號泣顛天天稍霽人

以為孝感所致制未終特起改文選員外郎尋轉郎中時同官孫英號稱狷介少許可於君獨加敬讓洪熙紀元受誥命榮及二親宣德丁未歸省還朝仍故職庚戌以少師蹇公薦為吏部右侍郎選任精審敷奏詳明尤為眾所推宣廟嘗召問庶官品級及居職者賢否君歷對稱旨遂受寶帶襲衣之賜今上皇帝嗣位益致公勤雖故舊執贄相見亦卻而不納鄉人有為太學生者於公有宿怨及當受官自謂必見抑君惜其才擢真五品其所守所行類如此正統戊午十一月一日以疾卒於官自卿士以及僕隸莫不嗟惋翌日上聞為之悼惜遣禮部尚書胡公致祭仍命有司治葬事君娶黃氏有淑行初封宜人進淑人子男一曰星弟某來自南城將奉柩歸葬於鄉某山之原乃以刑部侍郎何君文淵所述事行謁拜請銘惟君天性孝友父嘗邁足疾繼以目眚君憂形于色徧求良醫得善藥輒附傳以歸療之疾遂愈奉繼母傅氏淑人不異所生遇諸昆弟及從昆弟俱有恩位雖貴顯歸拜舊師惟執弟子

禮見其貧厚遺以金繒待僮隸亦未嘗加以疾聲厲色居官二十年小心慎密始終如一至其寬厚和易虛已容人識達政要旁行不流卓卓乎有足稱者是不可不銘銘曰

麻姑之山秀擁一方下有盱水其流洋洋維水之清維山之英孰其鍾之天官亞卿亞卿之生人中褒然師奇其敏友推其先肇自小官薦登顯庸弗倨弗隨克勤克公勤不自盈公而生明鑑別妍媸衡審重輕天子曰嘉是爲能臣輿論攸歸咸曰偉人生不失榮歿不失哀悠悠逝川去不可回勒此銘辭闕之幽宮惟千百祀令名罔終

國子司業吳先生墓志銘

傅

楊文貞公

士奇

太學爲國家成賢育材爲興治之本所係非細故其師範尤在得人而非道明德立心古人之心知本末之務多士所心敬誠服者不足以稱任數十年來稱斯任者臨川吳先生其卓乎表表者與先生以明正之學淳實之文端厚之行峻潔之操挺然而不詘臆

然而不滓其於施教必先正本而後循序以達也蓋先生自讀書鄉校已立志不凡近雖窶夙夜勤苦淬礪不奪於外物洪武中選鄉貢病不果上後入充太學生祭酒司業禮之不與諸生等奉命宣諭武臣雲南又閱軍士福建時奉旨出使者所至皆有金幣之贈重朝命也先生一豪無所受及歸其裝不益絲豪惟經過山川所作甲古賞勝之詩百數十篇耳會試禮部擢第一廷試第四賜進士出身授翰林院編修升修撰考禮部會試纂修高皇帝實錄書奏賜白金文綺及金織衣修永樂大典爲副總裁吏部言國子監闕司業太宗皇帝曰此非可輕授其令祭酒胡儼慎舉有學行可爲師表者以聞胡公舉先生即日授國子司業居無何祭酒有他命自是皆先生總監事時士習日下學者急於進取率不究心經傳惟誦習前輩程文以覲僥倖先生革之終日危坐堂上召與講析義理且設疑詰之使退求諸心庶有自得之益於爲文必先義理而後辭采學者始趨實功不事苟得以禮法率其屬屬官中

有不檢者數輩不便之相與求先生之短以沮之卒無所得又飾詐以謗之然先生素行孚於外者久謗卒不行有以告者先生但自引咎而已以是名益高而謗者益不容於清議雖弘度待物然未嘗屈己求合雖時權貴卒不樂之而自信益篤仁宗皇帝知之有素一日顧士奇曰朕即位以來兩京之臣多以序進惟南京吳司業未進蓋朕久不見之故忘之耳後三日宮車上賓矣先生為司業十有八年太學生數千人及天下賢士君子皆稱吳先生古道吳先生賢師而職銓衡者獨若不聞此雖先生之命而益以見其所守且士大夫之重輕於世者亦豈係乎其官之進否也哉先生篤孝友親喪哀毀骨立後在太學遇諸生告歸省者輒感慟不勝處交友必輔之正道雖迂不避中允李貫故同舍生素相厚貫坐累繫獄十年家甚貧先生極力調之且戒其家人有無相共貫竟死獄中而調其家益勤平素施義類此一日會燕太學得風疾遽革昇歸顧其子曰吾死勿用浮屠老子法治喪不一語及他事

而卒卒之日家無一緡之儲禮部尙書蔚公集眾賻治斂歸葬先生諱溥字德潤號古厓吳氏世業儒其先居臨川之種湖曾大父景南大父恭父思清贅崇仁章氏遂家崇仁後以先生貴贈其父子德郎國子司業母章氏安人及封其妻鄭氏安人子男四與彌與疇與年與性孫男三先生卒於宣德丙午九月三日春秋六十有四以卒之明年某月日葬崇仁左橋之原先生長士奇二年同官翰林者七年又以同鄉相交莫逆後來北京嘗主余家聞其夜坐談其貧賤時事益使人聳然起敬而後知其操執峭厲蓋天性云無幾聞其計余為儒林勳之嘗私為作傳矣欲書一通寄其子未暇也今與性新除休寧縣學訓導在北京求余作父墓銘遂損益傳文為之志而係以銘曰

嗚呼先生君子之儒古道之趨古人之徒其存者貞其執者確必有本原用淑來學豈世無人誰與古心嗚呼先生足彊儒林嗚呼先生逝矣不作寒厓古柏高風凜若

子與弼字子傅別號康齋天順改元以高士徵至京授左春坊左
諭德四上疏以疾辭不就進封事十策英宗嘉納之遣行人王惟
善送歸行狀見後附錄

皇明名臣琬琰錄卷之二十三

皇明名臣琬琰錄卷之二十四

刑部右侍郎段君墓志銘

民

楊文貞公

士奇

宣德九年二月二十九日刑部右侍郎段君卒于南京家素貧僉
都御史吳君敏德既經紀喪事禮部尚書胡公源潔以聞上為悼
歎賜祭命有司營葬於是吳君使人北京需葬銘而胡公以屬士
奇嗚呼段君者世所謂仁人君子也又士奇素所交游士奇宜銘
按國子司業陳君光世狀段之先居南康之建昌世業儒其曾祖
元營田郎中祖篤修徙吳中父志清又徙常州之武進母葉氏君
諱民字時舉自幼溫重穎敏喜學且其父母惟一子篤意教之故
德器蚤成登永樂甲申進士第為翰林庶吉士時太宗皇帝命禮
部翰林院准天經之數選曾棨等二十八人就文淵閣盡出中祕
書使進其業旦暮給大官饌又月給膏火之資蓋期之於大用而
君與焉君祇體上意益勵弗懈而文學大進與修永樂大典丁內
艱去服闋除刑部山東清吏司主事授承直郎涖官廉慎而明敏

克勤恆存哀矜惻怛之心處疑獄必歸於厚麗辟者咸以得君爲
幸踰年扈從赴北京召修四書五經及性理大全書成被重賜復
還刑部升郎中益精獄議尤爲尙書所重凡大獄必咨君部奏章
必歷君閱乃上在刑部八年山東妖婦唐賽兒作亂三司官以縱
寇誅詔廷臣簡代者其推舉君數人授君山東布政司參政同舉
中有畏難者君曰竭誠以共吾職耳何足計利害哉下車敷宣德
意整飭紀綱撫綏殘氓剷革宿弊政理一新吏民悅戴居三年召
同考禮部會試士論服其衡鑑又三年召赴闕命以本官署戶部
右侍郎之南京是時車駕在北京久南京諸司習於翫愒任錢穀
刑名者其務叢脞尤號不治君至躬勤率之莫敢或違始若扞格
已而服從咸修其職明年實授本部右侍郎又明年改刑部其振
起作新一如戶部罪人聞君至皆相慶於獄伸抑疏滯浹旬之間
聲譽用彰三年以績最賜誥授嘉議大夫贈其祖若考皆嘉議大
夫刑部右侍郎妣李淑人封其母太淑人妻盛淑人初爲參政考

滿當得誥言於朝願推以封母從之至是母年將九十得封者再
人皆榮之君忽得寒疾數日小差矣將出視事左右謂未可以風
曰數百人困坐獄中翹跂待我奈何可自佚哉強出三日疾復作
遂亟有問之者荅曰不能報上恩矣如老母何言已遂卒君性至
孝初爲庶吉士得祿卽迎父母就養京師父沒後所歷官未嘗不
奉母以行而曲盡愛敬襟宇清明坦夷表裏一致喜怒哀不形聲色
當官任事惟義所在不苟遜避與人交久而信卒之日其官屬臨
哭皆哀南京卿大夫之賢者皆走弔哭北京自師傅六卿以下咸
寓奠祭君春秋五十有九其子男四實宏安寧孫男二璇璣其葬
以卒之歲某月某日附武進先塋之次銘曰

仁以及民義以行身其履坦坦其存溫溫我懷若人於古多有鳴
呼時舉於今曷少亦旣乘時曷不永年匪直哀斯而獨其親凡今
之人哀此君子士奇之銘亦哀賢友

大學士張公墓碑

瑛

楊文定公

溥

正統元年秋九月戊戌資善大夫禮部尚書兼華蓋殿大學士張公以疾卒於位享年六十有二訃聞朝廷遣官諭祭詔有司營葬如制明年五月一日葬邢臺縣郭村先塋其子祥以墓碑未有刻文走京師奉禮部尚書毘陵胡公狀泣拜以請予與公久同僚案誼不可辭按狀公諱瑛字子玉世居順德之邢臺祖和興父敬德皆樂爲善祖妣王氏妣馮氏俱以公貴封贈如秩公自幼及長豐偉凝峻識者奇之初補弟子員於鄉校克勤問學日有進益同輩咸推讓之甫弱冠卽以明經領丙子鄉薦授陝西寧州學訓導調武德衛學訓武臣子弟再調淮安之宿遷縣學所至嚴教條責效生徒多成材者秩滿擢吏科給事中稽考銓選封駁章奏克舉其職宣宗皇帝爲太孫時太宗皇帝遴選文儒侍從講學公實與焉仁宗皇帝登大寶宣宗正位東宮詔升左春坊左中允又升左諭德改洗馬宣宗卽位首錄舊勞升行在禮部右侍郎宣德改元之三月升本部左侍郎兼華蓋殿大學士入翰林知制誥明年升尙

書兼職如故修太宗仁宗兩朝實錄爲總裁官旣而命涖南京禮部蓋以根本之地分理六卿之事必重臣也凡再奏績當赴京師皆賜璽書以止其行其見委任若此後以父喪歸守制宣宗旣遣官治葬祭仍起復公視事今朝廷於老成人益加倚畀公不起矣嗚呼惜哉公於經史善講解其侍宣宗每於帝王傳授心法與夫修齊治平切要之言漢唐以下人君行事可爲勸懲者必反覆敷陳之以是日見親厚先後賜賚攸多當起復入見時宣宗特出御製詩詞並緡錢二千錠賜之公退而陳之語人曰古人云稽古之力予亦云然公性寬厚喜愠不見待人接物一以真率爲本推讓賢能僚案協和平居嬉嬉然若無所介意臨事施設毅然不可奪人以此稱道之而亦嘉其遭際之爲盛云娶陳氏贈夫人繼室郭氏封夫人側室韓氏賈氏曹氏王氏子男三祥陳出祈郭出裕曹出女二孫男一女二嗚呼公以詩書之業起庠校職輔導而居論思位列上卿榮遇四朝儒臣之光顯者可謂至矣宜有銘詞以昭

來世銘曰

於昭皇明列聖重熙登崇儒雅千載一時公自學官擢之禁近位至六卿官居二品昔我宣廟育德之初公在左右進說詩書以啟以沃歲月滋久恩賚之臻亦既多有飛龍在天風雲景從乃登祕閣乃領南宮論思之職禮樂之典任日益親望日益顯兩朝德業日月光輝纂述之任公實領之舊都金陵根本之地用肅神人惟公之事龍章鳳誥錫類惟均况其祿養上逮乎親貴富光融宜有終始公則得之世罕其比郭邨之原有高者墳後來考德視此刻

國子祭酒胡先生墓碑

儼

楊文定公

溥

正統八年八月二十七日太子賓客國子祭酒兼翰林侍講致仕胡公頤菴先生卒計聞詔遣官諭祭命有司營葬制得立碑其子陳昭奉江西參政張君居傑所述行狀走京師請文余與先生有斯文之誼不可辭先生諱儼字若思世居臨江之新淦元末徙南

昌先生天資穎悟自幼好學受經於伯父虞部員外郎汝器及游鄉校從郡中諸先輩講學若書若琴若詩文皆有傳授既長博極羣書至於天文地理律曆醫卜皆通其說先輩皆稱許之以書經中洪武丁卯鄉試第二明年會試中副榜授松江華亭教諭以內艱去丙子改授長垣縣上書乞近便養親詔許之改饒之餘于自是著爲令己卯以薦升安慶桐城令壬午太宗皇帝入正大統間先生名召試之稱旨特授翰林檢討尋升侍讀直內閣朝廷推恩封其父母妻室永樂甲申升左春坊諭德兼官如舊是年九月拜國子祭酒庚寅上北征命以祭酒兼侍講掌翰林院事輔導皇太孫監國洪熙春以疾辭加授太子賓客致仕此其厯官也先生筮仕華亭時尙少而能以師道自任勸勉諸生務實學勵行檢以變浮靡之習日親講授每至夜分雖隆冬甚暑不廢華亭長者皆稱重之謂先生必大用其在餘干如華亭時士子樂從之成效居多宰桐城以愛民爲本凡可便民者以身任之民間積年逋負悉與

奏免邑中虎爲害傷民物乃齋沐告于神虎遂滅迹表朱桐鄉墓
俾民奉祀嘗督漕運次三山值大風雪遇中流有覆舟命僕夫援
之活其被溺者三十餘人捕蝗途中見飢餓病者悉命里胥扶掖
就民舍給以藥食是夜大風雨得免暴露存活數百十人入翰林
時朝廷選任儒者若江右解大紳胡光大楊士奇金幼孜永嘉黃
宗豫福建楊勉仁一時共事者七人先生在眾人遇有顧問必從
容審度而後對未嘗以材智先人時論多之及兼宮僚在講筵凡
古今治亂得失必反覆敷陳以圖裨益以外艱去詔奪情道過南
京見東宮詢及民情所對皆切時事爲祭酒以身率諸生奉守學
規以圖成效一時人才翕然從化朝之公卿大夫咸推敬之時國
子生有以故告歸者皆坐成邊先生爲言其情有可矜乃得免先
生雖掌國學朝廷有大制作若纂修太祖皇帝實錄及永樂大典
天下圖志諸書皆爲總裁未嘗去館閣令桐城時嘗爲湖廣鄉試
考官其去取有公論在國學遇太宗皇帝幸太學御彝倫堂賜坐

講經賜資優厚縉紳榮之此其宦績也乞致仕賜璽書褒美復其
子孫賜寶楮爲道里費仍命有司給舟車還先生閒居廿餘年日
與學者講求性理之學親藩禮遇之方岳重臣咸待以師禮而師
生未嘗一言及私自處甚淡薄歲時僅足衣食嘗表許遜韋丹廟
請春秋致祭修白鹿書院此其處退閒之有道也先生達於報施
之理凡處是非利害可否之間必審度以求至當惟恐貽患於人
羣論中有不合卽引退不與辯以故所至能全交此又其守身之
槩也其爲文以理爲主不尙詞藻所著有頤菴詩文若干卷行於
世考直翁累贈朝議大夫資治少尹國子祭酒兼翰林侍講妣王
氏累贈恭人配張氏累封恭人嘗受命婦恭服之賜子男三日祀
早卒曰陳曰昭女六孫男四謹詢訥詵孫女四曾孫男二先生臨
終命斂以時服嘗卜城南懸榻里爲壽藏明年閏七月二十五日
葬之門生楊溥爲之銘曰
繫古有君子觀光于朝爲國之賓及老而歸儀式後學師道聿尊

是爲鄉先生歿而祭於社噫先生其人也

李文達公賢

禮部尙書忠安胡公神道碑銘
我朝名公鉅卿聰明特達者多矣若器識宏遠福壽隆長惟武進胡公一人嗚呼休哉公諱澹字源潔別號潔菴其先淮安宿遷人有諱藩者仕劉宋爲太子左衛將軍遷豫章數傳至諱誠者仕唐爲侍御史子常州刺史瓊生持國家于常遂爲武進人持四世孫曰宿仕宋爲樞密副使宿十一世孫曰中立爲常州制置中立生昭公之高祖也曾祖庸仕元爲浙江儒學提舉祖禎爲常州路醫學錄考宗仁隱居不仕皆以公貴贈光祿大夫少傅兼太子太師禮部尙書曾祖妣章氏祖妣徐氏妣李氏皆贈一品夫人公生而髮白彌月方黑母夢一僧持花以遺之覺而生公居數日有僧至家索觀公見僧卽笑僧曰此吾師天池高僧後身也命我求見以笑爲誌果然聞者咸驚異之公自幼端重不好嬉戲弱冠入邑庠洪武中領鄉薦登庚辰進士第授兵科給事中尋遷右給事中公

勤識大體士林譽之太宗文皇帝入正大統公供職如舊永樂改元秋以奏對稱旨升戶科都給事中丁亥上察近侍中惟公忠實可託遂命公巡游天下以訪異人爲名實察人心向背時御製性理大全爲善陰騭孝順事實書成俾公以此勸勵天下以故雖窮鄉下邑軌迹無不到在湖廣閒最久丙申秋還朝丁內艱乞終制不允尋進禮部左侍郎明年往巡江浙諸州投嘉議大夫癸丑復自均襄還朝車駕親征北虜駐蹕宣府公馳謁行所在上臥不出聞公至喜而起且慰勞之曰卿驅馳良苦賜坐與語凡所歷山川道里郡邑豐嗇民情休戚以至所聞所見保國安民之事悉爲陳說上欣然納之向所疑慮者至是皆釋比退漏下四鼓先是仁宗皇帝爲太子監國時飛語上聞文廟屬公往察之公至以所見七事皆誠敬孝謹密疏以聞上覽之大悅自是不復疑仁宗嗣位特賜誥命授正議大夫資治尹已而聞公曾有密疏疑之乃轉太子賓客兼國子祭酒之官南京未幾閱章奏見公所上密疏深嘉其

忠方議重用之而龍馭上賓矣宣宗皇帝卽位復禮部左侍郎兼職如故洪熙乙巳冬公自南京來朝上素重公及入見顧問良久卽爾任行在禮部事宣德改元春進尙書是歲秋漢王謀叛事覺公贊上親征事平公受賞資甚厚復給叛者家屬四人丁未賜誥命投資善大夫復賜近第一區於長安右門外給閭者二十人戊申上嘉公忠勤特賜銀章四其二曰文恭世家曰清和恭靖蓋嘉羨褒美之也尋以公生辰賜燕於其第秋八月公扈從巡邊至會州而還己酉命兼詹事府事夏五月扈從北巡時常民有豪橫者旣抵于法悉以田宅賜公辛亥命兼行在戶部事聖節御製詩一章賜公及蹇忠定楊文貞文敏三公且曰朕茂膺天眷惟爾四人贊翼之功因賜燕盡醉而罷新建禮部成命光祿設燕勳戚公卿皆往賀公公以爲盛事立石廳事之右倚任益隆每燕見上虛心問曰卿有何言得其章奏卽施行之時有芝產于公署人以爲公和氣所召今上皇帝踐阼亦惟圖任舊人待公尤厚凡軍國重務

皆與聞加授資德大夫正治上卿每考績必有賚予甲子以年至七十上章乞致仕上以公精力未衰慰勉畱之己巳上親征北虜命公畱守京師秋八月進太子太傅階榮祿大夫景泰初賜誥命辛未春公因災異數見乞放免以回天意不許尋進少傅壬申兼太子太師二俸兼支公固辭一俸癸酉復賜誥命進階光祿大夫自後每歲引年乞歸皆不許丙子復因災變乞賜罷黜亦不許時公年八十二忽疾作艱於步履明年皇上復位公喜不自勝扶疾入朝而筋力不可強矣遂乞謝事且辭師傅二職上方重用耆舊憫其老皆從之陛辭賜白金寶鏹金織襲衣給驛舟以歸復賜璽書有卿宅心允臧處事惟慎雖經變故無改厥常之諭歸之日鄉人老穉聚觀者以億萬計公陳所受賜於堂感激泣下遣家子長寧詣闕申謝上念公厯事累朝遂官長寧爲錦衣衛世襲鎮撫俾歸終養公之弟克恭克寧克誠時年皆七十餘蒼顏白髮燕樂於一堂遂扁曰壽愷優游桑梓者七年疾復作召諸子前曰爾輩圖

報國恩勿墜家聲遂瞑目而逝天順七年八月八日也享年八十有九終之日常州守卓天錫夢公來辭已而聞終大以爲異訃聞上爲之震悼賜太保諡忠安遣官諭祭於其家復令有司營葬事恩榮始終世莫與比公爲人平易寬和廉靜寡慾自奉澹薄起居有常居官敬慎一豪不苟歷事四聖無纖豪過舉蔚然爲一代名臣立朝幾六十年薦拔士類甚多十知春闈貢舉天下之士盡出其門平居未嘗疾言遽色雖庸夫孺子亦知其爲長者暇則手不釋卷喜爲詩文晚年譽望益尊其酬應愈劇曾不厭倦所著有芝軒集若干卷又嘗輯錄醫藥經驗者曰衛生易簡方經進又有律身規鑑俱行于世公配范氏早卒累贈夫人繼張氏累封夫人子男四人長曰祺卽長寧居母喪廬墓有司聞于朝旌其門曰孝子次衍以武舉得官沒於王事次懽錦衣衛指揮僉事次嗣女三孫男一曾孫男一銘曰

大明盛時有臣胡公從容其閒以篤其忠始爲夕郎乃教胄子輿論攸歸多士咸喜作賓春宮遂長春官列聖倚之四海又安國之老成進位師傅温恭維人翊我皇度公在朝廷六十春秋祿位優游莫之匹休公身雖亡中有不死懿行崇功昭彼信史皇恤耆英曠典是承隧道有碑儒臣到銘

河南左布政使李公墓碑銘

昌祺

錢文肅公

幹

太宗文皇帝入正大統首下明詔搜揚側陋思得天下材智之士以其新治道而尤嚮用儒行永樂癸未廷試取士四百七十三人在位二十二年凡以科取士而咸稱是科得人爲最盛河南布政使司左布政使李公昌祺其一焉公少負材器志於用世繇郡學生以明經取進士第簡入翰林爲庶吉士性素介特至是益自檢飭達官勢人未嘗謁之私第會修永樂大典禮部奉詔選中外文學之士以備纂修公在選中例凡經傳子史下及稗官小說悉在收錄與同事者僻書疑事所未通質之於公多以實歸推其該博精力倍人辰入酉出編摩不少懈退復以其餘力發爲詩文應

人之所求者皆典贖非苟作隱然聲聞館閣閒書進被燕資摺爲
禮部主客司郎中部凡四司主客視他司最繁劇官難其人公以
明敏濟之不怠剴治其閒庭無畱事退視其私一室枵然無長物
俸不足以供費泰然不以屑其意堅苦礪節時流少與爲比尙書
呂震有巧佞材倚被主知狠復自用專以嚴憚下人羣吏莫敢仰
視慢易僚佐少忤其意者輒中傷之眾皆側目而待公特異有所
承稟色詞俱温始終不少衰駕幸北京仁宗以皇太子監國兩命
權知部事行在吏部奏藩憲員闕太宗命簡兩京朝臣有材望者
補之仁宗舉公等若干人應詔燕于禮部予道里費至則升爲廣
西左布政使朝野榮之廣西地極南徼谿洞徭獠時出標掠邊氓
苦之公至而威望凜然狙伏深阻不復爲民患境內晏安政務修
舉尋丁外艱去官吏民皆追思之服除入覲仁宗在位言于朝曰
此佳士良不易得在列竦聽退而相與嘉歎不已先是河南連年
旱蝗民多死徙太宗震怒被災郡縣有司不以上聞者悉逮寘于

法思得人以撫安其民改公往涖河南被命卽就道旣至宣布主
恩疏滯舉廢救災卹患憫下窮繩豪猾去貪殘方嶽之政所當舉
者悉盡心焉質明起視事日入方息居數月政化大行聲績茂著
復丁內艱歸服喪河南荐飢本司累奏起公治之宣宗命奪喪乘
傳赴官爲治如初勤勞倍之因感風疾往往增劇不待引年堅乞
致其事詔報可之歸而先廬僅蔽風雨服食清約如寒士伏臘不
充處之裕如居雖密邇郡城足迹未嘗至公府守長於政務有所
咨決極言無隱因其言民陰受其惠者居多病閒輒書不去手吟
詠自娛遠近有求文應之不倦一日疾革遺訓二子惟以力學修
身爲言餘無他語脩然而逝時蓋景泰壬申三月二十五日距生
洪武丙辰六月二十六日壽七十有五歲公諱禎昌祺字也僑菴
白衣山人運臂居士其號也李氏世家金陵宋南渡有諱義者仕
爲郎中扈從隆祐太后南上畱居吉水之烏江元時諱某者烏江
徙居郡城之吉陽門又徙今之螺川巷因爲廬陵人曾大父充國

皆隱不仕而以行義稱伯父夔力學工詩名聞當時母劉氏公生
資稟英悟早卽嗜學成童屬對賦詩語出驚人弱冠爲文藻思溢
出蔚有老氣不惟一時材俊若禮部侍郎曾公子啟章相與名
聲不相上下鄉之老成人亦皆駭其文識謂必顯於世平生所著
詩文有藁若干卷藏于家平居孝弟友順出於天性恤孤赴難皆
盡其力元配艾氏繼配劉氏子二人長宣次定孫男五女六墓在
縣之紫雲山招義院之西從兄兆也定奉事狀來謁銘以刻諸墓
隧之碑於乎昔之所謂大臣者委身殉國夙夜憂勤以任天下之
重遑恤其私故宋杜正獻公身至大拜歸老無屋以居寓於南京
驛舍范文正公晚參大政妻子僅給衣食至其歿也家無以爲喪
公任牧伯身寵家温固其宜也而乃俛盡厥職空乏以終其身所
謂貴而能貧揆之二公夫何媿哉眎彼顧利冒恥不爲公議之所
右者其賢不肖何如哉因定之請論次公之里系官閥蹈履之詳
爲銘以刻諸貞石又何媿詞銘曰

聖明御極宵旰渴士天心純佑俊乂雲萃奮庸于朝布列有位效
其智能稱厥任使公起茂科立躋顯仕兩殿大藩所治去其
煩苛洫以簡易招徠罷氓奠安田里震疊遠夷綏靖邊鄙惠洽羣
黎威憚健吏威惠並施本仁輔義夙夜孜孜弼成化理先民有云
國之利器牖下告終得正而逝螭蟠豐碑表厥墓隧昭其民庸垂
示永世

鎮江府同知陳公墓志銘

朱都御史

公諱諤字克忠少字一諤姓陳氏世居番禺曾大父諱中奉宋季
爲廉訪使按山東有能聲大父諱照卿樂善好義隱居田里勢利
澹然邑人敬慕有貧者輒捐已振貸事弗平者咸質之退無怨言
頗有陳太邱王彥方風父諱以惠博通經史兼通內典而精於醫
治疾如神弗圖報於人人多德之國初海內甫平乃退耕田野無
復仕進心惟篤義方之教配杜氏生四子其次公也公自幼性敏
洎長遜志篤學而識見迥出流輩讀書過目成誦辭藻英發卓有

古作者氣格以惠公嘗曰吾子諤器宇不凡他日必大吾門也弱冠游廣郡庠受業于永嘉陳先生門益自奮勵冀以成父志先生深器之永樂六年戊子以書經領薦卒業于太學納交名流以宏所蘊用志愈篤聲譽藉藉遂聞于朝八年庚寅夏五月超擢刑科給事中介然自守遇事剛果劾奏豪強不避權要嘗奏事聲響甚大聽者凜然上令餓之數日奏對如前乃曰是天生也每見呼為大聲秀才云嘗以直諫致逆鱗之怒命為坎奉天門外瘞之七日不死遂釋還職未久升吏科都諫一日率同列奏事忤上上怒落職罰令修葺象房同事者先治完降職去公貧不能倩人乃力自為值駕至觀象問治屋者誰也公前俯伏陳其故上念其直且憐其貧尋命復官由是擊搏愈甚朝廷肅然而上亦屢有付託委任之意焉九年辛卯九月奉使雲南公幹還朝即命署通政司事癸巳春三月也逾年署應天府未幾又署刑部事所至克舉厥職凡百施為悉中肯綮十四年丙申夏又轉鴻臚寺亦署事也明年冬

又改署工部事歷履聲績視前有加不四年而轉署三五公才皆足膺之為無忝焉至是升授順天府府尹治同三輔政尚嚴明有漢張趙風吏畏其威民懷其

歌誦興焉嘗出行轉城隅誤衝皇太子駕太子怒訴上上曰陳府尹是我父母官竟不問其見重有如此已亥四月癸巳有白鳥乳公庭槐公表而獻之上喜賜金帛有加廷臣稱賀時有白鳥之頌既而執政出公為湖廣按察使論者以白鳥雖為國上瑞而亦公外補之兆也歷三載刑政肅清一道無冤獄亦無冤民前憲使孟公督營造公成之民不告勞事易以集將代朝廷命吏部侍郎師公有事湖廣畱公督軍公嚴號令秋豪無犯民得按堵既平奏最改山西公至一以治湖湘者治之洪熙改元封建親藩選輔導之職廷臣推公重厚老成才德兼備足副簡畀遂授荆府長史先時公因忤親王貶知浙江海鹽縣上一日問左右大聲官人何在此人宜復為輔導使人得易聞過至是因有是命降敕曰朝廷建諸

子以藩屏國家必選賢能端正之士爲之輔長史其首也所以贊其德義治其政令尤爲得賢乃足以克副簡畀爾浙江海鹽縣知縣陳諤自給事廷陞擢尹京府兩司風紀敷歷有年茲特授爾奉議大夫荆府長史漢之河閒東平飭躬勵行令聞長世固王之能自修亦必輔導有其人焉爾宜勉之王有無窮之美爾亦有稱於世時改元正月也公至左右匡輔殫心竭誠多補益初命下人爲公懼公贊有方率至於善益副上付託之重蒙賜忠良鯁直四大字以寵異之既而封贈其父如己官母杜氏爲宜人配蕭氏封如母宣德三年丁母憂還哀毀甚至郡人素服公剛直有屈者來白公公語諸當道皆伸之服闋復爲長史與王不協遂除鎮江府同知時戶部侍郎周公忱督漕于淮以公廉介有爲檄修陂塘圩岸相方設宜隨事就緒及郡之山川社稷壇壝學校齋堂殿廡咸大而新之成績皆歷有紀未滿考以年耄乞歸不許欲徑挂冠鎮民遮畱弗得行及章屢上乃允命兵部撥夫隸送還逾兩期以疾終

時正統九年甲子三月二十三日也距公生洪武十年丁巳十有一月初十日春秋六十有八矣越明年乙丑十二月二十二日將奉柩葬于番禺永泰鄉白雲山樸木坑西辛嚮之原適予以賜歸吉州其孤郡庠生綸以其郡人都御史羅公亨信所爲狀請銘志石用垂不朽予與公同時官于朝知公獨深義不可辭嗚呼公以豪傑之才正大之學歷仕四朝懋著勞績眷顧之恩有隆無替英風義氣足以廉頑而立懦求之古人蓋無愧也顧世之才德節操有如公者能幾何人哉公二子長經次綸卽求銘者銘曰
亶亶克忠才德通敏出仕明時持身端謹擢居近侍職列禁垣劾奏嚴密受知帝尊厯署大政殫心制治榮遷京尹操法循理進獻禎瑞加秩賜金兩居總憲刑獄惟矜郡邑澄清綱維振肅藩輔既遷轉導忠告志存忠良行有鯁直動烈流聞干祀弗息引年上疏致政榮歸優游暮景山谷增輝同仕四朝眾稱特達令名彰彰威望日赫令壽終考安順榮光於乎克忠歿也不忘

南雄府知府劉君言行錄賈 楊尚寶廉

劉實字嘉秀江西安福人歷仕宣德天順間終南雄知府卒年六十六

嘉秀來京師課績不投足於達官貴人之門自陳其才薄親老乞授教職以自便自通判而視教職其位之崇卑秩之厚薄固莫然不侔矣乃欲辭此以居彼是豈利於富貴者之所能為哉會有詔旨省滌庶官中外執事之臣以尤退者累千百嘉秀自謂必得所欲迺復有金華之命豈不以其才足以為治長民非典教之職所能盡與今嘉秀辭之既頻朝廷留之益固其猶有古之風與嘉秀出判郡事三年不以妻子隨不與流輩伍廉介之操綽有聲稱

贈撰行序

君授官金華府通判郡賦以早歲逋不能完民或鬻子女以足數奏寬貸之又贖還其子女督賦至浦江其丞王韶君鄉友也具盤饌饗蒞詣館饋君君謝弗納坐郡治公務有閒輒探案閒經史閱

之視事乃掩卷已則復然郡僚或竊笑之不為改郡中顏孝子宗澤呂東萊祠墓汲汲修葺鄭義門合爨世久漸不能自給又買馬出丁供山西驛以君言得免役劉定之撰小傳

南京鄉闈校文帷幙衾褥遂以為贐舊常然也君卻還之丁母憂廬墓蔬食以終喪擢順天府治中民饋送鵝不受委而去君縱之門外景泰中召修宋元史于東閣筆削任心無所吝承屈遜見所修不合己意笑聲徹闕陛聞者驚愕相戒勿以藁示君擢知南雄府府為江廣要路商稅鉅萬官于是者鮮不盈饜推其餘以待過客亦無或缺望君至存稅之一二以繕郡學補張九齡大庾嶺松而已未數月中貴使嶺外至南安先遣騎來南雄視供張不如昔所聞君又與騎抗禮不假借色辭騎馳還南安明日從中貴至入驛與諸從騎弓劍羅立左右郡僚庭參畢趨出獨留君詰以慢已共苛辱之庭中轟然南雄民自驛門外爭走入為君謝過以身翼蔽遂以君出中貴見君得民心徐問知其平素欲召釋前憾君

不復往中貴去至韶韶人爲言南雄守驛書言公矣中貴乃亦以驛馬兼程疾馳先聞逮君至京人見其言臣從官三二十年不以妻自隨餐粗衣敝欲爲國家愛養所部不忍勞費之以是觸忤天使無所逃罪上霽威聽其言不復更窮治獄事得釋有日矣以病

卒

贊曰予聞安成大夫士云君喜著書尤用意春秋中夜有得蹴童子然鎧起書之如獲至寶斯可謂慕學矣而其所行與古廉吏范丹塵甑何相異學而知行之誠難能也然以是律己可爾以是求合於塗之人欲與己不齟齬豈可得乎位至郡太守全而歸之其託鑑於聖明爲幸已多矣並小傳

惟公躬過人之操履立絕俗之儀矩利誘之而不回勢揚之而不

沮彭待郎撰墓銘

南雄知府其廉足尚也

名臣贊錄

安慶知府周公行狀

濟

李文達公賢

公諱濟字大亨世家洛陽曾大父諱文質大父諱誠之俱隱德不仕父諱禮以不羈之才遠涉江湖閒公旣冠永樂丁亥春自入郡庠爲弟子員博學強記因讀論語至父母在不遠遊章味定省曠而音問疏之語愀然不樂曰父在數千里外幾星周矣若之何而不往省乎卽棄學徒步以往再越月抵閩適遘疾已危一見公遂愈乃奉以歸復入學曰方寸定矣於是刻苦不知寒暑者累年遂領河南甲午鄉薦赴太學學業大進尋厯事烏臺會蠡縣豪民毆人至死賂同行證一老人已問未決公訊其情有疑旣二日乃得豪民狀遂出老人闔院異之聞於都堂自後獄有疑悉委公無不得其情適有中官陳姓者宣廟極寵之因有過大怒送院鞫之御史巖繼先莫測上意咸避之公曰何以避爲立訊成獄都御史劉觀由此注意於公會御史缺員以公屬吏部補之公以目疾不就宣德戊辰夏遂除江西都司斷事初獄有輕重惟都指揮是決公曰此吾職也彼何與焉雖盛怒執愈堅旣久服其公反加禮呼爲

大兄藩臬鉅公由是皆重之癸亥春以父喪去位居家不作佛事
一從文公家禮鄉人咎之謝曰僕儒者流安敢從佛因歎曰昔程
子之賢亦不能化况我輩乎服闋調湖廣都司正統改元秋用當
道者薦拜監察御史立朝有蹇諤風士大夫爲之改觀二年冬鎮
大同中官郭姓者以豪橫僭度聞於朝廷敕一御史往廉之先往
者不得其情復以公往乃微行代負芻者入其宅盡得違法狀朝
廷嘉之明年春御史出巡宣府者以邊情劇不能處分遂自經欲
遣能者咸曰非公不可公既至邊將爲之斂迹邊務一清四年夏
以母喪還家躬修塋域見良方多輒公曰此必古者不封之墓卽
掩之因增土數尺是夜夢一老人衣冠甚偉揖謝曰感公修吾宅
問其名曰乖厓也旣覺悟曰乖厓乃張詠之號已而考之實葬其
地公之誠能感鬼神如此七年春服除復受命往巡西蜀威州土
官董敏王允讐殺累年不解勢愈大朝廷敕公率方鎮兵數千至
其境公曰朝廷本意欲安之撫之不服然後加兵未晚也吾不忍

其肝腦塗地乃令人齎榜於各寨宣布朝廷恩威且曰從撫者卽
無罪允讀其榜沈思之書囿字於榜尾令持還眾皆不解其意公
曰此非難見囿者誘禽獸之媒也意謂誘而殺之耳復釋此意示
以誠信允大驚曰非凡御史也卽投服以馬數十令子弟入貢贖
罪敏亦媿服一方遂安朝廷嘉勞之十年秋復巡鳳陽逢歲歉民
多窘於食公歎曰此地民飢我飢之也輒開倉振之然後聞於朝
有司危之公曰以此得罪甘心焉若俟報何啻穿井以沃焦釜民
賴全活者數十萬竣事會安慶以人民飢食流離聞且報無賢守
之故於是大臣咸推公十一年夏出守安慶公馳至視篆之明日
召闔郡父老問其故皆流涕曰此處三歲不熟矣以子女易食滿
載而南者無虛日公卽分命止其舟借漕運糧以濟之子女得存
者不下萬餘連章懇陳歲荒民流之故復乞停稅朝廷俱從之首
訪余忠宣公祠已毀矣公歎曰余公昔鎮安慶保孤城於七年之
久仗義死節有功於名教今乃無祠非缺典乎遂與僚屬各捐俸

立祠民之樂從者甚眾俗尚奢親沒不葬者數百家女聘未歸者千餘家公乃出令示期違者罰之貧者助之不兩月無畱焉閩中寇起天下騷動安慶貧民亦欲乘勢乃聚眾強取富民粟富民以盜訟於公公曰此非盜也乃貧耳卽碎其狀曉於貧民曰得其穀者報以數吾代償之貧民聞之感愧遂解散暇則集職行錄以驗爲政之得失櫛垢爬痒務蘇其困民賴之如父母焉工部尙書周公忱巡撫諸郡獨慮安慶歲必數至爲綜理自公下車之後曰吾無安慶之憂矣在任三年以疾卒六縣之民爲之罷市巷哭若親喪願扶柩至洛陽者數十人視古之循吏亦何愧焉公爲人謙恭不立厓岸外和內剛事上接下交友無不得其權心風流醞藉善記子籍凡事必究其出處雖隱僻事亦精到喜清談遇知己對酒達旦不寐人論文或忽公詰之卽窘復爲開之識量過人能用其智眞所謂豪傑之士也生於洪武丙寅卒於正統己巳壽六十有四配封氏子一人端儀用有司舉爲陝西狄道縣丞景泰改元端

儀葬公於邨山路駝峰之陽從先兆也謹狀

河南知府李君墓表

驥

楊文貞公士奇

先皇帝臨御宵旰勞勤圖惟安民之道簡求賢俊任之牧守迺宣德五年命監察御史李驥爲河南知府賜之璽書命去民所惡而與其所欲河南地大務殷其民數困於旱澇又壓於親藩之重其變近及將校怙勢厲民民不勝弊李君至辛勤信詘起什濡槁實虛而正綱紀明憲度民始有蘇息意而向之爲厲者不得縱肆咸不愜志相率假親藩勢以摧君朝廷聞之悉捕假勢者寘諸法君政治益行中貴人知君遣追俛首探懷中出以歸之默不敢一語在郡興學禮賢均賦役弭寇盜咸盡心焉致勤職事率味爽坐公堂或日中昃不暇食郡嘗大疫捐俸市藥以濟民嘗大旱躬禱嵩嶽雨隨降霑足所治一州十三邑吏憚其清民德其惠鄰郡民有爭訟不平率走庭下求直爲河南六年卒卒之日其僚屬及民耆老

哀之如喪親戚古所稱良二千石君其人哉君諱驥字尙德生六歲而孤自幼知務學謹言行見重於師友治詩經中山東鄉試爲太學生洪武丙子車駕臨太學親拔生徒十八人爲給事中君與焉授戶科奏罷關市檢察商稅苛細之弊居無幾坐累免官後用薦起知新鄉縣爲之有方雖時供億繁而民無擾招徠流亡數千戶咸俾得所丁內艱去民猶數詣上官乞奏畱君不報服闋改知東安縣招撫流亡如新鄉勤課農桑凡民所未便者悉奏除之縣多狼嘗噬寡婦子寡婦訴於君君反躬自責而白寡婦寃於城隍神翌旦殛所有狼云廷臣交奏君治行召爲刑部浙江司郎中議獄平恕嘗上疏言崇教化重農桑育賢才選守令惜民力恤軍士汰冗官養廉能抑倖進簡馬政通鈔法等十四事多見采納在刑部三年又坐累謫戍邊仁廟嗣位下詔求賢近臣奏舉君召爲貴州道監察御史愈益自奮振舉風紀慷慨持論未嘗以訐爲直嘗陳時務十事皆嘉納之巡歷所至斥姦貪獎賢能人用悅服馭下

以簡居官稍暇手不釋書冊堂室至廩庾率揭銘以自警所用物雖几杖之微必取正直不可以苟在河南於治之後堂植梅竹松恒退食其中名堂曰四友其一君自謂也一日燕賓客堂中談笑之頃奄卒正統元年六月二十七日也春秋七十其先世居青州業儒後徙兗之鄆城曾大父紹宗大父輝祖父壽康母朱氏以君貴贈父監察御史母孺人封妻劉氏孺人子男五長隣長垣縣儒學教諭次傑英輔恭孫男二興道與邦士奇與君同朝素熟君德善於江陵楊公弘濟江陵公嘗爲君著傳至是又道隣求爲墓文嗟乎李君外嚴重而內明恕處也孝於親悖於鄉仕也所歷勞績焯焯而冰蘖之操夷險不貳嘗自號復一貞士考其平生隱顯窮達履之正執之固所云貞者不其然哉故特爲之表

